

Peqqussutissatut siunnersuummut nassuiaatit

Nassuiaatit nalinginnaasut**1. Aallaqqaasiut**

Siunnersuutip piginneqatigiilluni inissiat pillugit Inatsisartut peqqussutaat nr. 1, 31. oktober 1991-imeersoq taarsissavaa. Peqqussut maanna atuuttoq atuutilernerminiit sisamariarluni allangortinneqarsimavoq.

Siunnersuut inuit amerlanerusut inissianik imminnut pilersulernissaannik ineqarneq pillugu Naalakkersuisut politikikkut anguniagaanut tamakkiisumut naapertuuttunngorlugu annertuumik iluarsaataavoq. Aalajangersakkanut atuuttunut naleqqiullugu peqqussutissaq najoqqutassatigut annertuumik, inatsisitigut inissisimanagerup allannguuteqarneranik kinguneqartussanik allangortiteriffigineqarpoq. Tamatumani pingaartumik pisortanit taarsigassarsisarnermut aqqissuussinerit, kiisalu inissiat attartortittakkat najugarisat piginneqatigiilluni inissiaatit tiguneqarsinnaanerinit, imaluunniit piginneqatigiilluni inissiaatillit peqatigiiffisa piginneqatigiilluni inissiaatiminnik inissiatut nammineq pigisatut tunisisinnaanerinit periarfissanik pitsannguinerit pineqarput. Aalajangersakkanut atuuttunut naleqqiullugu inigisamik allamut attartortitsisarnermut aamma piginneqatigiilluni inissiaatinik attartortitsisarnermut maleruagassat erseqqissarneqarput annertusineqarlutillu, taamatullu piginneqatigiilluni inissiaatillit peqatigiiffiata piginneqataasullu aserfallatsaaliuinissamut pisussaaffiinik agguaassisarneq ersarissumik immikkoortinneqarput. Atuutsitsisarnermi annertuumik pingaaruteqartutut aamma ilaasortaajunnaarsitsisarnermut maleruagassat aalajangersakkanut atuuttunut naleqqiullugu erseqqissarneqarmata annertusineqarlutillu matumani oqaatigineqassaaq.

Aammattaaq oqaasertatigut erseqqissaasoqarpoq aammalu inatsisitigut inissisimanagerup najoqqutassatigut allannguuteqartinnissaa siunertarineqarani maleruagassiat ilusilersorneqarneranni allannguisoqarluni.

2. Siunnersuutip immikkoortui pingaernerit

Ataatsimut isigalugu aalajangersakkat atuuttut tamakkiisumik iluarsaanneqarput. Tamatuma saniatigut siunnersuummi aallarniutigalugu piginneqatigiilluni inissiaateqarnermi aqqiissutissat, Namminersornerullutik Oqartussanit kommunimillu taarsigassarsititsivigineqarsinnaasut sisamat assigiinngitsut

nassuiarneqarput. Tamatuma kingorna maleruagassat piginneqatigiilluni inissiatillit peqatigiiffimmut tunngasorpiaat, taassuma ingerlanneqarnera, aserfallatsaaliuineranut maleruagassat, ilaasortat pisussaaffii aamma piginneqatigiilluni inissiatillit peqatigiiffianniit ilaasortaajunnaarsitsisarneq nassuiaatigineqarput. Kiisalu piginneqatigiilluni inissiatillit peqatigiiffiik atorunnaarsitsisarneq aammalu Namminersornerullutik Oqartussat kommunillu taarsigassarsititsiviginnaasaannik inissiat inissiatut nammineq pigisassatut tunineqartarnerat pillugu kapitali nutaaq ilanngunneqarput.

3. Pisortanut aningaasaqarnikkut allaffissornikkullu sunniutissat

Siunnersuummi piginneqatigiilluni inissiatillit peqatigiiffiannut pisortanit taarsigassarsiaritineqartussat aningaasartaat allanngortinneqarput. Tassalu siunnersuut malillugu sanaartornermut aningaasartuutit tamakkiisut 25 %-iinut Namminersornerullutik Oqartussat aamma kommuni tamarmik immikkut erniaqanngitsunik akilersugassaannngitsunillu taarsigassarsititsisinnaalerput, taamaallaalli 110 kvadratmeterinut aammalu annerpaamik kvadratmeterimut 19.100 koruuninut annertussusilerneqartunik. Taamaattorli aningaasartaat eqqarsaatigalugit assigiinngissuteqanngilaq, Namminersornerullutik Oqartussanit kommunimillu taarsigassarsiarititassat suli annerpaamik 525.250 koruuninik annertussuseqarsinnaammata. Aningaasartalli allanngortinneqarnerisigut piginneqatigiilluni inissiatillit peqatigiiffiat annertunerusumik akisussaaffilerneqarpoq, annertunersaa aningaaserivik taarsigassarsititsisiniartarfillu aqqutigalugit aningaasalersorneqartariaqartartussanngormat. Kisianni aningaasartanut allannguutit piginneqataalersussanut nutaanut aningaasaqarnikkut annertunerusumik artukkiissanngillat, nammineerluni aallaqqaatissatut akiliutissaq 7 %-imiit 5 %-imut allanngortinneqarmat. Taamatut appaanikkut aamma nammagassat Namminersornerullutik Oqartussanit aamma kommunimit taarsigassarsititsisartunut namminersortunut nuuneqarnerat erseqqissarneqarpoq. Taamaattumillu oqartoqarsinnaavoq, piginneqataasoq toqqaannngitsumik piginneqatigiilluni inissiatillit peqatigiiffiata taarsigassarsititsisartunut namminersortunut pisussaaffeqarnerata annertunerulerneratigut, annertunerusumik akiitsunut nammagassaqalissasoq.

Allaffissorneq eqqarsaatigalugu pisortanut allanik sunniuteqassanngitsoq naatsorsuutigineqarpoq.

4. Inuussutissarsiornermut aningaasaqarnikkut allaffissornikkullu sunniutissat

Siunnersuut inuussutissarsiornermut aningaasaqarnikkut allaffissornikkullu sunniuteqartussatut naliliiffigineqanngilaq.

5. Innuttaasunut allaffissornikkut aningaasaqarnikkullu sunniutissat

Siunnersuut innuttaasunut allaffissornikkut sunniuteqartussatut naliliiffigineqanngilaq.

Aningaasaqarneq eqqarsaatigalugu siunnersuut inissianut, sananeqarnerminni qaffasissumik aningaasartuuteqarfiusunut annertuumik oqilisaassisussaavoq. Nammineerluni aallaqqaatissatut akiliutissaq sanaartornermut aningaasartuutit qaffasikkaluarpata appasikkaluarpataluunniit tamanut atuuttumik annikillissaaq.

Ataatsimut isigalugu siunnersuutip atuutilerneratigut, piginneqataasut maannamut naleqqiullugu taarsigassarsianut akilersuinerulissapput, nammineerluni aallaqqaatissatut akiliutissaq akilersugassat annertoqqataannik appartussaammata. Tamanna imminermini pitsaasutut isigineqartariaqarpoq, taamaattoqarnerani, tamatuma kingorna piginneqataassutip allamut tunniunnerani piginneqataasumut tuttussanik ileqqaagaqartoqartussaammat nalilinnillu katersuisoqartussaalluni.

Siunnersuummi peqqussummut siusinnerusukkat atuuttumut naleqqiullugu piginneqatigiilluni inissiaatillit peqatigiiffiata pisinermut akiusup sinneranut imaluunniit sanaartornermut aningaasartuutitut qanoq amerlatigisunik allaniit aningaasalersuisinnaaneranut killiliussat peerneqarput.

6. Avatangiisinut pinngortitamullu sunniutissat

Siunnersuutip avatangiisinut pinngortitamulluunniit sunniuteqarnissaa naatsorsuutigineqanngilaq.

7. Sunniutissat annertuut allat

Siunnersuutip suniutaasinnaasunik annertuunik allanik kinguneqarnissaa naatsorsuutigineqanngilaq.

8. Naalagaaffeqatigiinnermut aammalu namminersornermut tunngasut

Siunnersuutip naalagaaffeqatigiinnermut namminersulernissamullu sunniuteqarnissaa naatsorsuutigineqanngilaq.

9. Oqartussaasunut kattuffinnullu il.il. tusarniaaneq

Siunnersuut 2006-imi aggustip aallartinnerani Aningaasaqarnermut Pisortaqaarfimmut, Akileraartarnermut Pisortaqaarfimmut, Inuussutissarsiornermut Pisortaqaarfimmut, A/S Inissiaatileqatigiiffik INI-mut, Iserit A/S-imut, KANUKOKA-mut, Sparbank Vest-imut, GrønlandsBanken-imut, Grønlands Ejendomskontor-imut, Ejendomskontoret Igdlo-mut, Kalaallit Nunaanni Sulisitsisut Peqatigiiffiannut, Sulisitsisut Peqatigiiffiannut NUSUKA-mut, HST-mut, ILIK-mut, SIK-mut, A-Revision ApS-imut, PricewaterhouseCoopers Grønland A/S-imut

(Kalaallit Nunaanni kukkunersiuisoqarfik) aamma Deloitte-mut tusarniaassutigineqarpoq.

Tusarniaarnermi akissuteqarput:

KANUKOKA, A/S Inissiaatileqatigiiffik INI, Deloitte, SIK, A-Revision, Kalaallit Nunaanni kukkunersiuisoqarfik (oqaasiinnakkut tusarniaanermi akissuteqartoq), GrønlandsBanken, Aningaasaqarnermut Pisortaqarfik, NUSUKA, Akileraartarnermut Pisortaqarfik, Inuussutissarsiornermut Pisortaqarfik, Kalaallit Nunaanni Sulisitsisut Peqatigiiffiat aamma ILIK.

Tusarniaaffigineqartut uku siunnersuutip imaanut oqaaseqaatissaqanngillat:

Aningaasaqarnermut Pisortaqarfik, NUSUKA, Akileraartarnermut Pisortaqarfik, Inuussutissarsiornermut Pisortaqarfik, Kalaallit Nunaanni Sulisitsisut Peqatigiiffiat aamma ILIK.

KANUKOKA-p tusarniaanermi akissutaa makkuninnga tunngavissaqalersitsivoq:

Tusarniaaffigineqartumit piginneqatigiilluni inissiaatillit illoqarfimmi nunaqarfimmiluunniit inissisimanera apequtaatillugu, piginneqatigiilluni inissiaatillit peqatigiiffiani inissiat ikinnerpaaffissaasa assigiinnginnerat uparuarpa. Isornartorsiuneq tunngavigalugu inissiat nunaqarfimmiikkaluarpata illoqarfimmiikkaluarpataluunniit ikinnerpaaffissannut piumasaqaatit assigiilersinneqarput.

Tusarniaaffigineqartoq isumaqarpoq, illut affarleriit marluk amerlanerusulluunniit allangortinnissaannut pisinnaatitaaffiliisoqartariaqartoq, tamanna taamaallaat Naalakkersuisut akuersissuteqarnerisigut qaqutigunnaq pisinnaajunnaarlugu. Tusarniaanermi akissuteqaat allannguinnissamut pissutissaqaleritsinngilaq, piginneqatigiilluni inissiaatillit peqatigiiffinik pilersitsinissamik aallaqqaataanili eqqarsateqarnermi ilaatigut inuit akunnerminni ataqatigiilernissaat, ilaatigullu illut imminnut attuumassuteqalernerisigut ingerlatsinerup akikinnerulernissaa anguniarneqarmat.

Tusarniaaffigineqartoq isumaqarpoq, kvadratmeterit tapiiffigineqarsinnaatitaasut amerlassusaat 105 kvadratmeteriniit 130 kvadratmeterinut qaffanneqartariaqartut. Tusarniaanermi akissuteqaat tunngavigalugu kvadratmeterinut killissarititaasut 105 kvadratmeteriniit 110 kvadratmeterinut qaffanneqarput. Tusarniaaffigineqartup apeqqutigaa piginneqataasup toqukkut qimagunneratigut qitornat qimagaasut aamma piginneqatigiilluni inissiaatillit peqatigiiffiannut ilaasortalersinnaanerannut periarfissaat annertusineqarsinnaanersut. Tusarniaanermi akissut toqusoqarneranut atatillugu piginneqataassutinik tunniussisarnermut maleruagassiat killilersorneqarnissaannut, kisiannili piginneqatigiilluni inissiaatillit peqatigiiffiisa ataasiakkaat piginneqatigiilluni inissiaatillit peqatigiiffiata malittarisassaanni tunniusseriaatsinik taamaattunik maleruagassiorsinnaanissamut annertunerusunik periarfissaqalernissaaannut pissutissaqalersitsivoq.

A/S Inissiaatileqatigiiffik INI-p tusarniaanermi akissutaa makkuninnga pissutissaqalersitsivoq:

Attartortunut, illuummi piginneqataalernissamik kissaateqanngitsunut ineqarnermut akiliutip naatsorsorneqartarneranut tunngatillugu, tusarniaaffigineqartup oqaasertaliussani siunissami ineqarnermut akiliutissap naatsorsorneqarnissaanut tunngasut uparuarpai. Oqaasertaliussami "attartoriaatsimi taamaattumi ineqarnermut akiliutip naatsorsorneqartarneranut maleruagassat nalinginnaasut naapertorlugit aalajangersarneqassapput", inissianik attartortitsisarneq pillugu Inatsisartut peqqussutaannut innersuunneqarpoq, tassanilu apeqqut ersarissumik isummerfigineqarpoq. Taamaattumik oqaasertaliussaq atatiinnarneqarpoq.

Inissiap attartortittakkap piginneqatigiilluni inissiatut tiguneqarneranut atatillugu attartortup inissiamut attartortittakkamut allamut innersuunneqarluni inissiamik attartukkaminik qimatsinerani, attartortup sumiginnarsimasai aamma Namminersornerullutik Oqartussanit kommunitilluunniit akilerneqartassanersut pillugu isummertoqarnissaa tusarniaaffigineqartup ujartorpaa. Tusarniaanermi akissut allannguinnissamut ilassuteqarnissamulluunniit pissutissaqalersitsinngilaq.

Deloitte-p tusarniaanermi akissutaa makkuninnga pissutissaqalersitsivoq:

Tusarniaaffigineqartup isumaa malillugu pisortanit taarsigassarsiarititassat amerlanerpaaffissaannik naatsorsuisarnermut maleruagassat allanngortinneqarnerat, innuttaasunut aningaasaqarnikkut sunniutissat allanngornerinik kinguneqartussaavoq. Taamaattumik tusarniaanermut akissut innuttaasunut allaffissornikkut aningaasaqarnikkullu sunniutissat pillugit itisiliiffiunerulluni nassuiaateqarnissamut pissutissaqalersitsivoq.

Piginneqatigiilluni inissiaatillit peqatigiiffiata ukiumoortumik naatsorsuutaanik kukkunerisuisarnermiit naatsorsuutinik kingumut misissuisarnissamut allanngortitsinermi, ukiumoortumik naatsorsuutit annertuunik kukkuneqannginnissaannut isumannaatsuutitsinerup annikinnerulernissaa tusarniaaffigineqartumit uparuarneqarpoq, kisiannili oqariaatsip atorneqarnissaa ataatsimut isigalugu akuersaarlugu. Tusarniaanermi akissut allannguinnissamut pissutissaqalersitsinngilaq, tassami isumannaallisaaneq pisariaqartinneqartoq atorneqarsinnaatikkumallugu, aammalu piginneqatigiilluni inissiaatillit peqatigiiffiata ukiumoortumik naatsorsuutaanik kukkunerisuisarnerup amerlanertigut qaaginnarsiortorujussuarnik ingerlanneqartutut isikkoqartarmat, naatsorsuutit kingumut misissorneqartarnissat toqqarneqarmat.

§ 77, imm. 4-p tusarniaassutigineqarluni nassiuunneqartup oqaasertaliorneqarnera kukkunerisuisut naalagaaffimmit akuerisat kukkunerisuisutullu nalunaarsorneqarsimasut pillugit inatsimmut uniuuppoq, taamaattumillu aalajangersagaq peerneqarpoq, aammalu piginneqatigiilluni inissiaatillit peqatigiiffiata ukiumoortumik naatsorsuutit ataatsimeersuartunit akuerineqarneranni erngerluni pisortanut taarsigassarsititsisunut nassiussinissamik pissusaaffilerneqarneranik taarserneqarluni.

Piginneqatigiilluni inissiatillit peqatigiiffianni kukkunersiuisup piginneqatigiilluni inissiatillit peqatigiiffiata atorunnaarsinneqarneranut atatillugu atorunnaarsitsisunut ilaasarnissaa tusarniaaffigineqartumit isornartoqartinneqarpoq. Tusarniaanermi akissut tunngavigalugu atorunnaarsitsisarnermut maleruagassat ataatsimut isigalugit oqaasertaliorderi allanngortinneqarput, taamatuttaarlu inuit atorunnaarsitsinermik isumaginnittuusussat ilaat eqqartuussissusserisumut akuersissummik pigisaqartumut allanngortinneqarluni. Tassalu piginneqatigiilluni inissiatillit peqatigiiffiata kukkunersiuisuata atorunnaarsitsinermi naatsorsuutit inaarutaasut kukkunersiortussaavai.

SIK-p tusarniaanermi akissutaa makkuninnga pissutissaqalersitsivoq:

Piginneqatigiilluni inissiatit aningaasalersorneqarnissaannut piginneqataasup 5 %-inik nammineerluni aallaqqaatissatut akiliuteqartarnissaa tusarniaaffigineqartumit isornartoqartinneqarpoq. Tusarniaanermi akissut procentimut annertussusiliunneqartup allanngortinneqarnissaanut pissutissaqalersitsinngilaq, taanna taarsigassarsititsisarnermi aaqquussinerup ataatsimut allannguutaanut ilaammat.

A-Revision-ip tusarniaanermi akissutaa makkuninnga pissutissaqalersitsivoq:

Naalakkersuisut piginneqataanermut uppersaatinik assigiissaakkanik suliaqarnissaat tusarniaaffigineqartumit inassutigineqarpoq. Tusarniaanermi akissut piginneqataanermut uppersaatit pillugit sukumiinerusunik maleruagassiornissamat pissutissaqalersitsinngilaq, taamaakkaluartorli Naalakkersuisut pinngitsooratik piginneqataanermut uppersaatinik assigiissakkanik, piginneqatigiilluni inissiatillit peqatigiiffiinit ataasiakkaanit atorneqarsinnaasunik suliaqassapput.

Akilerneqartussanik tulleriinnilersuinermi pitsanngorsaanissamat allanngortiterinissamullu taarsigassarsiat akilereernerini pisortat taarsigassarsiarititaat akilerneqartussatut inissinneqartassanersut pillugu maleruagassanik amigaateqartoqarnera tusarniaaffigineqartup uparuarpa. Tusarniaanermi akissut, tamanna pillugu maleruagassanik ilanngussisoqarneranik pissutissaqalersitsivoq.

Piginneqataassutinik tunniussinermit atatillugu pitsanngorsatit nalinginik aalajangersaasarnermut tunngatillugu ikaarsaarnermut aalajangersakkanik amigaateqartoqarnera, tusarniaaffigineqartup uparuarpa. Tusarniaanermi akissut ilassuteqarnissamat pissutissaqalersitsinngilaq, ikaarsaarnissamat aalajangersakkat atuuttut pineqartumut tunngareermata.

Kukkunersiuisup piginneqatigiilluni inissiatillit peqatigiiffiannut pisussaaffii pillugit tusarniaaffigineqartoq oqaaseqaateqarpoq. Deloitte-mit tusarniaanermi akissuteqaatigineqartoq tunngavigalugu maleruagassat ilaatigut atorunnaarsinneqarsimmata ilaatigullu allanngortinneqarsimmallutik, tusarniaanermi akissut allanik allannguuteqartitsinissamat pissutissaqalersitsinngilaq.

Teknikkikkut oqaatsitigullu kukkunerit annikitsut tusarniaaffigineqartup uparuarpai. Uparuarneqartut aalajangersakkanut arlalinnut nassuiaatini allannguinnikkut itisiliinnikkullu siunnersuummut ilanngunneqarput.

Kalaallit Nunaanni kukkunerisuiisoqarfiup tusarniaanermi akissutai pingaartumik teknikkimut oqaatsinullu tunngassuteqartut pisariaqarfiisigut ilanngunneqarput.

GrønlandsBanken-ip tusarniaanermi akissutaa makkuninnga pissutissaqalersitsivoq:

Piginneqatigiilluni inissiatillit peqatigiiffiata pilersaarutaasumik ataavartumillu aserfallatsaaliuinissamut taarsigassarsiaasa akilerneqareernerini pisortat taarsigassarsiarititaasa akilerneqartussatut inissittariaqaraluernerat uparuarneqarpoq. Tusarniaanermi akissut siunnersuutip tusarniaanermi akissummut naapertuuttunngorlugu allanngortinneqarneranut pissutissaqalersitsivoq.

Inigisamik allamut attartortitsinermut atatillugu attartornermut qanoq annertutigisumik akiliisitsisinnaanerup killilerneqarnera tusarniaaffigineqartumit isornartoqartinneqarpoq. Tusarniaanermi akissut allannguinnissamut pissutissaqalersitsinnigilaq, taamaattumillu suli killeqartitsisoqarpoq, tamannalu aamma piginneqatigiilluni inissiatit ineqarnermut akiliummik qaffasissumik akiliisitsisarnikkut toqqaannartumik aningaasarsiutaanatik, najugaqarfissatut siunertaqarfigineqarnerannik eqqarsaateqarnermut naapertuuppoq.

Tusarniaaffigineqartup uparuarpa, piginneqatigiilluni inissiatip inissiatut nammineq pigisatut tiguneqarneranut atatillugu paarlaassinermut taarsigassarsiat pillugit nassuiaatigineqartut, inissianik niueruteqarnermi pissutsinik equngalersitsisussaasut. Tusarniaanermi akissutip kiisalu sukumiinerusumik isumaliutersuuteqarnerup kingunerisaannik paarlaassinermut taarsigassarsianut atugassarititaasut allanngortinneqarlutik maannakkutut ilusilerneqarput.

Teknikkikkut oqaatsitigullu kukkunerit annikitsut tusarniaaffigineqartup uparuarpai. Uparuarneqartut aalajangersakkanut arlalinnut nassuiaatini allannguinnikkut itisiliinnikkullu siunnersuummut ilanngunneqarput.

Siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Aalajangersakkap oqaasertatigut allannguuteqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 2 assigaa.

Aalajangersakkami peqqussutip atuuffissai aalajangersarneqarput, tassanilu piginneqatigiilluni inissiatillit peqatigiiffii piginneqatigiilluni inissianik, piginneqatigiilluni inissiatillit peqatigiiffiata ilaasortaanit atugassanik sanaartornissamik, pisinissamik, pigisaqarnissamik aqutsinissamillu siunertaqartut pineqarput. Piginneqatigiilluni inissiatillit peqatigiiffiat assersuutigalugu inissianik attartortitsinissamik siunertaqarluni inissianik pisisinnaangilaq.

Imm. 2-mut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 3, imm. 1-imut, piginneqatigiilluni inissiatillit peqatigiiffiata ikinnerpaamik arfinilinnik inissiartaqarnissaanik nunaqarfinnilu ikinnerpaamik sisamanik inissiartaqarnissaanik aalajangersaaffiusumut taartaalluni.

Aalajangersakkami piginneqatigiilluni inissiatillit peqatigiiffianni inissiat ikinnerpaaffissaat aalajangersarneqarpoq. Tassalu piginneqatigiilluni inissiatillit peqatigiiffiat ataaseq ikinnerpaamik sisamanik inissiartaqartussaavoq. Piginneqatigiilluni inissiatillit peqatigiiffiat nammineerluni inissialioraluarpat, inissianik nutaanik pisigaluarpat, inissiat sanatitsisumit namminersortumit sananeqarsimagaluarpata imaluunniit pisortat inissiaataat attartortittakkat pioreersut piginneqatigiilluni inissiatitut tiguneqaraluarpata piumasaqaat taanna atuutissaaq.

Imm. 3-mut

Aalajangersagaq ilaatigut nutaajuvoq. Oqaaseqatigiit siulliit piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 11 assigaa.

Aalajangersakkami piginneqatigiilluni inissiatillit peqatigiiffiisa illuliaannut, illutut quleriiaatut imaluunniit illutut pukkitsutut imaluunniit eqimattatut sananeqartussanut piumasaqaatit aalajangersarneqarput. Tamatuma saniatigut piginneqatigiilluni inissiat ataasiakkaat namminerisaminnik isaariaqarnissaat, igaffeqarnissaat igasarfeqarnissaalluunniit kiisalu uffarfeqarnissaat perusersartarfeqarnissaallu piumasaqaatigineqarpoq. Piginneqatigiilluni inissiatillit peqatigiiffiata illunik ataqatigiisitanik, eqimattangorlugit imaluunniit pukkitsunngorlugit taamatullu quleriiaarlugit sananissaa aalajangersakkami ajornartinneqanngilaq, tassanili sanaartukkat pissusissamisoortumik ataatsimoortutut ilusiligaanissaat kisimi piumasarineqarpoq.

Imm. 4-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 11, oqaaseqatigiinni immikkoortut aappaat assigaa.

Aalajangersagaq malillugu imm. 3-mi aalajangersakkap saneqqunneqarnissaa Naalakkersuisunit akuerineqarsinnaavoq, tassani pissutsit immikkut itsillugit

piginneqatigiilluni inissiat illutut ilaqutariinnut ataatsinut inissiatut imaluunniit illutut affarleriittut sananeqarnissaat tigueneqarnissaalluunniit Naalakkersuisunit akuerineqarsinnaalluni. Immikkut ittumik akuersissuteqarsinnaanerup assersuutigalugu illunut eqimattanut, pissusissamisoorumik ataatsimoorutut iluseqalersillugit sananeqarsinnaasunut nunaminertanik tunniussisoqarsinnaatillugu atorineqartarnissaa eqqarsaatigineqarpoq.

§ 2-mut

Aalajangersagaq tamarmi nutaajuvoq, tassanilu piginneqatigiilluni inissiami inigisap annertussusaanik naatsorsuisarnissaa nassuiaatigineqarpoq. Inigisap annertussusaata eqqortumik naatsorsorneqarnissaa pingaaruteqarpoq, tamanna assersuutigalugu ingerlatsinermut aningaasartuutit agguarnissaannut aamma taarsigassarsiarititassat killissaannik naatsorsuinerup pingaaruteqartussaammat. Aalajangersakkami piginneqatigiilluni inissiami inigisap annertussusaanik naatsorsuisarnerup qanoq ingerlanneqartarnissaa sukumiisumik nassuiarneqarpoq. Naqqup ataani, inini quleriiaani nalinginnaasuni aamma qaliani inigisap annertussusaa immikkoortinneqarput.

Imm. 1-imi aamma imm. 2-imi nr. 1-imi aamma imm. 3-imi init suut naatsorsuinerup ilanngunneqassannginersut aamma nassuiaatigineqarpoq. Inigisap annertussusaa sumut killissanersoq illup silammut iigaa aalajangiisuutinneqassaaq. Assersuutigalugu biilit unittarfii imaluunniit pequusiviit illup silammut iigaasa avataaniittut oqorsarlugit inigisassatut ilanngunneqarsinnaappata taakku inigisap annertussusaanut ilanngunneqarsinnaapput. Taaneqartullu taakkua oqorsarneqarlutik inigisassatut ilanngunneqariinngippata inigisap annertussusaanut ilaassanngillat.

Imm. 2-mi naatsorsueriaaseq eqqortoq nassuiarneqarpoq.

1-imut) Naqqup ataani uuttueriaasissaaq uani nassuiarneqarpoq. Uuttuinerup naqqup ataata silammut iigaanniit uuttuisoqassaaq. Ikkat taamaalillutik naatsorsuinerup ilanngunneqassapput.

Tassani pineqanngilaq naqqup ataa tamakkerluni atorineqanngippat, assersuutigalugu illu qaarsumi sivinganermi sananeqarsimappat. Taamaattoqarpat ininut inigisamat ilaatinneqartunut ikkat killiliisut qeqqiniit inigisap annertussusaa naatsorsorneqassaaq. Aalajangersakkami erseqqissarneqarpoq init naqqi tamakkerlutik cementimik betonimilluunniit qalligaanngitsut inigineqarsinnaasutut isikkoqaraluarpataluunniit naatsorsuinerup ilaatinneqarsinnaanngitsut.

2-mut) Inini quleriiaani nalinginnaasuniittoq tassaatinneqarpoq naqqup ataqaranilu qaliaqanngitsooq. Inini quleriiaani nalinginnaasuniittuni silataani iikkamiit imaluunniit qaliata silataaniit uuttuisoqassaaq. Inissiaq akunnequteqarpat inini quleriiaani nalinginnaasuniittoq akunnequtip qeqqaniit uuttorneqassaaq. Periaaseq qallitutinik marlunnik taaneqartartoq atorineqarpat qisummit allermiit uuttuisoqassaaq.

Ilaqutariinnut arlalinnut inissiani illup isui inissiat akunnequtaasa affaattut isigineqassapput.

3-mut) Uani qaliani inigisamut uuttueriaaseq nassuiarneqarpoq. Takissusaa inini quleriiaani nalinginnaasuniittut silataaniit uuttorneqassaaq, kisiannili silissusaa illup qaavata uinganera apeqqutaalluni allanngorarsinnaasoq qaliap naqqaniit 1,5 meterinik portussuseqartumi uuttorneqassaaq aammalu illup silataani qaliat qaavinit uuttorneqassalluni. Illup qaavata uingarnani aniinganeq, assersuutigalugu qaliani aniinganeq ikkat inimut killiliissutaasut silataannut uuttorneqassapput.

Imm. 3-imi pineqarpoq naqqup ataa qalialu inigisap annertussusaanut aatsat najugaqarfissatut suliarineqarsimappata ilanngunneqassasut. Taamaalilluni qaliarsuaq aamma naqqup ataani ini taamaallaat pilivittut assigisaatulluunniit atorqeartoq inigisap annertussusaanut ilanngunneqarsinnaanngilaq.

Imm. 4-imi pineqarpoq init aalaakkaasumik natillit kisimik inigisap annertussusaanut ilanngunneqarsinnaasut. Taamaalilluni soorlu qui imaluunniit biilinit oqqisitsivik naqqa nunaannaasoq inigisap annertussusaanut ilanngunneqarsinnaanngilaq.

Imm. 5-imi inissiami majuartarfiit pineqarput. Majuartarfiit inissiap ilaatut ilanngunneqassapput. Naliginnaasuvoq majuartarfiit ataatsit inissianit arlallinnit atorqeartarnerat, majuartarfiillu annertussusaat inissiami ataatsimi annerpaaamik 11 kvadratmeterinik annertussuseqartussatut killilerneqarpoq.

§ 3-mut

Aalajangersagaq nutaajuvoq, tassanilu piginneqatigiilluni inissiaatillit peqatigiiffiata periaatsit assigiinngitsut sisamat atorlugit inissianik pisisinnaanera aalajangersarneqarpoq. 1. inissianik nutaanik, piginneqatigiilluni inissiaatillit peqatigiiffiat sanatitsisuulluni sanaartornikkut, 2. piginneqatigiilluni inissiaatillit peqatigiiffiata piginneqatigiilluni inissialianik nutaanik sanatitsisumit namminersortumit pisineratigut, 3. piginneqatigiilluni inissiaatillit peqatigiiffiata piginneqatigiilluni inissialianik nutaanik Namminersornerullutik Oqartussanit imaluunniit kommunimit pisineratigut, imaluunniit 4. pisortat inissiaataanni attartortittakkani attartortut piginneqatigiilluni inissiaatillit peqatigiiffiannik pilersitsinerisigut, tamatumalu kingorna piginneqatigiilluni inissiaatillit peqatigiiffiata inissianik attartortittakkanik piginneqatigiilluni inissiatut tigusineratigut. Pisisarnermi periaatsit assigiinngitsut sisamaasut tamarmik kapitalinut immikkoortiterlugit maleruagassiorneqarput.

§ 4-mut

Aalajangersagaq nutaajuvoq, aammalu piginneqatigiilluni inissiaatillit peqatigiiffiannut, periaatsit sisamat peqqussummi maleruagassiorneqartut arlaannik atuillutik inissianik piserusuttumut Namminersornerullutik Oqartussat aamma kommunip erniaqanngitsunik akilersugassaannngitsunillu

taarsigassarsititsisinnaaneranut ataatsimut isigalugu inatsisitigut tunngavissanik imaqarluni. Taarsigassarsiarititassanut maleruagassat sukumiinerusut kapitalini ataasiakkaani, pisisarnermi periaatsinut assigiinngitsunut maleruagassiorfiusuni allassimapput.

§ 5-imut

Imm. 1-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 5, imm. 2 assigaa.

Aalajangersakkami erseqqissarneqarpoq Namminersornerullutik Oqartussat imaluunniit kommuni taarsigassarsititsisuuguni, peqqussummi matumani maleruagassani allassimasut saniatigut piginneqatigiilluni inissiatillit peqatigiiffiata illuutaanut ingerlatsinermulluunniit sunniuteqarnissamik Naalakkersuisut imaluunniit kommunalbestyrelsi piumasaqarsinnaanngitsoq.

Imm. 2-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 5, imm. 1 assigaa.

Aalajangersakkap atuutilerneratigut piginneqatigiilluni inissiatillit peqatigiiffianni piginneqataasup nammineerluni aallaqqaatissatut akiliutaanut, sanatitsisup namminersortup piginneqatigiilluni inissianik sanaartorneranut imaluunniit piginneqatigiilluni inissiatillit peqatigiiffiata ingerlanneqarneranut aningaasaliisoq peqqussummi matumani maleruagassani allassimasut saniatigut piginneqatigiilluni inissiatillit peqatigiiffiata illuutaanut ingerlatsinermulluunniit sunniuteqarnissamik piumasaqarsinnaanngilaq. Aalajangersakkap atuutilerneratigut assersuutigalugu piginneqatigiilluni inissiatillit peqatigiiffiata siulersuisuini ilaasortaataqarnissamik, imaluunniit aqutsinermik ingerlatseqatigiiffiup aalajangersimasup atorneqarnissaanik aningaaseriviup piumasaqarsinnaanera inertequtaalerpoq.

§ 6-imut

Aalajangersagaq nutaajuvoq, aammalu kapitalimut, piginneqatigiilluni inissiatillit peqatigiiffiat sanatitsisuulluni nutaanik inissialiortiternissaannut maleruagassiornermut nassuiaataalluni. Tassalu aalajangersakkami matumani suliaasaqarfimmik nutaamik maleruagassiorortoqanngilaq, kisiannili kapitalip taassuma atuuffissaanut erseqqissaataalluni.

§ 7-imut

Aalajangersagaq nutaajuvoq, aammalu najoqqutassatigut allannguuteqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 10, imm. 1, 5 aamma 6, aamma § 11, imm. 2 assigalugit.

Aalajangersakkami piginneqatigiilluni inissiatillit peqatigiiffiata piginneqatigiilluni inissianik nutaanik sanaartorneranut aningaasalersuutissat tamarmiusut nassuiaatigineqarput.

Imm. 1-imut

Aalajangersagaq nutaajuvoq, aammalu najoqqutassatigut allannguuteqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 10, imm. 1 assigalugu.

Aalajangersagaq naapertorlugu Namminersornerullutik Oqartussat aamma kommuni tamarmik immikkut sanaartornermut aningaasartuutit tamakkiisut 25 %-iinik, angissusissatut aningaasassarititaasutullu killiliussat imm. 2-mi aalajangersarneqartut iluanni erniaqngitsunik akilersugassaangitsunillu taarsigassarsititsisinnaapput. Taarsigassarsititsisoqassappat pisortat taarsigassarsiarititassaannit katillugit 50 %-iusunit Namminersornerullutik Oqartussat aamma kommuni tamarmik immikkut amerlaqatigiinnik, tassalu 25 %-inik taarsigassarsititsisapput. Taamaalilluni Namminersornerullutik Oqartussat imaluunniit kommuni kisimiillutik pisortat taarsigassarsiarititassaannik, aningaasalersuinissamut aningaasartuutit tamakkiisut 50 %-iinik tamakkiisunik taarsigassarsititsisinnaangillat. Namminersornerullutik Oqartussat § 12, imm. 2 naapertorlugu taarsigassarsititsinissaanni kommunalbestyrelsip taarsigassarsititsisimanissaa piumasqaataavoq, tassalu pineqartumi matumani kommunalbestyrelsi kisimi apeqqutaassaaq.

Imm. 2-mut

Aalajangersagaq nutaajuvoq, najoqqutassatigullu allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 11, imm. 2 assigalugu.

Aalajangersakkami Namminersornerullutik Oqartussat kommunillu taarsigassarsiarititassaannut, tamarmik immikkut sanaartornermut aningaasartuutissat tapiiffigineqarsinnaasut 25 %-iinik annertussuseqartussanut killissarititaasut aalajangersarneqarput. Annertussutsimut taarsigassarsititsiviusinnaasumut annerpaaffissaq 110 kvadratmeterinut killilerneqarpoq, aammalu sanaartornermut aningaasartuutinut taarsigassarsititsiviusinnaasunut annerpaaffissaq kvadratmeterimut 19.100 koruuninut killilerneqarluni. Namminersornerullutik Oqartussat aamma kommunip killissarititaasut taakku iluanni sanaartornermut aningaasartuutit tamakkiisut 25 %-iinik taarsigassarsititsisinnaapput.

Killiliinerup kingunerisaanik Namminersornerullutik Oqartussat aamma kommuni tamarmik immikkut annerpaamik kvadratmeterimut 4.775 koruuninik (19.100 koruunit 25 %-iinik), aamma annerpaamik 110 kvadratmeterinut taarsigassarsititsisinnaapput. Taamaattumik Namminersornerullutik Oqartussat aamma kommuni piginneqatigiilluni inissialiornermut annerpaamik 525.250 koruuninik (4.775 koruunit 110 kvadratmeterinik amerlisillugu) taarsigassarsititsisinnaapput. Piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi killissarititaasut 105 kvadratmeterinut aamma kvadratmeterimut 15.000 koruuninut aalajangersarneqarsimapput, taamaattumillu Namminersornerullutik Oqartussat aamma kommunip taarsigassarsiarititassaasa annerpaaffissaat 525.000 koruuniullutik ((15.000 koruunit 105 kvadratmeterinik amerlisillugit) 33 1/3 %-iinik).

Imm. 3-mut

Aalajangersagaq nutaajuvoq, najoqqutassatigullu allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi § 10, imm. 5 assigalugu.

Aalajangersakkami erseqqissarneqarpoq pisortanit taarsigassarsiarititassat akuerineqarnissaannut piginneqataasup nammineerluni sanaartornermut aningaasartuutit tamakkiisut 5 %-iinik aningaasanngorlugit aallaqqaatissatut akiliisinnaanissaa piumasarineqartoq. Piginneqataasup assersuutigalugu aningaasaliissutissat 5 %-ii aningaasanngorlugit akiligassani aningaaserivimmit taarsigassarsinermigut akilersinnaavai. Aalajangersakkami allassimanera malillugu 5 %-it taakku sanaartornermut aningaasartuutit imaluunniit § 49, imm. 2 naapertorlugu inissiamut atuisinnaatitaaffiusumut naligitinneqartoq naleqqussagaq tunngavigalugit naatsorsorneqassapput. Piginneqatigiilluni inissiatillit peqatigiiffiat piginneqataassutit nalinginik naleqqussaasimangippat, inissiallu angeqqatigiippata nammineerluni aallaqqaatissatut akiliutissaq piginneqataasunut tamanut assigiimmik annertussuseqassaaq. Kisiannili naleqqussaasoqarsimappat, nammineerluni aallaqqaatissatut akiliutissat annertussusaat assigiissanngillat.

Matuma kinguliani assersuut tamatumunnga takussutissiivoq:

Piginneqataassut 1 = inissiamut naligititaasoq 1,2.

Piginneqataassut 2 = inissiamut naligititaasoq 0,8.

Sanaartornermut aningaasartuutit kvadratmeterimut = 17.500 koruunit.

Piginneqataassummut 1-imut kvadratmeterimut nammineerluni aallaqqaatissatut akiliutissat 5 %-iusut = $(17.500 \times 1,2 \times 0,05 = 1.050$ koruunit).

Piginneqataassummut 2-mut kvadratmeterimut nammineerluni aallaqqaatissatut akiliutissat 5 %-iusut = $(17.500 \times 0,8 \times 0,05 = 700$ koruunit).

Piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi nammineerluni aallaqqaatissatut akiliutissat 7 procentinut aalajangerneqarsimapput, taamaalillunilu nammineerluni aallaqqaatissatut akiliutissat 2 procentpointinik appartinneqarput. Taamaaliortoqarpoq amerlanerusut nammineerlutik inissiaateqalernissaminnut akissaqalerniassammata.

Imm. 4-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 10, imm. 6 assigaa.

Aalajangersakkami piginneqatigiilluni inissiatillit peqatigiiffiata aningaasalersuutissat sinnerinik taarsigassarsinikkut akiliinissaa aalajangersarneqarpoq. Piginneqatigiilluni inissiatillit peqatigiiffiat nalinginnaasumik pisarneq malillugu realkredittimit taarsigassarsissaaq. Peqqussummut siusinnerusukkut atuuttumut naleqqiullugu piginneqatigiilluni inissiatillit peqatigiiffiata sanaartornermut aningaasartuutissanik sinneruttunik qanoq annertutigisunik aningaasalersuisinnaaneranut killissarititaasut peerneqarput.

§ 8-mut

Aalajangersakkami aningaasartuutissat suut, agguaqatigiissitsilluni naatsorsuisarneq naapertorlugu kvadratmeterimut akiusumik naatsorsuisarnermut ilaatinneqassanersut erseqqissarneqarpoq.

Imm. 1-imut

Aalajangersagaq piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 11, imm. 4-mut ilaatigut assingusuvoq.

Aalajangersakkami agguaqatigiissitsilluni naatsorsuisarneq, piginneqatigiilluni inissiap kvadratmeterimut akianik naatsorsuinermit atorneqartartoq nassuiarneqarpoq. Piginneqatigiilluni inissiap kvadratmeterimut akia, agguaqatigiissitsilluni naatsorsueriaaseq malillugu piginneqatigiilluni inissiatillit peqatigiiffiata sanaartornermut aningaasartuutaasa tamakkiisut piginneqatigiilluni inissiani kvadratmeterinut ataatsimoortunut agguarnerisigut nassaarineqassaaq.

Piginneqatigiilluni inissiatillit peqatigiiffiisa ilaasa inissianik assigiinngitsumik angissusilikkanik sananissartik aalajangertarpaat. Agguaqatigiissitsilluni naatsorsueriaaseq tunngavigalugu piginneqatigiilluni inissiat ataasiakkaat akii naatsorsorneqarpata, inissiat ataasiakkaat sananeqarnerini inissiani tamani kvadratmeterimut akiusoq assigiittussaavoq. Assersuutigalugu inissiat 95 kvadratmeterinik angissusillit arfinillit aamma inissiat 120 kvadratmeterinik angissusillit sisamat, katillugit 1050 kvadratmeteriusut, aammalu katillugit

15.487.500 koruuninik akeqartut sananeqarpata, kvadratmeterimut akiusoq agguaqatigiissillugu $15.487.500 / 1050 = 14.750$ koruuniussaaq. Taanna malillugu piginneqatigiilluni inissiaq 95 kvadratmeterinik angissuseqartoq 1.401.250 koruuninik akeqassaaq, aammalu piginneqatigiilluni inissiaq 120 kvadratmeteriusoq 1.770.000 koruuninik akeqassalluni.

Assersuusiornermi piginneqataassutitut ataasiakkaanut naligititaasunik naleqqussaasoqarsimansoq ilanngunneqanngilaq.

Imm. 2-mut

Aalajangersagaq piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi §13, imm. 1-imut aamma 2-imut ilaatigut assingusuvoq.

Aalajangersakkami sanaartornermut aningaasartuutit tamakkiisut naatsorsorneqarnerannut aningaasartuutissat suut minnerpaamik ilaatinneqassanersut aalajangersarneqarpoq. Assersuutigalugu allaffissornermut aningaasartuuteqartoqartussaanngippat, tassunga aningaasartuutissat sanaartornermut aningaasartuutitut ilanngunneqassanngillat.

Piginneqatigiilluni inissiat pillugit Inatsisartut peqqussutaannut nr. 1-imut, 31. oktober 1991-imeersumut, kingusinnerusukkut allannguuteqartinneqartumut naleqqiullugu aningaasartuutissat minnerpaaffissaat sukumiinerusumik nassuiarneqarpoq.

§ 9-mut

Aalajangersagaq nutaajuvoq, aammalu allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 10, imm. 2-mut, 3-mut aamma 4-mut assingusuulluni.

Imm. 1-imut

Aalajangersakkami Namminersornerullutik Oqartussat aamma kommunip taarsigassarsiarititassaasa siusinnerpaamik inissiat naammassineranni, aammalu aatsaat atuilernissamut akuersissumik, sanaartornermut naatsorsuutininik inaarutaasunik, suliamut attuumassuteqanngitsumit uppernarsarneqarsimasunik aamma qularnaveeqqusiussaqaarluni taarsigassarsinermi allagartap naqqaarneranik uparuaanertaqanngitsumik naqissuserneqarsimasumillu, kiisalu sillimmasiissummik takutitsinikkut tunniunneqartarnissaat aalajangersarneqarpoq.

Inuup allap attuumassuteqanngitsup sanaartornermut naatsorsuutininik, inaarutaasumik akuerisanik suliaqarnissaa atsiuinissaalu taarsigassarsisup akisussaaffigaa. Sanaartornermut naatsorsuutit assersuutigalugu aningaasalersuinermi siunnersortimit, kukkunerisuiisumit, sanatitsisumut siunnersortimit

entreprenurimilluunniit sanaartornermik isumaginnittuusimasumit atsiorneqarsinnaapput. Piginneqatigiilluni inissiatillit peqatigiiffiata nammineq imaluunniit piginneqatigiilluni inissiatillit peqatigiiffiata eqqartuussissuserisuata, aningaaseriviata allanulluunniit siunnersortaata qularnaveeqqusiussaqaarluni taarsigassarsinermi allagartap suliarineqarnissaa isumagissavaa, tassunga ilanngullugu qularnaveeqqusiussaqaarluni taarsigassarsinermi allagartap Namminersornerullutik Oqartussanut aamma kommunimut, tamatuma kingorna taarsigassarsiassanik tunniussisussanut nassiunneqannginnerani Akileraartarnermut Pisortaqarfimmit naqissuserneqarnissaa aamma Kalaallit Nunaanni Eqqartuussivimmi nalunaarsorneqarnissaa isumagissallugu.

Nutaatut pisortat taarsigassarsiarititaasa siusinnerpaamik qaqugukkut tunniunneqartarnissaat imm. 1-imi erseqqissarneqarpoq. Kommunalbestyrelsi 2009-mi akilerneqartussanik taarsigassarsititsinissamik neriorsuummik tunniussisimappat, kiisalu Naalakkersuisut 2008-mi akilerneqartussanik taarsigassarsititsinissamik neriorsuummik tunniussisimallutik, inissiaq 2008-mi naammassineqarsimagaluartoq inatsisillu malillugit atorneqalersimagaluartoq, taarsigassarsinissamik qinnuteqartup kommunip taarsigassarsiarititassaasa 2009-mi akilerneqarnissaat utaqqisariaqassavaa.

Imm. 2-mut

Aalajangersakkami aalajangersarneqarpoq Namminersornerullutik Oqartussat aamma kommunip taarsigassarsiarititaat piginneqatigiilluni inissiatillit illuutaat qularnaveeqqusiullugu akilerneqartussanik tulleriinnilersuinermi ingiaqatigiittussanngorlugit inissillugit qularnaarneqassasut. Taarsigassarsianut qularnaveeqqut illu qularnaveeqqusiullugu sanaartornermut aningaasartuutinit tamakkiisunit sinneruttunut, tak. § 7, imm. 4, aningaasalersuutissatut taarsigassarsiat akilerneqareernerini akilerneqartussatut inissinneqassapput.

Qularnaveeqqusiisarneq pillugu Kalaallit Nunaannut inatsit aamma qularnaveeqqusiisinnaatitaanermut maleruagassat nalinginnaasut atuutinneqassapput. Aalajangersakkami qularnaveeqqusiisinnaatitaanermut pissutsit maleruagassiunneqarnissaat siunertarineqanngilaq, taamaallaalli taarsigassarsianut allanut aammalu pisinnaatitaaffinnut nalunaarsorsimasunut allanut naleqqiullugu qularnaveeqqusiisinnaatitaanermi inissisimanerup erseqqissarneqarnissaa siunertarineqarluni.

§ 10-mut

Aalajangersagaq nutaajuvoq.

Imm. 1-imut

Aalajangersakkami piginneqatigiilluni inissiatillit peqatigiiffiata § 7, imm. 1 naapertorlugi piginneqatigiilluni inissianik sananissamut taarsigassarsinissamik qinnuteqaat kommunalbestyrelsimut nassiutissagaa erseqqissarneqarpoq.

Imm. 2-mut

Aalajangersagaq una naapertorlugu uppersaatait arlallit qinnuteqaammut ilanngunneqassapput.

Piginneqatigiilluni inissiatillit peqatigiiffiata pilersitsinermut isumaqatigiissut malitassiaq Namminersornerullutik Oqartussanut piniarsinnaavaa.

Pilersaarusiarnut nassuiaat nalinginnaasumik piginneqatigiilluni inissiatillit peqatigiiffiata siunnersortaanit suliarineqartarpoq, tak. § 12, imm. 2.

Sanaartornermi aningaasartuutissanut tamakkiisunut missingersuusiami, nalinginnaasumik sanaartornermi aningaasaqarnermut takussutissiat, entreprenurip sanasussap pigisai aallaavigineqartarput. Aamma kisitsisitigut takussutissiat taakkununga assingusut eqqortullu allat missingersuusiornermut tunngavigineqarsinnaassapput.

Piginneqataasut namminneerlutik aningaasalersuutissaannut uppersaata amerlanertigut tassaasarpog piginneqataasup aningaaserivianit, piginneqataasup nammineerluni aningaasalersuutissaminik akiliisinnaaneranut uppersaata, tak. § 7, imm. 3. Tamatuma saniatigut piginneqatigiilluni inissiatillit peqatigiiffiat allaniit aningaasalersuutissanik siumoortumik akuersinissamik neriorsuummik peqartussaavoq, tak. § 7, imm. 4, taannalu nalinginnaasumik piginneqatigiilluni inissiatillit peqatigiiffiata aningaaserivianit suliarineqartarpoq.

§ 11-mut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 13, imm. 2 aamma 3, aamma § 16, imm. 2 ilaatigut assigalugit.

Imm. 1-imut

Aalajangersakkap atuutilerneratigut qinnuteqaat kommunalbestyrelsip siulliulluni suliarisussaavaa. Tassalu kommunalbestyrelsi najoqqutassat tunngavigalugit suliarinnissaaaq, aammalu taarsigassarsititsinissamik neriorsuutip nalunaarutigineqarnissaanut atugassarititaasut piumasaqaatillu naammassineqarsimanersut misissussallugu.

Imm. 2-mut

Aalajangersakkami kommunalbestyrelsip taarsigassarsititsinissamik neriorsuummik tunniussinnginnerani piumasaqaatit naammassineqarsimasussat arlallit pineqarput. Tassalu piginneqatigiilluni inissiatillit peqatigiiffiat qinnuteqaatip nassiunnerata nalaani sanasussanut akigitinneqartussat pillugit pisussaaffiliisumik isumaqatigiissuteqarsimassanngilaq, taamatullu sanaartorneq aallartissimassanagu. Tamannali piginneqatigiilluni inissiatillit peqatigiiffiata pilersaarsiornermik

aallartitsinissaanut akornutaanngilaq, tassungalu aamma ilaavoq sanaartornerup pilersaarusionerqarneranut nassuiaat.

Piginneqatigiilluni inissiaatillit peqatigiiffiat piffissami qinnuteqarfigisamini sanatitsisutut suliasamat siunnersortimik piginnaanilimmik atorfinitsitsisimassaaq. Piginneqatigiilluni inissiaatillit peqatigiiffiata nalinginnaasumik piginneqatigiilluni inissianik sanaartornissaq suliariumannittussarsiuussavaa, taamaalillunilu entreprenurimik inissianik sanaartornermik isumaginnittunngortitsissalluni.

Kiisalu sanaartornermi sanaartornermut pilersaarusionermullu inatsit, piffissami sanaartorfiusumi atuuttoq malinneqassaaq. Piginneqatigiilluni inissiaatillit peqatigiiffiata sanaartorneq sanaartornermut pilersaarusionermullu inatsit malillugu ingerlanersoq nakkutigissallugu suliasarinngilaa. Suliassaq taanna kommunalbestyrelsip taarsigassarsiarititassanik qinnuteqaammik suliarinninnerminnut atatillugu isumagisassaraa.

§ 12-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 9, imm. 3-p immikkoortua siulleq assigaa.

Imm. 1-imut

Aalajangersakkap atuutilerneratigut kommunalbestyrelsip piginneqatigiilluni inissiaatillit peqatigiiffiata taarsigassarsinissamik qinnuteqaataanik akuersinermini, tamanna pillugu Naalackersuisut nalunaarfigissavai. Taanna taarsigassarsinissamik qinnuteqaatit suliarineqarnerisa ingerlanneqartarnerat pillugu erseqqissaataavoq.

Imm. 2-mut

Aalajangersagaq manna malillugu kommunalbestyrelsi taarsigassarsititsinissamik neriorsuummik tunniussisimatillugu piginneqatigiilluni inissiaatillit peqatigiiffiat Naalackersuisunit taarsigassarsitinneqarnissamat neriorsuummik tunineqarnissamik piginnaatitaavoq. Piginneqatigiilluni inissiaatillit peqatigiiffiata taamaalilluni taarsigassarsiarititassanik tamakkiisunik (50 %) akuerineqarnissaa itigartinneqarnissaaluunniit qulakkeerqarpoq. Aalajangersakkami aammattaaq erseqqissarneqarpoq kommuni taarsigassarsititsisimangippat Namminersornerullutik Oqartussanit taarsigassarsititsisoqarsinnaanngitsoq.

§ 13-imut

Aalajangersagaq nutaajuvoq.

Imm. 1-imut

Aalajangersakkap atuutilerneratigut Naalakkersuisut kommunalbestyrelsilu immikkoorlutik piginneqatigiilluni inissiatillit peqatigiiffiannut neriorsuummik allakkiussapput, tassanilu taarsigassarsiarititassat angissuserigallagassaat taarsigassarsinissamullu atugassarititaasut allassimassapput. Taarsigassarsinissamik qinnuteqaat kommunalbestyrelsimit akuerineqarpat, aamma Namminersornerullutik Oqartussat taarsigassarsititsissapput, tak. § 12, imm. 2.

Imm. 2-mut

Aatsaat sanaartornermut naatsorsuutit inaarutaasut uppersarneqarsimasut pigineqalerpata, taarsigassarsiarititassat annertussusissaat inaarutaasumik naatsorsorneqarsinnaalissapput. Inuup allap attuumassuteqanngitsup sanaartornermut naatsorsuutinik, inaarutaasumik uppersarneqarsimasunik suliaqarnissaa atsiuinissaalu taarsigassarsisup akisussaaffigaa. Sanaartornermut naatsorsuutit assersuutigalugu aningaasalersuinermi siunnersortimit, kukkunersuiusumit, sanatsisumut siunnersortimit sanasumilluunniit sanaartornermut isumaginnittuusimasumit atsiorneqarsinnaapput.

Imm. 3-mut

Aalajangersagaq taarsigassarsinissamik qinnuteqartup aningaasartuutitut missingersuutaasa, Naalakkersuisut kommunalbestyrelsillu taarsigassarsinissamik neriorsuuteqarnerannut tunngaviusimasut aammalu sanaartornermut aningaasartuutit inaarutaasut tamakkiisullu akornanni assigiinngittoqarneranut tunngasuvoq. Taarsigassarsisup assigiinngissut tunngavissaqanngitsumik kinguarsaanertaqanngitsumik taarsigassarsititsisumut nalunaarutigissavaa. Taarsigassarsisoq taamaalilluni qisuariaateqarnissamut pisussaaffilerneqarpoq, taannalu tunngavigalugu taarsigassarsisoq aningaasartuutissanut missingersuutit aningaasartuutissarpiaallu tamakkiisut akornanni assigiinngittoqarneranik paasisaqarnerminiit qaammatip ataatsip iluani tamanna taarsigassarsititsisumut nalunaarutigisariaqassavaa. Piginneqatigiillunili inissiatillit peqatigiiffiat aningaasartuutissat taarsigassarsitinneqarnissamut pisinnaatitaaffigineqartut 50 %-ii sinnerlugit taarsigassarsitinneqarnissamik piunasaqarsinnaanngilaq.

§ 14-imut

Aalajangersakkap tamarmiusup piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 9, imm. 3-p immikkoortua tulleg pingajuallu aamma § 9, imm. 4 aamma 5 assigai.

Naammassinninnissamut atuilernissamullu piffissaliussat eqqarsaatigalugit piffissaliussamik naatsorsuinissamut Namminersornerullutik Oqartussat neriorsuutit allakkiaat tunngavigineqassaaq, Namminersornerullutik Oqartussat neriorsuutaat kingulliulluni tunniunneqartarmat.

Imm. 1-imut

Aalajangersakkami taarsigassarsititsinissamik neriorsuutitut allakkiat atorineqarissaasa atorunnaarsinneqarissaasaluunniit qulakkeererneqarissaasiunertarineqarpoq. Naalakkersuisut neriorsuutitut allakkierneranni, taarsigassarsiarititassat akuerineqartut Sanaartugassanut Iluarsagassanullu Aningaasaateqarfimmut nuunneqassapput. Piginneqatigiilluni inissiat naammassineqarnerini Namminersornerullutik Oqartussat taarsigassarsiarititassat tunniunneqassapput. Sanaartorneq naammassineqanngippat, taarsigassarsiarititassat akuerisat aningaasaateqarfimmit peerneqarissaat siunertanullu allanut atorineqarsinnaalernissaat pingaaruteqarpoq. Kommuni Namminersornerullutik Oqartussatulli aningaasat piginneqatigiilluni inissialiortiternissamut aallartinneqanngitsumut taarsigassarsititsinissamik neriorsuuteqarikkut immikkoortinneqarsimasut atorsinnaanissaat soqutigisaraa.

Imm. 2-mut

Aalajangersakkap atuutilerneratigut piginneqatigiilluni inissiatillit peqatigiiffiata sanaartornerup, piginneqatigiilluni inissiatillit peqatigiiffiata taarsigassarsiffigisimasaata aallartinneqarsimanera piginneqatigiilluni inissiatillit peqatigiiffiata Naalakkersuisunut uppersartussaavaa. Tamanna uppersarneqarsinnaanngippat siumut ilisimatitsinertaqanngitsumik taarsigassarsiarititassat atorunnaassapput, tak. imm. 1.

Paasissutissat nassiunneqartut eqqortuunerinut Naalakkersuisut qularnaveequtissaat, uppersaatip nassiunneqartup kommunalbestyrelsimit uppersarneqarneratigut anguneqassaaq.

Tassani sanaartornerup aallartinneqarsimanerata aallartinneqarsimannginnerataluunniit uppersarneqarissaa pingaarneruvoq.

Imm. 3-mut

Aalajangersakkap atuutilerneratigut neriorsuutitut allakkiap ullulerneraneraniit ukiut pingasut qaangiutsinnagit piginneqatigiilluni inissiatillit peqatigiiffiat atuulernissamut akuersissutip assilineranik Namminersornerullutik Oqartussanut aamma kommunimut nassiussissaaq. Atuulernissamut akuersissut nassiunneqanngippat siumut ilisimatitsinertaqanngitsumik taarsigassarsiarititassat atorunnaassapput, tak. imm. 1.

Aalajangersagaq sanaartukkap taarsigassarsititsivigineqarsimasup unittuunnginnissanut tapertaassaaq. Imm. 2 peqatigalugu aalajangersagaq sanaartornerup ingerlaannarnissanut kajumissaataavoq.

Imm. 4-mut

Aalajangersakkami Naalakkersuisut sanaartornermik kinguartoortoqartillugu, kommunalbestyrelsip inassuteqarneratigut imm. 1-imi piffissaliussanik uniuissinnaanermut immikkut ittumik akuersissuteqarsinnaanerat erseqqissarneqarpoq. Immikkut ittumik akuersissuteqarsinnaaneq piginneqatigiilluni

inissialiorneq sanaartornerup naammasingajalereerneranut killissimatillugu aammalu atuilernissamut akuersissutip suliarineqarnissaa taamaallaat utaqqineqartillugu atorneqartarnissaa eqqarsaatigineqarpoq. Aalajangersakkami siunertaq pingaarneq tassaavoq, aningaasat Sanaartugassanut Iluarsagassanullu Aningaasaateqarfimmut nuunneqarsimasut, sanaartukkamut piffissamik annikitsumik uniuttuuffiulaarsimasunut, taamaakkaluartorli naammassineqartussanut atorneqarnissaasa qulakkeerneqarnissaa. Kommunalbestyrelsip Naalakkersuisutulli kommunip aningaasaataasa piginneqatigiilluni inissialiornissamut immikkoortinneqarsimasut, siunertamut tassunga atorneqarnissaat soqutigisaraa. Sanaartorneq aallartinneqarsimappat aatsaat sanaartornermik kinguaattoortoqarsinnaavoq, kisiannili sanaartorneq aallartinneqarsimanngippat neriorsuut siumut ilisimatitsinertaqanngitsumik atorunnaarsinneqassaaq.

§ 15-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 1, nr. 3 assigaa.

Aalajangersakkap atuilerneratigut sanatitsisoq namminersortoq nammineerluni inissianik nutaanik, piginneqatigiilluni inissiatillit peqatigiiffiannut tunniunneqartussanik sanaartornissamik aallartitsisinnaavoq. Sanatitsisup namminersortup inissianik piginneqatigiilluni inissiatillit peqatigiiffiannut tunniussinnginnermini sanaartornermik aallartitsinissani piumanerusinnaavaa, sanatitsisup namminersortup taamaaliornermigut sanaartornerup aallartinnerani piginneqataasut ataasiakkaat kissaatigisaanik eqqarsaatiginninnissaminut naleqqiullugu sanaartornermut aningaasartuutissat appartissimaarsinnaagamigit.

§ 16-imut

Aalajangersagaq najoqqutassatigut allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi § 10, imm. 1 aamma § 11, imm. 2 assigai.

Aalajangersakkami sanatitsisup namminersortup piginneqatigiilluni inissianik sanaartorneranut aningaasaliissutissat tamarmiusut nassuiarneqarput.

Imm. 1-imut

Aalajangersagaq naapertorlugu Naalakkersuisut kommunalbestyrelsilu tamarmik immikkut inissianik sanaartornissamut angissusissatut aningaasartassatullu killissarititaasut, imm. 2-mi aalajangersarneqartut iluanni sanaartornermi aningaasartuutissat tamarmiusut 25 %-iinik erniaqanngitsunik akilersugassaanngitsunillu taarsigassarsititsinissamik sanatitsisumut namminersortumut toqqaannartumik neriorsuuteqarsinnaapput.

Imm. 2-mut

Aalajangersakkami matumani Naalakkersuisut kommunalbestyrelsillu sanaartornermut aningaasartuutissat tamarmiusut 25 %-iinik taarsigassarsititsinissamik neriorsuuteqarnissaannut killissarititaasut aalajangersarneqarput. Inissiap annertussusaata tapiiffigineqarsinnaatitaasup annerpaaffissaa 110 kvadratmeterinut killilerneqarpoq, aammalu sanaartornermut aningaasartuutissat tapiiffigineqarsinnaatitaasut annerpaaffissaat kvadratmeterimut 19.100 koruuninut killilerneqarluni. Naalakkersuisut kommunalbestyrelsilu killissarititaasut taakku iluanni sanaartornermut aningaasartuutissat tamakkiisut 25 %-iinik taarsigassarsititsinissamik neriorsuuteqarsinnaapput.

Tassalu Namminersornerullutik Oqartussat kommunilu tamarmik immikkut annerpaamik kvadratmeterimut 4.775 koruuninik (= 19.100 koruunit 25 %-iinik), aamma annerpaamik 110 kvadratmeterinut taarsigassarsititsinissaapput. Taamaattumik Namminersornerullutik Oqartussat aamma kommuni piginneqatigiilluni inissiamik ataatsimik sananermut annerpaamik 525.250 koruuninik (4.775 koruunit 110 kvadratmeterinut amerlisillugit) taarsigassarsititsinissaapput. Piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi killiliussat 105 kvadratmeterinut aamma kvadratmeterimut 15.000 koruuninut aalajangersarneqarsimapput, taamaattumillu Namminersornerullutik Oqartussat kommunillu taarsigassarsiarititassaasa annerpaaffissaat 525.000 koruuniullutik ((15.000 koruunit 105 kvadratmeterinut amerlisillugit) 33 1/3 %-iinik).

Imm. 3-mut

Aalajangersagaq nutaajuvoq, taassumalu atuutilerneratigut imm. 1 naapertorlugu neriorsuummik tunniussinissamut sanatitsisup namminersortup sanaartornermut aningaasartuutissanit tamakkiisunit sinneruttunik nammineerluni aningaasalersuinissaa piumasarineqarluni.

Imm. 4-mut

Aalajangersagaq nutaajuvoq, tassanilu piginneqatigiilluni inissiatillit peqatigiiffiat taarsigassarsititsinissamik neriorsuummik atuisussarpiaasoq erseqqissarneqarpoq, sanatitsisup namminersortup inissiat piginneqatigiilluni inissiatillit peqatigiiffiannut tunniunnerini Naalakkersuisut kommunalbestyrelsillu taarsigassarsinissamik neriorsuutaat tunniutissallugu pisussaaffigimmagu.

§ 17-imut

Aalajangersagaq nutaajuvoq.

Imm. 1-imut

Aalajangersakkap atuutilerneratigut sanatitsisup namminersortup inissianik sanaartornissamut taarsigassarsititsinissamut neriorsuummik qinnuteqaat kommunalbestyrelsimut nassiuttussaavaa.

Imm. 2-mut

Aalajangersakkami taarsigassarsitinneqarnissamik qinnuteqaammut suut ilanngunneqassanersut aalajangersarneqarpoq. Pilersaarusiamut nassuiaat, inissiat amerlassusissaannik inissiallu annertussusissaannik tamakkiisunik paasissutissartalik taarsigassarsinissamik qinnuteqaammut ilanngunneqassaaq. Taassuma saniatigut sananermi sanaartornermut aningaasartuutit tamakkiisut takussutissiornerat qinnuteqaammut ilanngunneqassaaq. Aamma kommunalbestyrelsimut nunaminertamik tunineqarnissamut neriorsuutaagallartoq, kiisalu sanatitsisup namminersortup nammineerluni sanaartornermut aningaasartuutinit tamakkiisunit sinneruttunut akiliisinnaaneranut uppersarsaat ilanngunneqassaaq. Sanatitsisup namminersortup nammineerluni aningaasaliissutissaanut uppersarsaat assersuutigalugu tassaasinnaavoq sanatitsisup namminersortup aningaaserivianit uppersarsaat.

§ 18-imut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi § 13, imm. 3-mut aamma § 16, imm. 2-mut ilaatigut assingusuulluni.

Imm. 1-imut

Aalajangersakkap atuutilerneratigut kommunalbestyrelsip taarsigassarsinissamik qinnuteqaat siulliulluni suliarisussaavaa, taamaattumillu taarsigassarsiasatut qinnuteqaatigineqartut akuerineqassanersut isummerfigisussaallugu.

Imm. 2-mut

Aalajangersakkap atuutilerneratigut piffissami sanatitsisup namminersortup qinnuteqaammik kommunalbestyrelsimut nassiussiffigisaata nalaani sanasussanut akigitinneqartussat pillugit pisussaaffiliisumik isumaqatigiissusiortoqarsimangippat, imaluunniit sanaartorneq aallartissimangippat aatsaat kommunalbestyrelsi taarsigassarsititsinissamik neriorsuuteqarsinnaavoq. Taamatuttaaq sanaartornermi sanaartornermut pilersaarusiormullu inatsit, piffissami sanaartorfiusumi atuuttoq malinneqarnersoq kommunalbestyrelsip misissussavaa.

§ 19-imut

Aalajangersagaq nutaajuvoq.

Imm. 1-imut

Aalajangersakkap atuutilerneratigut kommunalbestyrelsip taarsigassarsinissamik qinnuteqaammik akuersinermini, tamanna pillugu Naalakkersuisut nalunaarfigissavai.

Imm. 2-mut

Aalajangersagaq malillugu kommunalbestyrelsi taarsigassarsititsinissamik neriorsuuteqarsimatillugu sanatitsisoq namminersortoq Naalakkersuisunit taarsigassarsitinneqarnissamik neriorsuuteqarfigineqarnissaminik pisinnaatitaaffeqarpoq. Sanatitsisup namminersortup taamaalilluni taarsigassarsiarititassanik tamakkiisunik (50 %) akuerineqarnissaa itigartinneqarnissaaluunniit qulakkeerreqarpoq, tak. § 16 imm. 1.

§ 20-mut

Aalajangersagaq nutaajuvoq, najoqqutassatigullu allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi § 9, imm. 2 assigalugu.

Imm. 1-imut

Aalajangersakkap atuutilerneratigut Naalakkersuisut kommunalbestyrelsilu tamarmik immikkut sanatitsisumut namminersortumut neriorsuummik allakkiussapput, tassanilu taarsigassarsiarititassat angissuserigallagassaat taarsigassarsinissamullu atugassarititaasutt allassimassapput. Taarsigassarsinissamik qinnuteqaat kommunalbestyrelsimit akuerineqarpat, aamma Namminersornerullutik Oqartussat taarsigassarsititsissapput.

Imm. 2-mut

Aatsaat sanaartornermut naatsorsuutit inaarutaasut uppersarsarneqarsimasut pigineqalerpata, taarsigassarsiarititassat inaarutaasumik annertussusissaat naatsorsorneqarsinaalissaaq. Inuup allap attuumassuteqanngitsup sanaartornermut naatsorsuutinik, inaarutaasumik uppersarsarneqarsimasunik suliaqarnissaa atsiuinissaalu taarsigassarsisup akisussaaffigaa. Sanaartornermut naatsorsuutit assersuutigalugu aningaasalersuinermi siunnersortimit, kukkuneruisuimit, sanatitsisumut siunnersortimit sanasumilluunniit sanaartornermut isumaginnittuusimasumit atsiorneqarsinnaapput.

Imm. 3-mut

Aalajangersagaq taarsigassarsinissamik qinnuteqartup aningaasartuutitut missingersuutaasa, Naalakkersuisut kommunalbestyrelsillu taarsigassarsinissamik neriorsuuteqarnerannut tunngaviusimasut aammalu sanaartornermut aningaasartuutit inaarutaasut tamakkiisullu akornanni assigiinngittoqarneranut tunngasuuvoq.

Taarsigassarsisup tunngavissaqanngitsumik kinguarsaanertaqanngitsumik assigiinngissut taarsigassarsititsisumut nalunaarutigissavaa. Taarsigassarsisoq taamaalilluni qisuariaateqarnissamut pisussaaffilerneqarpoq, taannalu tunngavigalugu taarsigassarsisoq nalinginnaasumik aningaasartuutissanut missingersuutit aningaasartuutissarpiaallu tamakkiisut akornanni assigiinngittoqarneranik paasisaqarnerminiit qaammatip ataatsip iluani tamanna taarsigassarsititsisumut nalunaarutigisariaqassavaa. Sanatitsisorli namminersortoq aningaasartuutissat taarsigassarsitinneqarnissamut pisinnaatitaaffigineqartut 50 %-ii sinnerlugit taarsigassarsitinneqarnissamik piunasaqarsinnaanngilaq.

§ 21-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 9, imm. 3-p immikkoortuata aappaa pingajuallu, aamma § 9, imm. 4 aamma imm. 5 assigai.

Naammassinninnissamut atuilernissamullu piffissaliussat eqqarsaatigalugit piffissaliussamik naatsorsuinissamut Namminersornerullutik Oqartussat neriorsuutit allakkiaat tunngavigineqassaaq, Namminersornerullutik Oqartussat neriorsuutaat kingulliulluni tunniunneqartarmat.

Imm. 1-imut

Aalajangersakkami taarsigassarsititsinissamik neriorsuutit allakkiaat atorineqarnissaasa atorunnaarsinneqarnissaasaluunniit qulakkeerneqarnissaa siunertarinearpoq. Naalackersuisut neriorsuutit allakkiorneranni, taarsigassarsiarititassat akuerineqartut Sanaartugassanut Iluarsagassanullu Aningaasaateqarfimmut nuunneqassapput. Piginneqatigiilluni inissiat naammassineqarnerini aammalu piginneqatigiilluni inissiatillit peqatigiiffiannut pisinissamut isumaqatigiissutip atsiorneqareernerani Namminersornerullutik Oqartussat taarsigassarsiarititassat tunniunneqassapput. Sanaartorneq naammassineqanngippat, taarsigassarsiarititassat akuerisat aningaasaateqarfimmit peerneqarnissaat siunertanullu allanut atorineqarsinnaalernissaat pingaaruteqarpoq. Kommunalbestyrelsip Naalackersuisutulli aningaasat piginneqatigiilluni inissialiortiternissamut aallartinneqanngitsumut taarsigassarsititsinissamik neriorsuuteqarnikkut immikkoortinneqarsimasut atorsinnaanissaat soqutigisaraa.

Imm. 2-mut

Aalajangersakkap atuutilerneratigut sanatitsisup namminersortup sanaartornerup, sanatitsisup taarsigassarsiffigisimasaata aallartinneqarsimanera sanatitsisup namminersortup Naalackersuisunut uppersartussaavaa. Tamanna pisimangippat siumut ilisimatitsinertaqanngitsumik taarsigassarsiarititassat atorunnaassapput

Imm. 3-mut

Aalajangersakkap atuutilerneratigut neriorsuutitut allakkiap ullulernerqarneraniit ukiut pingasut qaangiutsinnagit sanatitsisoq namminersortoq atuilernissamut akuersissutip assilineranik Naalakkersuisunut nassiussissaaq, tamannalu pinngippat siumut ilisimatitsinertaqanngitsumik taarsigassarsiarititassat atorunnaassapput.

Imm. 4-mut

Aalajangersakkap atuutilerneratigut Naalakkersuisut sanaartornermik kinguartoortoqartillugu, imm. 1-imi piffissaliussanik uniuissinnaanermut immikkut ittumik akuersissuteqarsinnaapput. Immikkut ittumik akuersissuteqarsinnaaneq piginneqatigiilluni inissialiorneq sanaartorerup naammassingajalereerneranut killissimatillugu aammalu atuilernissamut akuersissutip suliarineqarnissaa taamaallaat utaqqineqartillugu atorneqartarnissaa eqqarsaatigineqarpoq. Aalajangersakkami siunertaq pingarneq tassaavoq, aningaasat Sanaartugassanut Iluarsagassanullu Aningaasaateqarfimmut nuunneqarsimasut, sanaartukkamut piffissamik annikitsumik uniuuttuuffiulaarsimasunut, taamaakkaluatorli naammassineqartussanut atorneqarnissaasa qulakkeerneqarnissaa. Kommunalbestyrelsip Naalakkersuisutulli kommunip aningaasaataasa piginneqatigiilluni inissialiornissamut immikkoortinneqarsimasut, siunertamut tassunga atorneqarnissaat soqutigisaraa. Sanaartorneq aallartinneqarsimappat aatsaat sanaartornermik kinguaattoortoqarsinnaavoq, kisiannili sanaartorneq aallartinneqarsimanngippat neriorsuut siumut ilisimatitsinertaqanngitsumik atorunnaarsinneqassaaq.

§ 22-mut

Aalajangersagaq nutaajuvoq.

Imm. 1-imut

Sanatitsisup namminersortup kingusinnerpaamik atuilernissamut akuersissutip suliarineqarnerani inissiat piginneqatigiilluni inissiatillit peqatigiiffiannut ataatsimut pisinermut akiusumik, sanatitsisumit namminersortumit aalajangerneqartumik tamakkiisumik akilersillugit tunniussimassavai. Taamatut pisoqanngippat aammalu Naalakkersuisut allamik aalajangiinnngippata, taarsigassarsititsinissamik neriorsuut atorunnaassaaq. Ajornartoortoqartillugu, assersuutigalugu piginneqatigiilluni inissiatillit peqatigiiffianni ilaasortanngortussat katersorneqarsimagaluarlutik atuilernissamut akuersissutip suliarineqarneraniit aatsaat sapaatit akunnerata ataatsip qaangiunnerani piginneqatigiilluni inissiatillit peqatigiiffiannik pisortatigoortumik pilersitsisimappata, Naalakkersuisut allamik aalajangiisinnaapput.

Sanatitsisup namminersortup inissiat pisiarineqarnerinut akigititassaq tamakkiisoq, taamaalillunilu kvadratmeterimut akiusoq aalajangersimasoq aalajangissavaa. Taamaalilluni tassani piginneqataassutit ataasiakkaat akiisa, inissiat angissusaasa allanngorarnerat pequtaalluni aammalu piginneqataassutinut ataasiakkaanut naligititaasunik naleqqussanerup kingunerisaanik, allanngorarsinnaanerut isummerfigineqanngilaq.

Piffissami, inissiat piginneqatigiilluni inissiatillit peqatigiiffiannut tunniunneqarfianni, sanatitsisup namminersortup inuillu piginneqatigiilluni inissiatillit peqatigiiffiannik pilersitsiniartut inissianillu tunniussivigineqartussat akornanni, sananerup ingerlanneqarneranili attaveqatigiittoqalereersimanissaa ilimagineqarsinnaavoq. Taamaalilluni aamma piginneqataassutitut ataasiakkaanut naligititaasussanik naleqqussaasoqassanersoq isummerfigineqareersimasinnaavoq, piffissami pilersitsiviusumi piginneqatigiilluni inissiatillit peqatigiiffiisa inissiaataasa ataasiakkaat ilusissaat inissaallu eqqortumik ilisimaneqalereersimasussaammata.

Imm. 2-mut

Aalajangersakkap atuutilerneratigut pisinissamut akiusumut tamakkiisumut minnerpaamik pisinermut atatillugu aningaasartuutissat tamarmik ilaatinneqassapput. Piginneqataasut ataasiakkaat illersorneqarnissaat tassaniippoq, tassuunakkut pisinissamut akiusoq paasinartumik isummerfigisinnaalereersimassagamikku, taamaalillutillu akiusoq appasittutut isumaqarfigineqarsinnaagaluartoq, sanatitsisup piginnittuunermut uppersaatip naqissuserneqarneranut, aningaasaqarnermut aningaasalersuinernullu siunnersorteqarnermut il.il. aningaasartuutinik ilassuteqarnissamut imminut pisinnaatitaaffilerluni akiusumut ilassuteqarniarnera pissutigalugu tupaallaatigisussaanaq.

Kisiannili pisinermut akiusumit tamakkiisumit aningaasartuutinit qanoq annertutigisut sanaartornerpiamut aattuumassuteqarnersut nassuiaatigissallugu sanatitsisoq pisussaataaangilaq. Sanatitsisup sanaartornermi iluanaarutissanik pisinermut akiusumut ilanngussisimanera tamatumunnga pissutaavoq, sanatitsisullu taakku annertussusaasa ilisimatitsissutiginnissaat pisussaaffiginnigilaa. Assersuutigalugu allaffissornermut aningaasartuuteqartoqarsimannigippat, taakku sanaartornermut aningaasartuutitut ilanngunneqassanngillat.

§ 23-mut

Aalajangersagaq nutaajuvoq.

Aalajangersakkami piffissami tunniussiffiusumi piginneqataassutsit tamarmik piginneqataasunit atsiorneqarsimanissaat, taamaalillunilu piginneqatigiilluni inissiatillit peqatigiiffiata inissianut aningaasalersuutissanik realkredittimit taarsigassarsinissamut periarfissaqarnissaat qulakkeerniarneqarpoq.

Taamaattumik aalajangersakkami neqeroorfissat arlaliutinneqarput, taakkununga Namminersornerullutik Oqartussat, kommuni kiisalu sanatitsisoq namminersortoq ilaatinneqarlutik. Taamaalilluni aalajangersakkami piginneqatigiilluni inissiatillit peqatigiiffianni inissianut piginneqataassutitut atsiorneqanngitsut sinneqarnissaat pinngitsoorniarneqarpoq.

Imm. 1-imut

Aalajangersakkami inissiat sanatitsisumit namminersortumit sananeqartut piginneqatigiilluni inissiatillit peqatigiiffianni ilaasortanit amerlaneroriataarnissaat maleruagassiuunneqarpoq. Taamatut pisoqartillugu kommunip piginneqataassutinik inuttaqanngitsunik tigusinissaa kommunalbestyrelsimut neqeroorutigineqassaaq.

Imm. 2-mut

Kommunip piginneqataassutinik inuttaqanngitsunik tigusaqarnissani kissaatiginngippagu, aalajangersakkap atuutilerneratigut Namminersornerullutik Oqartussat piginneqataassutinik inuttaqanngitsunik tigusinissamik neqeroorfigineqassapput.

Imm. 3-mut

Tassanissaaq Namminersornerullutik Oqartussat piginneqataassutinik inuttaqanngitsunik tigusaqarnissartik kissaatiginngippassuk, aalajangersakkap atuutilerneratigut sanatitsisoq namminersortoq nammineerluni piginneqatigiilluni inissiatillit peqatigiiffiannut piginneqataalissaaq.

§ 24-mut

Aalajangersagaq nutaajuvoq, tassanilu kommunip, Namminersornerullutik Oqartussat imaluunniit sanatitsisup namminersortup piginneqataassutinik inuttaqanngitsunik tigusisarnerat maleruagassiuunneqarpoq. Piginneqataasussanik naammattunik pissarsisoqarsinnaanngippat aatsaat taamatut pisoqarsinnaavoq.

Imm. 1-imut

Aalajangersakkap atuutilerneratigut kommuni, Namminersornerullutik Oqartussat imaluunniit sanatitsisoq namminersortoq piginneqataalernerminni, peqqussummi allassimasut saniatigut piginneqatigiilluni inissiatillit peqatigiiffiata ingerlanneqarneranut sunnuteqarnissamut piunasaqarsinnaanngillat. Taamaattumik pingaarnertut piginneqatigiilluni inissiatillit peqatigiiffiata ataatsimeersuartitsinerani aalajangiisoqassatillugu kommuni, Namminersornerullutik Oqartussat imaluunniit sanatitsisoq namminersortoq piginneqataassutit amerlaqataannik taasisinnaatitaapput.

Imm. 2-mut

Aalajangersakkap atuutilerneratigut kommuni, Namminersornerullutik Oqartussat imaluunniit sanatitsisoq namminersortoq piginneqataassutinut atuisinnaatitaaffigisaminnut ineqarnermut akiliummik akiliisartussaapput. Kisiannili kommunip, Namminersornerullutik Oqartussat imaluunniit sanatitsisup namminersortup inissianik attartortitsisarneq pillugu maleruagassat sukkulluunniit atuuttut naapertorlugit inissianik attartortitsinissaq pisinnaatitaaffigaat. Kommunalbestyrelsip Naalakkersuisullu, imaluunniit sanatitsisup namminersortup illuutini attartortittakkanik inissiartaqartuni, namminersortunit pigineqartuni

anigaasartuutit tunngavigalugit ineqarnermut akiliutissamik naatsorsuisarnermut maleruagassat naapertorlugit ineqarnermut akiliut naatsorsussavaat.

Imm. 3-mut

Aalajangersakkap atuutilerneratigut kommuni, Namminersornerullutik Oqartussat imaluunniit sanatitsisoq namminersortoq pisussaapput, piginneqataassutit inunnut, piginneqatigiilluni inissiatillit peqatigiiffiata akuersineratigut piginneqatigiilluni inissiatillit peqatigiiffianni ilaasortannqortinneqarsinnaasunut tunniunneqarnissaat anguniassallugu.

§ 25-mut

Aalajangersagaq nutaajuvoq.

Imm. 1-imut

Aalajangersakkap atuutilerneratigut Naalakkersuisut kommunalbestyrelsillu taarsigassarsititsinissamik neriorsuutaat piginneqatigiilluni inissiatillit peqatigiiffiannut tunniunneqassapput. Tamatumuunakkutaaq taarsigassarsitinneqartussavik tassaamat piginneqatigiilluni inissiatillit peqatigiiffiat, aammalu sanatitsisup namminersortup tunngaviatigut piffissami sanaartorfiusumi taarsigassarsinissamik neriorsuummik paarisqaannarsimanagera erseqqissarneqarpoq.

Imm. 2-mut

Aalajangersakkami pisortanit taarsigassarsiarititassat akuerineqarnissaannut piginneqataasup nammineerluni sanaartornermut anigaasartuutit tamakkiisut 5 %-iilik anigaasanngorlugit akiliisinnanissaata piumasarineqarnera erseqqissarneqarpoq. Piginneqataasup assersuutigalugu anigaasaliissutissat 5 %-ii, anigaasanngorlugit akiligassani anigaaserivimmit taarsigassarsinermigut akilersinnaavai. Aalajangersakkami allassimanagera malillugu 5 %-it taakku pisinermut akiusoq, imaluunniit § 49, imm. 2 naapertorlugu inissianut ataasiakkaanut naligititaasoq naleqqussarneqartoq tunngavigalugit naatsorsorneqassapput. Piginneqatigiilluni inissiatillit peqatigiiffiat piginneqataassutininut ataasiakkaanut naligititaasunik naleqqussaasimangippat, inissiallu angeqqatigiippata, piginneqataasup nammineerluni aallaqqaatissatut akiliutissai piginneqataasunut tamanut atuuttumik assigiimmik annertussuseqassaaq. Kisiannili naleqqussaasoqarsimappat, nammineerluni aallaqqaatissatut akiliutissat annertussusaat assigiissanngillat.

Matuma kinguliani assersuut tamatumunnga takussutissaavoq:

Piginneqataassut 1 = inissiamut naligititaasoq 1,2.

Piginneqataassut 2 = inissiamut naligititaasoq 0,8.

Sanaartornermut aningaasartuutit kvadratmeterimut = 17.500 koruunit.

Piginneqataassummut 1-imut kvadratmeterimut nammineerluni aallaqqaatissatut akiliutissat 5 %-iusut = $(17.500 \times 1,2 \times 0,05 = 1.050$ koruunit).

Piginneqataassummut 2-mut kvadratmeterimut nammineerluni aallaqqaatissatut akiliutissat 5 %-iusut = $(17.500 \times 0,8 \times 0,05 = 700$ koruunit).

Imm. 3-mut

Aalajangersakkami piginneqatigiilluni inissiatillit peqatigiiffiata aningaasalersuutissanit sinneruttunik taarsigassarsinikkut akiliinissaa aalajangersarneqarpoq. Piginneqatigiilluni inissiatillit peqatigiiffiat nalinginnaasumik realkreddittimit taarsigassarsissaaq. Peqqussummut atuuttumut naleqqiullugu piginneqatigiilluni inissiatillit peqatigiiffiata sanaartornermut aningaasartuutissanit sinneruttunik allanit pissarsilluni aningaasalersuisinnaaneranut aningaasatigut killissarititaasut atorunnaarsinneqarput.

§ 26-mut

Aalajangersagaq nutaajuvoq.

Imm. 1-imut

Aalajangersakkami sanatitsisup namminersortup inissianik tunniussisimanera pillugu Naalackersuisut kommunalbestyrelsillu nalunaarfigineqarnissaat aalajangersarneqarpoq. Sanatitsisup namminersortup piginneqatigiilluni inissianik sanaartornissaanut taarsigassarsititsinissamik neriorsuummik tunniussisoqarsinnaanersoq Naalackersuisut aamma kommunalbestyrelsip isummerfigereersimavaat. Taamaattumillu piginneqataasut aamma piginneqatigiilluni inissiatillit peqatigiiffiata aningaasalersuutissanit sinneruttut isumannaareersimappasigit taarsigassarsiat tunniunneqarsinnaanersut Naalackersuisut aamma kommunalbestyrelsip isummerfigissanngilaat.

Imm. 2-mut

Aalajangersakkami nalunaarummut pilersitsinermi isumaqatigiissutip, piginneqatigiilluni inissiatillit peqatigiiffiata malittarisassaasa, pisinissamut isumaqatigiissutip atsiorneqarsimasup aamma nammineerluni aningaasalersuutissanut uppernarsaatip ilanngunneqarnissaat taaneqarpoq.

§ 27-mut

Aalajangersakkap najoqqutassatigut allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 10, imm. 3 aamma imm. 4 assigai.

Imm. 1-imut

Aalajangersakkami pisortat annertussusissatut aningaasartassatullu aalajangersarneqartut iluanni sanaartornermut aningaasartuutit tapiiffigineqarsinnaatitaasut tamarmiusut katillugit 50 %-iinut taarsigassarsiarititassaasa, siusinnerpaamik inissiat naammassineqareerpata aammalu aatsaat atuilernissamut akuersissummik, pisinissamik isumaqatigiisummik atsiorsimasumik, qularnaveeqqusiussaqaarluni taarsigassarsinermi allagartap naeqqaarneranik nalunaarsorsimasumik naqissuserneqarsimasumillu, kiisalu sillimmasiisummik saqqummiussaqaarnikkut tunniunneqarsinnaanerat aalajangersarneqarpoq. Piginneqatigiilluni inissiatillit peqatigiiffiata nammineq imaluunniit piginneqatigiilluni inissiatillit peqatigiiffiata eqqartuussissuserisuata, aningaaseriviata allanulluunniit siunnersortaata qularnaveeqqusiussaqaarluni taarsigassarsinermi allagartap suliarineqarnissaa isumagissavaa, tassunga ilanngullugu qularnaveeqqusiussaqaarluni taarsigassarsinermi allagartap Namminersornerullutik Oqartussanut kommunimullu, taarsigassarsiassanik tunniussisussanut saqqummiunneqaqnginnerani Akileraartarnermut Pisortaqaarfimmit naqissuserneqarnissaa aamma Kalaallit Nunaanni Eqqartuussivimmi nalunaarsorneqarnissaa isumagissallugu.

Imm. 2-mut

Aalajangersakkami Namminersornerullutik Oqartussat kommunillu taarsigassarsiarititaasa piginneqatigiilluni inissiatillit peqatigiiffiata illuutaa qularnaveeqqusiullugu akilernerqartussanik tulleriinnilersuinermi ingiaqatigiittussangorlugit inissillugit qulakkeerneqarnissaat aalajangersarneqarpoq. Taarsigassarsianut qularnaveeqqut, illu qularnaveeqqusiullugu pisinermut akigititaasumit tamakkiisumit sinneruttunut aningaasalersuutissatut taarsigassarsiarititaasimasut akilereernerini akilernerqartussatut inissisimassapput, tak. § 25, imm. 3.

Qularnaveeqqusiisarneq pillugu Kalaallit Nunaannut inatsit aamma qularnaveeqqusiisinnaatitaarnermut maleruagassat nalinginnaasut atorneqassapput.

§ 28-mut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi § 23-imut taartaalluni.

Aalajangersakkami agguaqatigiisitsilluni naatsorsueriaaseq, piginneqatigiilluni inissiap kvadratmeterimut akianik naatsorsuinermi atorneqartartoq nassuiarneqarpoq. Piginneqatigiilluni inissiap inigisap annertussusaanut kvadratmeterimut akia, agguaqatigiisitsilluni naatsorsueriaaseq malillugu piginneqatigiilluni inissiat tamakkerlugit pisinermut akiusup piginneqatigiilluni inissiami inigisap kvadratmeterinngorlugi annertussusaanut ataatsimoortumut agguarneqarneratigut nassaarineqassaaq.

Piginneqatigiilluni inissiat ataasiakkaat kvadratmeterimut akiisa agguaqatigiissitsilluni naatsorsueriaaseq atorlugu naatsorsorneqartarnerisigut, inissiani tamani kvadratmeterimut akiusup assigiinnissaa qulakkeerneqarpoq. Piginneqatigiilluni inissiatillit peqatigiiffiisa ilaat, piginneqatigiilluni inissianik assigiinningsunik angissusilinnik sanatitsisumit namminersortumit pisisarput. Assersuutigalugu inissiat 95 kvadratmeterinik angissusillit arfinillit aamma inissiat 120 kvadratmeterinik angissusillit sisamat, katillugit 1050 kvadratmeteriusut, katillugit 15.487.500 koruuninik akeqartut sananeqarneranni, kvadratmeterimut akiusoq agguaqatigiissillugu $15.487.500 / 1050 = 14.750$ koruuniussaaq. Tamatuma kingorna piginneqatigiilluni inissiaq 95 kvadratmeterinik angissuseqartoq 1.401.250 koruuninik akeqassaaq, aammalu piginneqatigiilluni inissiaq 120 kvadratmeteriusoq 1.770.000 koruuninik akeqassalluni. Assersuusiornermili assersuutigalugu inissiat illuummi inissisimaffii pissutigalugit, piginneqataassutit ataasiakkaat nalingisa nalimmassarneqarsinnaaneri eqqarsaatigineqanngilaq.

Piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguteqartinneqartumi pisinermut akiusoq teknikkikkut aningaasaqarnikkullu naligititaasoq tunngavigalugu aalajangersarneqarpoq.

§ 29-mut

Aalajangersagaq nutaajuvoq.

Aalajangersakkap atuutilerneratigut kapitali 3-mi maleruagassat, sanatitsisup namminersortup piginneqatigiilluni inissianik, piginneqatigiilluni inissiatillit peqatigiiffiannut tunniunneqartussanik sananeranut tunngasut, aamma Namminersornerullutik Oqartussat imaluunniit kommunip piginneqatigiilluni inissianik piginneqatigiilluni inissiatillit peqatigiiffiannut tunniussinissaq siunertaralugu sanarusussappata atorneqassapput.

Imm. 1-imut

Namminersornerullutik Oqartussat taamatullu kommuni piginneqatigiilluni inissiatillit peqatigiiffiinik, kapitali 3-mi maleruagassat naapertorlugit inissianik sanaartortussanik pilersitsisinnaapput. Namminersornerullutik Oqartussat kommuniluunniit piginneqataasutut ataatsimeersuarnermi aammalu piginneqatigiilluni inissiatillit peqatigiiffiata pilersinneqartup siulersuisuini inatsisitigut killissarititaasut iluanni pisinnaatitaaffimminnik pisussaaffimminnillu atuissapput.

Namminersornerullutik Oqartussat taamatullu kommuni tamanna tunngavigalugu piginneqatigiilluni inissiatillit peqatigiiffiata ataani sanaartornermut aningaasaliissutissanik taarsigassarsiniarnermut peqataassapput, taarsigassarsinissamik neriorsuummut atsiussallutik, sanasussanut isumaqatigiissusiussallutik aammalu aningaasalersuutissat inaarutaasut pillugit aningaaserivimmut realkredittimulluunniit isumaqatigiissuteqassallutik.

Imm. 2-mut

Aalajangersagaq manna naapertorlugu Namminersornerullutik Oqartussat imaluunniit kommuni suliassaminnut annertussusissatut aningaasartassatullu aalajangerneqartut iluanni sanaartornermut aningaasartuutit tapiiffigineqarsinnaatitaasutut aalajangersarneqarsimasut tamarmiusut katillugit 50 %-iinut erniaqanngitsunik akilersugassaanngitsunillu taarsigassarsititsisinnaapput. Aalajangersagaq Namminersornerullutik Oqartussat imaluunniit kommunip inissianik attartortittakkanik isaterillutik piginneqatigiilluni inissianik nutaanik sanaartornissaq aalajangiuppasuk aatsaat atorneqartussatut eqqarsaatigineqarpoq.

Imm. 3-mut

Aalajangersakkami killissarititaasut suut iluini taarsigassarsititsisoqarsinnaanera nassuiaatigineqarpoq.

§ 30-mut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi § 1, nr. 2, § 3, aamma § 20, imm. 1 taarserlugit.

Imm. 1-imut

Aalajangersakkap atuutilerneratigut illuummi attartortittakkanik inissartaqartumi attartortut, inissianik attartukkaminnik piginneqatigiilluni inissiatut tigusinissamik kissaateqartut, piginneqatigiilluni inissiaatillit peqatigiiffianik pilersitsisinnaapput, aammalu inissianik attartukkaminnik piginneqatigiilluni inissiatut tiguisinnaallutik. Tassani attartortut inissianik najukkaminnik kapitali 5-imi killissarititaasut iluanni piginneqatigiilluni inissiatut tigusinissamut inatsisitigut pisinnaatitaanerat pineqarpoq.

Imm. 2-mut

Aalajangersakkami attartortut inissianik attartukkaminnik piginneqatigiilluni inissiatut tiguisinnaanermut pisinnaatitaaffiitut killiliussat nassuiarneqarput, tassalu attartortut inissianik attartukkaminnik piginneqatigiilluni inissiatut tigusinissamik kissaateqartut minnerpaamik illuummi attartortittakkanik inissartaqartumi attartukkat tamarmiusut 55 %-erissavaat. Inissiami attartortut attartortitsinermut isumaqatigiisummi allassimasut qanorluunniit amerlatigigaluarpata, inissiami ataatsimi attartortoq ataaseq kisimi naatsorsuutigineqassaaq. Illuutip piginnittua, tiguserup kingorna inissianik suli attartortunit, inissianik attartukkaminnik piginneqatigiilluni inissiatut tigusinissamik kissaateqanngitsunit najugaqarfigineqartunik aqutsisuusussaq eqqarsaatigalugu piumasaqaat ikkunneqarpoq.

55 %-inik piunasaqaateqarnerup naatsorsuiffigineqarnerani ammut qummulluunniit akunnaallisaasoqassanngilaq. Assersuutigalugu 13-iusunit arfineq marluk 53,84 %-inik naatsorsorneqassapput, taamaattumillu 55 %-inik piunasaqaateqarnermut naammannatik. Aqqaniliusunit arfinillit 54,54 %-inik naleqarput, taamaattumillu 55 %-inik piunasaqaateqarnermut naammannatik.

Imm. 3-mut

Aalajangersakkap atuutilerneratigut illuummi attartortittakkanik inissiaartaqartumi attartortut tamarmik, piginneqatigiilluni inissiaatillit peqatigiiffianni ilaasortanngornissamut allakkatigut neqeroorfigineqassapput. Tamatumuunakkutaaq piginneqataassutit, Namminersornerullutik Oqartussanit imaluunniit kommunimit aqunneqalersussat ikilisinniarnearput. Suliniut nalinginnaasumik attartortumit ataatsimit amerlanerusunilluunniit, aallaqqaammut attartortunut allanut attaveqarlutik inissianik attartukkaminik piginneqatigiilluni inissiatut tigusinissamik soqutiginninersut tusarniaasimasunit aallartinneqartarpoq. Suliassamik aallarniisut amerlanerussuteqarnissaq pisariaqartoq anguniarlugu attartortunut tamanut aperinissaq soqutigisarissavaat.

Imm. 4-mut

Aalajangersakkami inissiat qanoq ittut piginneqatigiilluni inissiatut tiguneqarsinnaannginnersut taagorneqarput.

§ 31-mut

Aalajangersakkap ilaa nutaajuvoq, imm. 1-ip aamma imm. 3-ip piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 19, imm. 1 aamma imm. 3 tamakkiisumik assigai.

Imm. 1-imut

Aalajangersakkami illuutip allanngortinnagu tiguneqarnissaa aalajangersarneqarpoq. Illuut tamarmiusoq piginneqatigiilluni inissiaatillit peqatigiiffiannut tunineqassaaq. Piginneqatigiilluni inissiaatillit peqatigiiffiat assersuutigalugu illuummi inissiat affaannut piginnittussaataalersinnaanngilaq.

Imm. 2-mut

Aalajangersakkami imm. 1-mi pineqartunik ilaatinneqanngitsoorsinnaasunik imaqarpoq, tassanimi inissiat ilaat illutut immikkoortuuppata taakku tiguneqarsinnaapput.

Imm. 3-mut

Aalajangersakkami piginneqatigiilluni inissiatillit peqatigiiffiata illuutit arlallit ataatsimoortutut inissisimappata, illuutinik immikkoortunik arlalinnik pisisinnaanera aalajangersarneqarpoq. Illuutit inissisimaffiminni ungasissusiat kiisalu assersuutigalugu torsuusanik atassusigaanerat imm. 1-imi pineqartumik saneqqussisinnaanermik naliliiniarnermut pingaaruteqassapput.

§ 32-mut

Aalajangersagaq nutaajuvoq, tassanilu piginneqataalersussat sumut qinnuteqartarnissaat erseqqissarneqarpoq.

Aalajangersakkami inissiat attartortittakkat piginneqatigiilluni inissiatut tiguneqarnissaannut qinnuteqaatit, illuutip arlaannit pigineqarnera apeqqutaalluni, Namminersornerullutik Oqartussanut imaluunniit kommunimut nassiunneqartarnissaa nassuiarneqarpoq. Tamatuma saniatigut qinnuteqaammut suut ilanngunneqartassanersut nassuiarneqarpoq. Ilangussassat tamarmik ilanngunneqartarnissaat pingaaruteqarpoq, tassami taamaattoqanngippat Naalakkersuisut kommunalbestyrelsilluunniit qinnuteqaatip suliarineqarnissaa itigartissinnaavaat, aammalu tamatumunnga taarsiullugu qinnuteqartoq ilanngussassat eqqortut ilanngullugit qinnuteqaammik nassiusseqqinnissaanik qinnuigisinnaallugu.

§ 33-mut

Aalajangersakkap najoqqutassatigut allannguuteqartinneqarluni ilaatigut piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 22 assigaa.

Imm. 1-imut

Aalajangersagaq naapertorlugu Namminersornerullutik Oqartussat taamatullu aamma kommuni pisussaapput, imm. 1 naapertorlugu qinnuteqaatip tigungerani illuut attartortittakkanik inissiartaqartoq ornillugu misissussallugu. Taamatut misissuineq teknikkikkut aningaasaqarnikkullu naliliissutip suliarineqarnissaa siunertaralugu ingerlanneqassaaq. Piginneqatigiilluni inissiatillit peqatigiiffia akigititassamik aalajangiinermi oqimaaqatigiissitsinissaaq siunertaralugu, tassungalu ilanngullugu illuutip qanoq issusia aalajangerniarlugu sanaartukkanik ilisimasalimmik, illuutip qanoq issusianik nalunaarusiortussamik atorfinitsitsissaaq.

Imm. 2-mut

Aalajangersakkami akiusussamik aalajangiinissarpiaq, teknikkikkut aningaasaqarnikkullu naliliineq illuutillu qanoq issusianut nalunaarusiaq tunngavigalugit aalajangerneqartussaaq nassuiaatigineqarpoq. Akigititassap aalajangerneqarnerata kingorna piginneqatigiilluni inissiatillit peqatigiiffiata

pisinissaanut allakkatigut neqeroorut pisariaqanngitsumik kinguarsaanertaqanngitsumik nassiunneqassaaq.

Imm. 3-mut

Aalajangersakkami pisinissanut neqeroorutip, piginneqatigiilluni inissiatillit peqatigiiffiannut nassiunneqartup aamma illuummik tuniniarneqartumik qularnaveqqusiiffiusimasut pisinnaatitaaffigisinnaasaannut imaluunniit piginnittumut immikkut piumasarisat pillugit paasissutissanik imaqarnissaa nassuiaatigineqarpoq.

Piginneqatigiilluni inissiatillit peqatigiiffiata illuummik pisinerminut atatillugu, pisinermut akiusup tamakkiisup ilaatut, illuut qularnaveqqusiullugu akiitsunik tigusinissani akuerisariaqarpaa.

§ 34-mut

Aalajangersagaq nutaajuvoq.

Imm. 1-imut

Aalajangersakkami sanaartukkanik ilisimasallip sanaartukkanik misissuisarnermik sanaartukkanillu pilersarusiornermik misilittagaqarsimanissaa aalajangersarneqarpoq. Taamatuttaaq sanaartukkanik ilisimasallip illuummut immikkut ittumik attuumassuteqannginnissaa piumasarineqarpoq, tamannalu ilaatigut paasineqassaaq sanaartukkanik ilisimasalik sanaartukkap suliarineqarnerani ingerlanneqarneraniluunniit piginnittut, entreprenuritut, siunnersortitut imaluunniit nakkutilliisutut attuumassuteqartuusimassanngitsoq attuumassuteqassaniluunniit. Aamma sanaartukkanik ilisimasalik illuummi attartortutut inissisimassanngilaq. Kisiannili sanaartornermik ilisimasallip sanaartukkap suliarineqarnerani ingerlanneqarneraniluunniit piginnittut, entreprenuritut, siunnersortitut imaluunniit nakkutilliisutut attuumassuteqartuusimasumi attuumassuteqartumiluunniit atorfeqartuusimanissaa akornutissartaqartinneqanngilaq.

Sanaartukkanik ilisimasallip piginneqatigiilluni inissiatillit peqatigiiffiata soqutigisai isumagissavai. Sanaartukkanik ilisimasalik piginneqatigiilluni inissiatillit peqatigiiffiat sinnerlugu suliassap suliarineqarnerani kukkunernut sumiginnaanernullu taarsiisussanngortitaasarnermut maleruagassat nalinginnaasut naapertorlugit akisussaasuvoq, taamaattumillu sanaartukkanik ilisimasalik inuussutissarsiordermi akisussaassuseqarnermut sillimmasiisimassaaq.

Imm. 2-mut

Aalajangersakkami piginneqatigiilluni inissiatillit peqatigiiffiat aningaasalersuinermi siunnersortimik, allannguinnissap ingerlanerani piginneqatigiilluni inissiatillit peqatigiiffiannut ikiuuttussamik atorfinitsitsinissamut pisussaaffilerneqarpoq. Namminersorerullutik Oqartussat imaluunniit kommunip piginneqatigiilluni inissiatillit peqatigiiffiisa siunnersorneqarnissaannut

allaffissornikkut isumalluutissarpassuarnik atuisariaqannginnerat, taamatullu suliasamat ilisimasalimmik akuutitsinikkut suliasarpiaap eqaannerusumik ingerlanneqarsinnaanissaa naatsorsuutigineqarmat piumasaqaat ilanngunneqarpoq.

§ 35-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 20, imm. 4 taarserpaa.

Imm. 1-imut

Attartortut piginneqatigiilluni inissiatillit peqatigiiffianni ilaasortanngornissamik kissaateqanngitsut periarfissaat marluupput: Inissiami najukkaminni attartortunngorsinnaapput, imaluunniit inissianik attartortitsisarneq pillugu Inatsisartut peqqussutaanni tamanna periarfissaqartinneqarpat, illoqarfinni najukkami inissiamik allamik neqeroorfigineqarnissamik qinnuteqarsinnaapput. Kingulliullugu taaneqartumi ilaatigut innersussisarnermut maleruagassat naammassineqarsimanissaat piumasarineqarpoq. Attartortut ilaasa inissiamik najukkaminnik piginneqatigiilluni inissiatut tigusinissaq imaluunniit inissiamut allamut najukkaminnut assigusumut nuunnissaq kissaatigineq ajorpaat. Attartortoq sooq inissiaq najugartik piginneqatigiilluni inissiatut tigorusunnginnerlugu imaluunniit nuukkusunnginnerluni tunngavilersuutinik saqqummiussisariaqanngilaq.

Imm. 2-mut

Aalajangersakkami Namminersornerullutik Oqartussat imaluunniit kommunip inissianut, attartortunit najugaqarfigineqaannartussanut atuisinnaatitaasutut piginneqatigiilluni inissiatillit peqatigiiffianni piginneqataalernissaat nassuiaatigineqarpoq. Tamanna piginneqatigiilluni inissiatillit peqatigiiffiata illuummik tamakkiisumik tiguisussaananeranut naapertuuppoq. Piginneqatigiilluni inissiatillit peqatigiiffiata Namminersornerullutik Oqartussat imaluunniit kommuni inissiani atuisinnaatitaaffigisaanni ineqarnermut akiliummik akiliisittassavai.

Imm. 3-mut

Aalajangersakkami attartortunit sinneruttut ineqarnermut akiliutissaasa inissianik attartortitsisarneq pillugu Inatsisartut peqqussutaat naapertorlugu aalajangerneqartarnissaat aalajangersarneqarpoq.

Imm. 4-mut

Aalajangersakkami torersaarnissaq pillugu malittarisassani aalajangersakkat, piginneqatigiilluni inissiatillit peqatigiiffiannit aalajangersarneqarsimasut aamma attartortunut, illuummi najugaqaannartunut atuuttussaananer at aalajangersarneqarpoq. Piginneqatigiilluni inissiatillit peqatigiiffianni torersaarnissaq eqqarsaatigalugu, attartortut attartortitsisuminnit, tassaasumit piginneqataasutut Namminersornerullutik

Oqartussat imaluunniit kommuni, pitsaanerusunik pisinnaatitaaffeqalersinnaangilaq. Torersaarnissamut maleruagassanik unioqqutitsineq piginneqatigiilluni inissiatillit peqatigiiffiannit ilaasortaajunnaartitsinermik kinguneqartussaassappat, tamanna taamaalilluni attartortumut toqqaannartumik atuutsinneqarsinnaavoq. Tassalu Namminersornerullutik Oqartussat kommunilluunniit piginneqataasutut ilaasortaaginnarnissartik kissaatigisunikku, ilaasortaajunnaarsinneqarnissamut pissutaasoq peertariaqarpaat. Tamanna taamaallaat inissianik attartortitsisarneq pillugu Inatsisartut peqqussutaat atuuttoq naapertorlugu attartortup attartornissamik isumaqatigiissutaata atorunnaarsinneqarneratigut pisinnaavoq. Tamatumunnga tunngavigineqartoq tassaavoq najugaqarfimmi siulersuisut piginneqatigiilluni inissiatinut allanngortitsinermut atatillugu atorunnaarsinneqartussaanagerat, aammalu tamatuma kingorna attartortitsisup najugaqarfimmi siulersuisunut suliassanngortitaasimasunik isumaginnittunngortussaanagerat, tak. illuutininik ineqarfissatut attartortitsisarneq pillugu Namminersornerullutik Oqartussat nalunaarutaanni nr. 2-mi, 6. marts 2007-meersumi § 19, imm. 2, tassanilu inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-meersumi § 50, imm. 2 naapertorlugu torersaarnissamut maleruagassanut ilassutissanik aalajangersaasinnaatitaaneq ilaavoq.

§ 36-mut

Aalajangersagaq nutaajuvoq.

Aalajangersakkami attartortut, illummi allanngortinneqartumi attartortuuginnartut piffissap qanorluunniit ilinerani inissiamik najukkaminnik piginneqatigiilluni inissiatitut tiguisinnaatitaanagerat periarfissinneqarpoq. Tassalu Namminersornerullutik Oqartussat imaluunniit kommuni attartortut kajumissaarineratigut piginneqatigiilluni inissiatillit peqatigiiffianni piginneqataassutsiminnik attartortumut tunniussinissaq pisussaaffigaat. Taamatut tunniussinissaq piginneqatigiilluni inissiatillit peqatigiiffiannit akerlilerneqarsinnaangilaq. Attartortut arlallit suliniutip aallartinnerani piginneqataalernissamut aningaasaqarnikkut periarfissaqannginnissaat naatsorsuutigineqartariaqarmat aalajangersagaq ilanngunneqarpoq. Ilaqutariit ataatsit aningaasaqarnikkut atugaat allannguuteqarsimasinnaapput, taamaattumillu aamma taakku ajornarunnaarnerani inissiamik najukkaminnik piginneqatigiilluni inissiatut tiguisinnaanissaat pingaaruteqarpoq.

§ 37-mut

Aalajangersagaq nutaajuvoq.

Imm. 1-imut

Aalajangersakkami Naalakkersuisut imaluunniit kommunalbestyrelsip inissiamut attartortittakkamut allamut innersuussinissamut pisussaaffeqarnerisa annertussusaa

naassuiaatigineqarpoq. Aalajangersakkami inissiap inoqutigiinni inuit amerlassusaannut naapertuuttuunissaa aalajangersarneqarpoq. Innersuussinermi inissianik attartortitsisarneq pillugu Inatsisartut peqqussutaanni inissianik tunniussisarnermut tunngavissat nalinginnaasut malinneqassapput.

Nutaatut attartortup nuunneranut aningaasartuutissanut naleqquttunut Namminersornerullutik Oqartussat imaluunniit kommunip akiliisarnissaa aamma aalajangersakkami aalajangersarneqarpoq. Nuunnermut aningaasartuutunut naammaginatunut assersuutigalugu nuussisartutut sulisunut aammalu inissiap qimanneqartup nalinginnaasumik iluarsaanneqarnissaanut aningaasartuutit ilaapput. Inissiaq aalajangersakkat malillugit iluarsaanneqarpat, attartortup inissiamut qularnaveequsiissutigisimasaa tamakkerlugu utertinneqattussaavoq.

Imm. 2-mut

Aalajangersakkami inissiap attartortittakkap, allannguinnissap inaarutaasumik pinissaa sioqqullugu inuerussimasup piginneqatigiilluni inissiaatillit peqatigiiffiata utaqqisunut allattuiffiani siulliusumut neqeroortigineqarnissaa aalajangersarneqarpoq. Tamannali utaqqisut allattorsimaffianni allatsissimasup inissiamik neqeroortigineqarnissamut piumasaqaatit naammassisimappagit aatsaat pisinnaavoq. Inuit utaqqisut allattorsimaffiannut allatsissimasut, inissianik inoqanngitsunik neqeroortigineqartut, ilaatigut inoqutaanni inuit amerlassusaat piginneqatigiilluni inissiaatip annertussusaanut naleqquttuussasoq, ilaatigullu pisortat inissiaataannik attartortittakkamik atuiunnaassasut piumasarineqarpoq.

Attartortut, piginneqatigiilluni inissiamut innersuunneqartut, inissianut attartortittakkanut utaqqisut allattorsimaffianni nalinginnaasumi siullertut inissisimasariaqannginnerat maleruagassamut tunngavigineqarpoq. Attartortoq pineqartoq taamaalilluni piginneqataassummik tunineqarnermigut utaqqisunit allanit siulliusinnaavoq. Taamatut salliutitsinissaq taamaallaat attartortup pineqartup inissiamik atuiunnaarneratigut akuerineqarsinnaavoq. Taamaalillunilu inissianut attartortittakkanut utaqqisut allattorsimaffianni nalinginnaasumi siulliulluni allassimasup piginneqataalersup inissiaq atorunnaagaa nuuffigisinnaavaa. Tamanna assersuutigalugu utaqqisut allattorsimaffianni allatsissimasoq piginneqatigiilluni inissiamik pingasunik initalimmik atuisinnaatitaalersinnaasoq, inissiamik attartortittakkamik taamaallaat marlunnik initalimmik tunniussinerani atorneqarsinnaavoq. Taamatut pisoqartillugu utaqqisut allattorsimaffianni tulliulluni allatsissimasumut tunngatillugu periaaseq pineqartoq atorneqassaaq. Tamannattaq pingajuusumut, sisamaasumut appasinnerusumullu atorneqassaaq, piginneqataassutip tunniunneqarnissaata tungaanut atorneqassalluni. Aatsaat utaqqisut allattorsimaffianniittut arlaannaalluunniit piumasaqaatinik naammassinissinnaanngitsoq paasineqarpat, innersuussisinnaatitaaneq Naalakkersuisunut kommunalbestyrelsimullu tunniunneqassaaq.

§ 38-mut

Aalajangersagaq nutaajuvoq.

Imm. 1-imut

Aalajangersakkami piginneqatigiilluni inissiatillit peqatigiiffiata inunnut, piginneqatigiilluni inissiatillit peqatigiiffianni piginneqataalernissamut kissaateqartunut allattuiffimmik pilersitsinissamik pisussaaffeqarnera aalajangersarneqarpoq.

Imm. 2-mut

Aalajangersakkami piginneqatigiilluni inissiaatit inuttaqanngitsut, Namminersornerullutik Oqartussat imaluunniit kommunip atuisinnaatitaaffigisaat, taamaallaat inunnut piginneqatigiilluni inissiatillit peqatigiiffiata utaqqisunut allattuiffianut allatsissimasunut neqeroorutigineqarsinnaanerat aalajangersarneqarpoq.

§ 39-mut

Aalajangersakkap najoqqutassatigut allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguteqartinneqartumi § 25, imm. 1, 3 aamma 4 assigai.

Procentit, nutaanik sanaartornermi atorneqartartut tassani atorneqarsimmamata takuneqarsinnaavoq, tamannalu aaqqissuussinerup matuma aaqqissuussinertulli taarsigassarsititsivigineqarsinnaasutut allatulli atorneqarnissaata kissaatigineqarnera tunngavigineqarpoq.

Imm. 1-imut

Aalajangersakkami piginneqatigiilluni inissiatillit peqatigiiffiata pisortat inissiaataannik attartortittakkamik pisinissaanut Namminersornerullutik Oqartussat aamma kommunip qanoq iliorlutik taarsigassarsititsinnaanerat nassuiarneqarpoq. Namminersornerullutik Oqartussat aamma kommuni pisinermut akiusup tamakkiisup 50 %-iinut erniaqanngitsunik akilersugassaanngitsunillu taarsigassarsititsisinnaasut aalajangersakkami allassimavoq. Illuutip piginnitaa 50 %-inik taarsigassarsititsisussaavoq taamaalillunilu Namminersornerullutik Oqartussanit aamma kommunimit ataatsikkut taarsigassarsititsisoqarsinnaanngilaq.

Imm. 2-mut

Aalajangersakkami pisortanit taarsigassarsiarititassat tunniunneqarnissaannut piumasaqaatit nassuiarneqarput, tassanilu piginneqataasut ataasiakkaat inissiamik atuisinnaatitaaffiligassaminnik pisinissamut akiusup 5 %-ii namminneerlutik akilissavaat.

Imm. 3-mut

Aalajangersakkami aningaasaleersuutissat tamakkiisut akunnaallisarneqarput, tassanilu piginneqatigiilluni inissiatillit peqatigiiffiat pisinermut akiusumut aningaasalersuutissanit sinneruttunik, tassalu pisinermut akiusup tamakkiisup 45 %-inik nammineerluni pissarsinissaanik pisussaaffilerneqarpoq. Tamanna nalinginnaasumik aningaaserivimmit imaluunniit kreditforeningimit taarsigassarsinikkut pisarpoq.

§ 40-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartinneqartumi § 23, imm. 1 aamma 4, aamma § 25, stk. 2 taarserpai.

Imm. 1-imut

Aalajangersakkami illuummik attartortittakkanik inissartaqartumik pisinermut akiusup qanoq iliorluni aalajangerneqartarnissaa nassuiarneqarpoq. Tassani illuutip teknikkikkut aningaasaqarnikkut nalinga aallaavigineqassaaq, taannalu illuutip pisiareqqinnerani akiusup, nalikilliliinerit aserfallatsaaliorneqarsimangitsullu ilanngaatigalugit angeqqatigissavaa. Kisiannili teknikkikkut aningaasaqarnikkullu naliliissutaasut 2 %-inik ilaneqassapput, tigusinermut atatillugu aningaasartuutitut matusissutissanik. Tamatumanili qanoq issutsimut nalunaarusiap, piginneqatigiilluni inissiatillit peqatigiiffiata sanaartukkanik ilisimasalimmut suliaritissimasata, teknikkikkut aningaasaqarnikkullu naliliinermut oqimaaqatigiissinneqarsinnaanissaa pingaaruteqarpoq. Suliamik ingerlatseriaaserineqassaaq illuut ataatsimoortumik misissorneqassalluni, aammalu illuatungeriit assersuutigalugu naliliissut, aserfallatsaaliuisimanginnerup amigaaterpianillu ilanngaaserneqarsimasinnaasoq isumaqatigiissutigissallugu. Taamaalilluni teknikkikkut aningaasaqarnikkullu naliliineq aamma illuutip qanoq issusianik nalunaarut assigiimmik pingaaruteqassapput, taakku ataatsimoortillugit pisinermut akiusoq aalajangerneqartussaammat.

Aalajangersagaq naapertorlugu illuut aserfallatsaaliorneqarnermigut amigaateqartoq ilusia allanngortinnagu tunniunneqarsinnaavoq, tamatumalu kingorna piginneqatigiilluni inissiatillit peqatigiiffiata illuut iluarsaassinnaallugu. Amigartumik aserfallatsaaliuisimaneq paasineqassaaq illuut ataavartumik tulleriaraluni aserfallatsaaliorneqarsimangitsooq, taamaakkaluartorli tamakkiisumik iluarsaassinissaaq pisariaqarani. Taamaattumik amigartumik aserfallatsaaliuisimaneq aappaatigut iluarsaassinerup aappaatigullu tamakkiisumik iluarsaassinerup akornanniittutut paasineqassaaq. Iluarsaassineq nalinginnaasumik inissiat najugaqarfigineqarnerini suliarineqarsinnaapput, tassanilu pingaartumik pinneraanerit, taarsersuinerit annikitsut nutarterinerillu suliarineqartarput.

Illuummik amigartumik aserfallatsaaliorneqarsimasumik pisineq, nalinginnaasumik illuummik ingerlaavartumik nalinginnaasumillu aserfallatsaaliorneqarsimasumik pisinermut naleqqiullugu akinnerusussaavoq. Kisiannili teknikkikkut aningaasaqarnikkullu siunnersuisoqarnermut, eqqartuussissuserisumut,

allaffissornermut, aningaasalersuinermi siunnersorteqarnermut aningaasartuutit illuummi amigartumik aserfallatsaaliugaasimanngitsumi aningaasartuutit amerlatigiinnarnissaat naatsorsuutigineqartariaqarpoq.

Imm. 2-mut

Aalajangersakkami piginneqatigiilluni inissiatillit peqatigiiffiata illuutip pisortanit pigineqarnermi nalaani aserfallatsaaliorneqarsimanngitsunik suliaqarnissamut aningaasartuutitut matusissutissanik taarsigassarsisinnaaneranut periarfissat nassuiarneqarput. Namminersorerullutik Oqartussat taamatullu aamma kommunip taarsigassarsiarititaat akilerneqartussanik tulleriinnilersuinermi piginneqatigiilluni inissiatillit peqatigiiffiata taarsigassarsiaat taamaattut akilerneqareernerini akilerneqartussatut inissisimalernissaat pisussaaffiliunneqarpoq.

Aalajangersakkami qularnaveeqqusiisinnaatitaanermut pissutsit maleruagassiuunneqarnissaat siunertarineqanngilaq, taamaallaalli taarsigassarsianut allanut aammalu pisinnaatitaaffinnut nalunaarsorsimasunut allanut naleqqiullugu qularnaveeqqusiisinnaatitaanermi inissisimanerup erseqqissarneqarnissaa siunertarineqarluni.

Imm. 3-mut

Aalajangersakkami piginneqatigiilluni inissiatillit peqatigiiffiata najugaqarfimmi, inissiat attartortittakkat attuumassuteqarfigisimasaanni sillimmatissatut illuartitatut ileqqaakkanik pissarsisinnaannginnera erseqqissarneqarpoq, aningaasat taakku teknikkikkut aningaasaqarnikkullu naligititaasumut ilanngunneqarsimasussaammata, tak. Namminersorerullutik Oqartussat kommunillu inissiaataasa attartortittakkat teknikkikkut aningaasaqarnikkullu naliliiffigineqartarnerat pillugu Namminersorerullutik Oqartussat nalunaarutaat nr. 9, 12. maj 2003-meersoq.

§ 41-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkat allannguuteqartinneqartumi § 23, imm. 2 taarserpaa.

Imm. 1-imut

Aalajangersakkami illuutip nutaap sananeqarneraniit ukioq ataaseq qaangiutsinnagu tunniussineq pitillugu pisinermut akiusoq tamakkiisoq aalajangersarneqarpoq. Akiusoq sanaartornermut naatsorsuutit akuerisat malillugit sanaartornermut aningaasartuutit, tigusinermut atatillugu aningaasartuutinik matusissutissanik 2 %-inik ilassuserneqartut nalingannut aalajangerneqassaaq.

Imm. 2-mut

Aalajangersakkami § 40, imm. 3-mut naleqqiullugu najugaqarfimmi, inissiap attartortittakkap attuumassuteqarfigisimasaani sillimmatissatut illuartitanit illuummut tuttussat piginneqatigiilluni inissiatillit peqatigiiffiannut tunniunneqartussaanerat allaassutaavoq. Aalajangersakkami pisinermut akiusup qanoq iliorluni aalajangersarneqartarnissaa nassuiaatigineqarmat tamatumunnga tunngaviuvoq, taamaattumillu teknikkikkut aningaasaqarnikkullu naliliinermi, tamatumani atorneqartussaannigsumi sillimmatissatut illuartitat ilanngunneqarsinnaanatik. Taamaattumik najugaqarfimmi, inissiat attartortittakkat attuumassuteqarfigisimasaani sillimmatissatut illuartitanit pisassat ilanngunneqassapput, taakkuli annerpaamik inissianit sillimmatissatut illuartitassanut akiliutit annertoqatigissavaat.

Imm. 3-mut

Aalajangersakkami § 33-p illuutinik nutaanik tunniussinermi atorneqartussaanniginnera aalajangersarneqarpoq, tamatumunngalu aalajangersakkap pisinermut akiusup annertussusissaanik imaqarnera pissutaavoq. Tassalu teknikkikkut aningaasaqarnikkullu naliliisoqartussaannigilaq, taamatullu illuutip qanoq issusianik nalunaarusiornissaq siunertaralugu sanaartukkanik ilisimasalimmik atorfinitsitsisoqartussaananani.

§ 42-mut

Aalajangersakkap ilaa nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imi, kingusinnerusukkat allannguuteqartinneqartumi § 23, imm. 3 taarserlugu.

Aalajangersagaq naapertorlugu pisinermut akiusup, §§ 40 aamma 41 naapertorlugit aalajangersarneqarsimasup appartinneqarnissaa Naalakkersuisut aalajangersinnaavaat, tassanili pisinermut akiusup niuernermin naligititaasoq qaangersimassanngilaa. Niuernermin naligititaasoq tassaavoq aki, neqeroorutissat piumanninnerlu tunngavigalugit tamanut ammasumik niueruteqarnermi anguneqarsinnaasoq.

Pissutsit tunngavigalugit tamanna pissutissaqarpat, matumanilu assersuutigalugu illuut, soorlu toqqavimmi pissutsit, aningaasat nalingisa nikerarnerat imaluunniit sanaartornermi suliaqarpallaarneq pissutigalugit immikkut qaffasissumik akeqartinneqarluni sananeqarsimappat aalajangersagaq atorneqarsinnaavoq. Tassalu suliami aalajangersimasumi pissutsit immikkorluinnaq issimappata, aatsaat akimik appaasoqarsinnaavoq, taamaattumillu teknikkikkut aningaasaqarnikkullu naliliineq niuernermin naligititaasumit qaffasinnerutillugu tamanna akimik appaanissamut naammannigilaq.

§ 43-mut

Aalajangersagaq nutaajuvoq.

Aalajangersakkami Namminersornerullutik Oqartussat imaluunniit kommunip illuummik attartortittakkanik inissiarqartumi piginneqatigiilluni inissiaatillit peqatigiiffiannut tunniussinerannut atatillugu innaallagissamut, imermut kiassarnermullu atuinermut akiligassanullu uuttusersuinissap isumaqatigiissutigineqarsinnaanera aalajangersarneqarpoq. Tamatumani isumaqatigiissuteqarnissaq piginneqatigiilluni inissiaatillit peqatigiiffiannut pinngitsaaliissutaanngilaq. Pilersuinermi aqqusersuutit ikkuffiillu annertusaaffigineqarnerisa kingunerisaanik tamanna pillugu piginneqatigiilluni inissiaatillit peqatigiiffiannut isumaqatigiissuteqarsinnaaneq periarfissaqarmat aalajangersakkap ilanngunneqarnissaa pisariaqarsimavoq. Assersuutigalugu imermik kiassarnermilluunniit pilersuinermut aqqusersuummit pingaarnermiit ikkuffimmut, piginneqatigiilluni inissiaatillit peqatigiiffiata pilersorneqarfianut atuinermut uuttuummik ikkussinissaq isumaqatigiissutigineqarsinnaavoq.

Atuinermut uuttuutunik ikkusuinermut aningaasartuutit, tunniussinermut atatillugu aningaasartuutitut ilaatinneqassapput, aammalu isumaqatigiissuteqarnermi piumasaaqatitut ilaatinneqassallutik. Aningaasartuutit naggataagut piginneqatigiilluni inissiaatillit peqatigiiffiannit akilerneqartussaassapput.

§ 44-mut

Aalajangersagaq nutaajuvoq.

§ 43-mi piginneqatigiilluni inissiaatillit peqatigiiffiata nammineerluni toqqaasinnaanera pineqarpoq, aalajangersakkamili matumani piginneqatigiilluni inissiaatillit peqatigiiffiata illuummik tigusinermi kingorna ungasianiit kiassarnermik pilersuinermik, ataatsimut pilersuivinnit pilersuinermik kuuffeqarfinnullu attaveqarnermik ingerlatitsinnarnissamut piusussaaffilerneqarput. Illuatungaagut piginnittut nikikkaluarpataluunniit pilersuisut pilersuinerminnik ingerlatitsinnarnissamut piusussaaffilerneqarput.

Ataatsimut pilersuinermut aqqusersuutit taaneqartut inissisimanera imaaliallaannarlutik nuunneqarsinnaanngimmata, imaluunniit allanik toqqagassaqartoqanngimmat aalajangersagaq ilanngunneqarpoq. Namminersornerullutik Oqartussat kommunilu pisortani oqartussaasuni akisussaasutut avatangiisinut tunngatillugu akisussaaffeqarput, tamannalu ilaatigut illuutit tunineqartut aamma tiguneqareerneramik kingorna naammaginartumik ataatsimut pilersuivinnut atassuteqartinneqarnerisigut qulakkeerneqarsinnaavoq.

Pilersuisup aamma piginneqatigiilluni inissiaatillit peqatigiiffiata akornanni pilersorneqarnissamut isumaqatigiissutaat Kalaallit Nunaanni Eqqartuussivimmi illuutitut nalunaarsuiffimmut nalunaarsorneqassaaq.

§ 45-mut

Aalajangersagaq nutaajuvoq.

Aalajangersakkami Namminersornerullutik Oqartussat imaluunniit kommunip piffissami tigusiffiusumi tigusinermut atatillugu aningaasartuutaasinnaasunik akiliisussaanerat aalajangersarneqarpoq. Matumani teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, aningaasalersuinermut siunnersorteqarnermut, allaffissornermut, aningaasalersuinermut, piginnittuunerup uppersaatiip kiisalu naqissusiinerup uppersaatiinut aningaasartuutit eqqarsaatigineqarput. Suliap pisariinnerunissaa eqqarsaatigalugu taamatut aaqqiissuteqarnissaq toqqarneqarpoq, Namminersornerullutik Oqartussat imaluunniit kommunip suliap suliarineqarnerani akuusussaammata. Piginneqatigiilluni inissiatillit peqatigiiffiata sanaartukkanik ilisimasalittut siunnersortimut, illuutip qanoq issusianik nalunaarusiortussamut aningaasartuutissai Namminersornerullutik Oqartussanit imaluunniit kommunimit susassarineqanngillat.

Kisiannili aningaasartuutissat naggataagut piginneqatigiilluni inissiatillit peqatigiiffiata nammineerluni akilertussaavai, pisinerup akiusumut aningaasartuutissanut siuliani taaneqartunut matusissutissatut 2 %-it ilanngunneqartussaammata.

§ 46-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 25, imm. 1-ip immikkoortuani tullegg aamma imm. 4 ilaatigut assigai.

Namminersornerullutik Oqartussat imaluunniit kommunip taarsigassarsiarititassaannut piginneqatigiilluni inissiatillit peqatigiiffiata illuutaa qularnaveeqqusiunneqartussaavoq. Taarsigassarsianut qularnaveeqqusiussat akilerneqartussanik tulleriinnilersuinerup pisinerup akiusup tamarmiusup 45 %-ianik sinneruttumik aningaasalersuutissatut illuut qularnaveeqqusiullugu taarsigassarsiat akilerneqareernerini, akilerneqartussatut inissisimassapput, tak. § 39, imm. 3. Taarsigassarsianut qularnaveeqqutitut qularnaveeqqusiussaqarluni taarsigassarsinerup allagartap naqqeqqarnera nalunaarsorneqarsimasoq uparuaaffigineqarsimanngitsorlu aammalu aalajangersagaq manna naapertorlugu akilerneqartussanik tulleriinnilersuinerup inissinneqarsimasoq Kalaallit Nunaanni Eqqartuussivimmit tiguneqarpat aatsaat taarsigassarsiasat tunniunneqassapput. Qularnaveeqqusiisarneq pillugu Kalaallit Nunaannut inatsit aamma qularnaveeqqusiisnaatitaanerup maleruagassat nalinginnaasut atorneqassapput.

Aalajangersakkami qularnaveeqqusiisnaatitaanerup pissutsit maleruagassiuunneqarnissaat siunertarineqanngilaq, taamaallaallit taarsigassarsianut allanut aammalu pisinnaatitaaffinnut nalunaarsorsimasunut allanut naleqqiullugu qularnaveeqqusiisnaatitaanerup inissisimanerup erseqqissarneqarnissaa siunertarineqarluni.

§ 47-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 5, imm. 4 assigaa.

Aalajangersakkami Namminersornerullutik Oqartussat imaluunniit kommunip piginneqatigiilluni inissiatillit peqatigiiffiata tigusineranut atatillugu ininik, piginneqatigiilluni inissiatillit peqatigiiffiannit attartornissamut pisinnaatitaaffeqarnissamik piumasaqarsinnaanerat aalajangersarneqarpoq. Piginneqataasut inissiani najugaqartussaataasarmata, aalajangersagaq manna taamaallaat init najugaqarfigineqarnissaminit allaanerusumik atorneqartussat pineqarput. Illuut tiguneqartoq errorsisarfeqarsinnaavoq, naqqup ataani ataatsimoorussamik sikkiliisiveqarsinnaalluni assigisaannilluunniit peqarsinnaalluni.

Aammattaaq aalajangersakkami Namminersornerullutik Oqartussat imaluunniit kommunip piginneqatigiilluni inissiatillit peqatigiiffiata tigusineranut atatillugu illuummi atuisinnaatitaaffioreersut, soorlu inuussutissarsiornermut tunngatillugu, atuutiinnarnissaannik piumasaqarsinnaanerat aalajangersarneqarpoq. Taamaattumik inuussutissarsiutinut atuinissamut inerteqquteqarneq, tak. § 54, illuummi inuussutissarsiornikkut pisinnaatitaaffioreersunut atuutinngilaq.

§ 48-mut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 4, imm. 1-ip immikkoortuani tulleeq ilaatigut assigalugu.

Imm. 1-imut

Aalajangersakkami allassimavoq, piginneqatigiilluni inissiatillit peqatigiiffianni piginneqataasut, piginneqatigiilluni inissiatillit peqatigiiffiata illuutaani piginneqatigiilluni inissiat amerlaqatigissagaat. Piginneqataasoq piginneqatigiilluni inissiatillit peqatigiiffianni piginneqatigiilluni inissianut marlunmut amerlanerusunulluunniit atuisinnaatitaalersinnaanngilaq. Taamaattumik tassani piginneqataasut assigiinngitsuunissaat pineqarpoq. Piginneqataasoq piginneqataasussamit nutaamit taarserneqartinnani piginneqatigiilluni inissiatillit peqatigiiffianni ilaasortaajunnaarsinnaanngilaq.

Imm. 2-mut

Aalajangersakkami piginneqataassutip inummit ataasiinnarmit pigineqarsinnaanera, taamaalillunilu assersuutigalugu piginneqateqataaffigineqarsinnaannginnera erseqqissarneqarpoq. Taamaattorli allatut pigisaqarnissaq iluminni isumaqatigiissutigineqarsinnaavoq. Taamatut isumaqatigiittoqarsimassappat, tamanna piginneqatigiilluni inissiatillit peqatigiiffiannit susassarineqanngilaq, taamaattumillu illuatungeriit akunneranni taamaallaat atuuttussaalluni. Isumaqatigiissut taamaattoq soorunami piginneqatigiilluni inissiatillit peqatigiiffianni pisinnaatitaaffinnik pisussaaffinnillu pilersitsiviussaanngilaq.

Piginneqatigiilluni inissiaatillit peqatigiiffiata kina assersuutigalugu akiligassanut, nalunaarutinut, peqqussutinut tunngatillugu saaffigisassaneraa qularnarunnaarsinniarlugu aalajangersagaq ilanngunneqarpoq, aammalu ataatsimeersuarnermi taasisinnaatitaanermut, piginneqataassutillu tunineqarneranut tunngatillugu kina pisinnaatitaanersoq ersarissumik ilisimassallugu pingaaruteqarpoq.

Aappariit piginneqatigiilluni inissiaammut nuunnissamik kissaateqartut kina arlartik piginneqataassanersoq, taamaalillunilu assersuutigalugu ataatsimeersuarnermi pisinnaatitaassanersoq pillugu isumaqatigiissuteqartariaqarput. Tamatuma kingorna aappariit akunnerminni piginnittuunermut tunngasunik allanik isumaqatigiissuteqarsinnaapput, assersuutigalugu piginneqataassutip 50 %-ianik tamarmik piginnittunngorsinnaallutik. Taamatut isumaqatigiissuteqarneq piginneqatigiilluni inissiaatillit peqatigiiffiannit susassarineqanngilaq.

Imm. 3-mut

Aalajangersakkami inuinnaat aammalu inuit namminersorsinnaatitaasut kisimik piginneqatigiilluni inissiaatillit peqatigiiffianni piginnittunngorsinnaanerat aalajangersarneqarpoq. Taamaattumik tassani peqatigiiffiit, ingerlatseqatigiiffiit allallu piginnaatitaasut pisussaataasullu pineqanngillat.

Imm. 4-mut

Aalajangersakkami Namminersornerullutik Oqartussat, kommuni aamma sanatitsisoq namminersortoq imm. 1-imi aamma 3-mi pineqannginnerat aalajangersarneqarpoq, tamatumunngalu ilaatigut inissiamik ataatsimit amerlanerusunik atuisinnaatitaallutik piginnittunngorsinnaanerat, ilaatigullu Namminersornerullutik Oqartussat aamma kommuni inuinnaannginnerat pissutaavoq.

§ 49-mut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 32, imm. 1-ip immikkoortua tulleeq aamma § 32, imm. 3 tamakkiisumik assigai, aammalu § 32, imm. 1-ip immikkoortuata tulliup ilaa assigalugu.

Imm. 1-imut

Aalajangersagaq manna naapertorlugu piginneqataasut ataasiakkaat piginneqatigiilluni inissiaatillit peqatigiiffiata pisuussutaannut tamakkiisunut piginneqataassutaasa nalingi naatsorsorneqartussaapput. Pisuussutinit piginneqataassutit aggorninngorlugit naatsorsorneqassapput, piginneqataasut ataasiakkaat inigisaasa annertussusaat kvadratmeterinngorlugit naatsorsukkat, piginneqatigiilluni inissiaatillit peqatigiiffiata inissiaataanni inigisap annertussusaannut tamakkiisunut naleqqiunneqassallutik.

Assersuut: Piginneqatigiilluni inissiatillit peqatigiiffiata inissiaatai arfinillit 90 kvadratmeterisut annertussuseqarput aammalu arfinillit 110 kvadratmeterisut annertussuseqarlutik. Inigisap annertussusaa katillugit 1.200 kvadratmeterisut annertussuseqarpoq. Taamaattumik inissiaq 90 kvadratmeterinik annertussusilik 90/1200-tut imaluunniit 7,5 %-itut aggornilerneqassaaq, aammalu inissiaq 110 kvadratmeterinik annertussusilik 110/1200-tut imaluunniit 9,16 %-itut aggornilerneqassalluni.

Assersuutigalugu piginneqatigiilluni inissiatillit peqatigiiffiata pisuussutai 5 millioner koruuninik naleqarpata, piginneqataasullu ataasiakkaat piginneqataassutinit qanoq annertutigisoq piginneqataaffigalugu paaserusuppasuk, aallaqqaammut peqatigiiffiup inissiaataanni inigisap tamakkiisumik kvadratmeterinngorlugu angissusaa naatsorsorneqassaaq. Tulliullugu piginneqatigiilluni inissiani ataasiakkaani inigisap annertussusaa naatsorsorneqassaaq. Inigisat annertussusaassa uuttuutaat peqatigiiffiup pisuussutaannut tamakkiisunut, 5 millioner koruuniusunut amerlisinneqassaaq. Tassani kisitsit nassaarineqartoq tassaavoq piginneqataasup ataatsip pisuussutinit tamakkiisunit piginneqataassutaa.

Assersuut:

Pisuussutit katillugit: 2,5 millioner koruunit

Inigisap katillugu annertussusaa: 800 kvadratmeter

Piginneqatigiilluni inissiani arfineq pingasuni tamani inigisap annertussusaa 100 kvadratmeterisut annertussuseqarpoq, tassalu inissiami ataatsimi aggorniliissut 1/8-iuvoq.

Tassalu inissianut ataasiakkaanut naligititaasoq peqatigiiffiup pisuussutaasa tamarmiusut 1/8-eraat, piginneqataassut ataaseq 312.500 koruuninik naleqarluni.

Piginneqatigiilluni inissianut ataasiakkaanut naligititaasoq tunngaviumik tamanut assigiippoq. Sananeqarnerminni inigisap annertussusaanut kvadratmeterimut ataatsimut akiusut assigiillutik.

Imm. 2-mut

Aalajangersakkami pineqarpoq naligititaasussanik allatut aalajangersaanissaq pisariaqartinneqarsimasoq. Tamanna assersuutigalugu piginneqatigiilluni inissiatillit peqatigiiffiata illunik immikkoortunik, kujammut avannamullu sammisunik sananerani pisinnaavoq. Piginneqataareersut tunngavissaasa isasoorsinnaanerit pinngitsoorniarlugu taamatut naleqqusaanissaq kingusinnerpaamik inissiat piginneqatigiilluni inissiatut atorneqalernerini taamaallaat pisinnaavoq, tamannalu ataatsimeersuarnermi aalajangerneqassaaq.

Piginneqatigiilluni inissiat kujammut sammisut assersuutigalugu inissianit avannamut sammisunit seqernup tungaanut isikkiviginnerujussuusinnaapput. Taamaattumik inissiat kujammut sammisut kvadratmeterimut akii assersuutigalugu

500 koruuninik akisunerusunngortinneqarsinnaapput, avannamullu sammisut akii 500 koruuninik appartinneqarsinnaallutik. Tamanna aamma illuni portusuuni, inissiat allit inissianut qullernut naleqqiullutik isikkivilunnerusumiippata atorneqarsinnaavoq.

Tassalu piginneqataassutitut ataasiakkaanut naligitaasut tunisinermut akiumut pingaaruteqarpoq, tak. matuma kinguliani assersuusiaq:

Sanaartornermi aningaasartuutit inigisap kvadratmeterimut annertussusaanut akiusoq assersuutigalugu 15.300 koruuniuvoq.

Piginneqataassut ataaseq inissiap inissisimaffia pissutigalugu 1,16-imik nalilerneqarpat, kiisalu piginneqataassut alla 0,96-imik nalilerneqarluni, inissianik tunisinermi, inigisap kvadratmeterimut annertussusaanut akiusoq piginneqataassumut siullermut 17.748 koruuninik aamma piginneqataassumut tullermut 14.688 koruuninik naatsorsorneqassaaq. Tassani erseqqissaatigineqassaaq, ingerlatsinermut akiliutissaaq inigisap annertussusaani kvadratmeterit amerlassusaat tunngavigalugit naatsorsorneqartarmat, taamaattumillu inissianut ataasiakkaanut naligitaasooq tassunga tunngatillugu pingaaruteqartussaananani.

Imm. 3-mut

Aalajangersagaq manna naapertorlugu piginneqataasut piginneqatigiilluni inissiatillit peqatigiiffiata pisuussutaanit piginneqataassutaat qularnaveeqqusiunneqarsinnaanngillat eqqartuussisutigootitsissutaasinnaanatilunniit.

Imm. 4-mut

Aalajangersagaq manna naapertorlugu piginneqataasooq tunisinermi ilanngaatisat peereerlugit iluanaarutigisinnaasaminik tiguisinnaatitaasussamik piginnaatitsisinnaavoq, tassanili tiguisinnaatitaasup piginneqataassutip tunineqarnissaa piumasarisinnaanngilaa.

Aammattaaq aalajangersakkap atuutilerneratigut piginneqatigiilluni inissiatillit peqatigiiffiata tunisinermi iluanaarutissaasinnaasut akiligassanut matussutigitissinnaavaa, tamatumani tiguisinnaatitaanissamik piginnaatitsisimaneq apeqqutaatinnagu.

§ 50-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 31, imm. 1 aamma 3 assigai, aammalu najoqqutassatigut allannguuteqartinneqarluni § 31, imm. 2 assigalugu.

Imm. 1-imut

Piginneqatigiilluni inissiatillit peqatigiiffiat peqatigiiffiuvoq, illuummik ataatsimik amerlanerusunilluunniit pigisaqartoq, tasanilu piginneqataasut ataasiakkaat taamaallaat inissiamut aalajangersimasumut ataatsimut atuisinnaatitaaffeqarput. Piginneqatigiilluni inissiatillit peqatigiiffiat namminerisaminik inatsisit malillugit niuernissamut pisinnaatitaaffeqarpoq, tamannalu tunngavigalugu pigisani tamakkiisut qularnaveequsiissutigisinnaallugit. Aalajangersakkami piginneqataasut ataasiakkaat piginneqatigiilluni inissiatillit peqatigiiffianni piginneqatigiisummik pisinerminni aningaasanngorlugit akiliutigisamik nalinginut pisussaataitaaffeqartut aalajangersarneqarpoq. Tassalu aningaasanut, piginneqataasup nammineerluni aningaasaliinermi akiliutaasa amerlaqataannik. Piginneqatigiilluni inissiatillit peqatigiiffiata akiitsoqarfigisaasa piginneqatigiilluni inissiatillit peqatigiiffiata akiitsui pillugit piginneqataasut ataasiakkaat eqqartuussisutigoortumik suliaakkiissutigisinnaanngilaat.

Imm. 2-mut

Aalajangersagaq manna naapertorlugu imm. 1-imi piginneqataasut ataasiakkaat killilimmik akiitsunut pisussaaffeqarnerannut killiliiffiusumik maleruagassaq pingaarneq saneqqunneqarsinnaavoq, taarsigassarsititsisup taarsigassarsinissamik isumaqatigiisummut ilaatillugu piginneqataasut namminneerlutik inuttut nammaqatigiillutillu akilersuinissamut pisussaaffilerneqarnissaat piunasaqaatigisimappagu, piginneqatigiilluni inissiatillit peqatigiiffiata illuutaa qularnaveequsiullugu taarsigassarsinissaq ataatsimeersuarnermi aalajangerneqarpat. Imm. 1-imi maleruagassaq pingaarneq saneqqunneqassappat atugassarititaasut allakkatigut isumaqatigiisutigineqassapput.

Piginneqatigiilluni inissiatillit peqatigiiffiata soorlu aserfallatsaaliuinerup amigarnera iluarseqqinniarlugu taarsigassarsinissaq kissaatigippagu, aalajangersagaq pingaaruteqalersinnaavoq.

Imm. 3-mut

Aalajangersakkami piginneqataalersussap nutaap ilaasortannngornissaata tungaanut, piginneqataasoq ilaasortaajunnaartoq taassumaluunniit qimatai akiitsunut akiliisussaannerat aalajangersarneqarpoq. Piginneqataasup nutaap piginneqatigiilluni inissiaq tiguguniuk, piginneqataasup ilaasortaajunnaartup pisinnaatitaaffii pisussaaffiilu tigussavai.

Piginneqataasup taarsigassarsinissamut isumaqatigiisummi allamik ersarissumik allassimasoqanngippat, piginneqatigiilluni inissiatillit peqatigiiffianni ilaasortaajunnaarnermini nammineerluni akiligassani atorunnaartussaannngimmata tamanna immikkut eqqumaffigissavaa.

Aalajangersagaq nutaajuvoq aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 6, imm. 1-ip immikkoortua tullegg taarserlugu.

Imm. 1-imut

Aalajangersakkami aalajangerneqarpoq ataatsimeersuarneq piginneqatigiilluni inissiatillit peqatigiiffianni qullersaatut oqartussaasuusoq . Tassalu piginneqatigiilluni inissiatillit peqatigiiffiata peqatigiiffimmi inissititernermit tulleriittarneq nalinginnaasoq malippaa, piginneqatigiilluni inissiatillit peqatigiiffianni piginneqataasut tamarmik najuuffigisinnaasaannik ataatsimeersuartitsisarlungi. Piginneqataasut tamarmik immikkut ataatsimeersuarnermi ataatsimik taasisinnaapput. Ataatsimeersuarnermi taasisinnaatitaasoq tassaavoq, inuk piginneqataaernermit uppersarsaammim allassimasooq. Ataatsimeersuarnermi aalajangiinerit nalinginnaasumik amerlanerussuteqarnikkut pisassapput, tamatumani peqqussummi matumani, piginneqatigiilluni inissiatillit peqatigiiffiata malittarisassaanni imaluunniit peqatigiiffimmi suleriaatsimut malittarisassani nalinginnaasuni allamik aalajangiisooqarsimangippat. Nalornissuteqartoqarnerani peqqussutip matuma, piginneqatigiilluni inissiatillit peqatigiiffiata malittarisassaasa aamma peqatigiiffimmi suleriaatsimut malittarisassat nalinginnaasut siuliani tulleriinneqarnerat pingaartinneqartassaaq.

Imm. 2-mut

Aalajangersagaq manna malillugu ataatsimeersuarnermi ukiumoortumik ineqarnermit akiliutissaaq, piginneqatigiilluni inissiatillit peqatigiiffiata taarsigassarsianut akilersuutaanut, kiisalu ingerlatsinermit aserfallatsaaliuinernullu aningaasartuutaanut matusissutissatut piginneqataasunut akilersinneqartussaaq aalajangerneqassaaq.

Imm. 3-mut

Aalajangersakkami piginneqatigiilluni inissiatillit peqatigiiffiata malittarisassaasa minnerpaamik ilanngussaaq 1-imi allassimasunik imaqarnissaat aalajangersarneqarpoq. Tamatumani piginneqatigiilluni inissiatillit peqatigiiffiisa tamarmik minnerpaamik malittarisassanik malinneqartussanik ataatsinik peqarnissaat qulakkeerniarneqarpoq.

Aalajangersakkami malittarisassat maleruagassanik, imm. 1-imi aalajangigassat tamarmik nalinginnaasumik amerlanerussuteqarnikkut aalajangiiffigineqartarnisaannut aallaaviusunik sanequtsiviusinnaasut iluaqutaasussatut isummerfigineqarpoq. Taamaalilluni malittarisassat nalinginnaasut assersuutigalugu piginneqataasumik ilaasortaajunnaarsitsinissaaq imaluunniit peqatigiiffimmi atorunnaarsitsinissamik aalajangiinissaaq pillugu taasisarnermit immikkut maleruagassanik ilaneqarsinnaalerput. Taamatuttaaq piginneqataassutit tunniunneqartarneri pillugu maleruagassanik alajangersaasoqassasoq iluaqutaasusamik isummerfigineqarpoq. Aalajangersakkap atuarneqarnerani aamma

§ 75 tapunneqassaaq, taannalu malillugu §§ 70-74-imi taaneqartut saniatigut allanik pisoqartillugu piginneqataassutinik tunniussisarneq maleruagassat, piginneqatigiilluni inissiatillit peqatigiiffiata malittarisassaani aalajangersarneqartut malillugit pisussaavoq. Taamaattumittaaq aatsaat §§ 70-74-imi taaneqartunit allaanerusunik pisoqartillugu piginneqataassutinik tunniussisarneq malittarisassat nalinginnaasut malillugit pisassaaq.

Aalajangersakkap naggataani piginneqatigiilluni inissiatillit peqatigiiffiata atorunnaarsinneqarnissaa pillugu maleruagassanik aalajangersaanissaaq iluaqutaasussatut isummerfigineqarpoq.

§ 52-imut

Aalajangersakkap ilaa nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 6-ip immikkoortuisa pingajuata ilaa assigalugu.

Imm. 1-imut

Aalajangersakkami piginneqatigiilluni inissiatillit peqatigiiffiata siulersuisuisa ataatsimeersuartunit qinerneqartarnissaat erseqqissarneqarpoq. Siulersuisut katitigaanerannut suliaasaannullu maleruagassat sukumiinerusut piginneqatigiilluni inissiatillit peqatigiiffiata malittarisassaani aalajangersarneqassapput. Peqatigiiffimmi ilaasortat kisimik siulersuisunut qinnigaasinnaassuseqarput.

Ataatsimeersuarnermi aqutsisussamik, piginneqatigiilluni inissiatillit peqatigiiffiata ulluinnarni ingerlanneqarneranik isumaginninnermi ikiuuttussamik toqqaasoqarsinnaavoq. Aqutsisussamik toqqaasoqanngippat ulluinnarni aqutsineq siulersuisunit isumagineqassaaq. Aammattaaq peqatigiiffimmi ilaasortat kisimik siulersuisunut qinigaasinnaassuseqarput.

Imm. 2-mut

Nutaatut siulersuisut piginneqatigiilluni inissiatillit peqatigiiffiata illuutaani ulluinnarni ingerlatsinermut isumaginnittuutillugit, siulersuisunut ilaasortat piginneqatigiilluni inissiatillit peqatigiiffiannut aningaasaqarnikkut akisussaaffinut isumannaallisaatit siulersuisut akisussaannermut sillimmasiinissaat aalajangersakkami matumani erseqqissarneqarpoq. Pingaartumik piginneqatigiilluni inissiatillit peqatigiiffiini mikinerusuni siulersuisut piginneqatigiilluni inissiatillit peqatigiiffiisa aqunneqarnerinik isumaginnittuusut takuneqartarput. Siulersuisut amerlanertigut inuinnarnik, illuutinik aqutsinermik misilittagaqanngitsunik, taamaattumillu piginneqatigiilluni inissiatillit peqatigiiffiannut aningaasaqarnikkut annaasaqaataasumik aalajangeeriataarsinnaasartunik ilaasortaqaartarput. Sillimmasiissut taamaattoqaratarsinnaaneranut matussutissaavoq.

§ 53-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 32, imm. 2 tamakkiisumik assigaa.

Imm. 1-imut

Aalajangersagaq manna naapertorlugu piginneqatigiilluni inissiatillit peqatigiiffiani siulersuisut piginneqataanermut uppersaatiniq sananissamut oqartussaasuupput. Piginneqatigiilluni inissiatillit peqatigiiffiata piginneqataasullu akornanni piginneqataanermut uppersaat, piginneqatigiilluni inissiatillit peqatigiiffiannut ilaasortaanermut aamma inissiamik aalajangersimasumik atuisinnaatitaanermut uppersaataavoq. Piginneqataanermut uppersaamma inuk ataasiinnaq allassimasinnaavoq, inuinaat marluk amerlanerusulluunniit akornanni allatut isumaqatigiissuteqartoqarsimagaluarpalluunniit. Piginneqatigiilluni inissiatillit peqatigiiffianni pisinnaatitaaffiit pisussaaffiillu inummit, piginneqataanermut uppersaamma allassimasumit taamaallaat atorqarsinnaapput. Piginneqataasup pisinnaatitaaffini naammassiniarlugit piginnaatitsissuteqarnissamik isumaqatigiissuteqarnissamut maleruagassat nalinginnaasut naapertorlugit allamut isumagisassanngortissinnaavai.

Imm. 2-mut

Piginneqataasup piginneqataanermut uppersaatini annaasimappagu, aalajangersagaq manna naapertorlugu siulersuisut nutaamik, tammartumut taartaasussamik tunniussisinnaapput.

§ 54-imut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 8, imm. 2 taarserlugu.

Imm. 1-imut

Aalajangersakkami piginneqatigiilluni inissiap inuussutissarsiornermut atoqqusaannginnera erseqqissarneqarpoq, taamatut atuineq tunngavimmigut ineqarfissatut piginneqatigiilluni inissiateqariaatsimik eqqarsaateqarnermut tunngaviummut uniuuttuummat.

Imm. 2-mut

Aalajangersakkami inissiamit najukkamit inuussutissarsiummik namminersortumik annikitsumik ingerlatsisinnaanerup ataatsimeersuarnermi akuerineqarsinnaanera periarfissinneqarpoq, tassalu inuussutissarsiummik ingerlatsiviusoq inissiap

najugaqarfigineqarneranut naleqqiullugu annertunerussanngilaq. Assersuutigalugu piginneqataasoq piginneqatigiilluni inissiap initaasa ilaanni fax-imik, qarasaasiamik allaffimmillu inissiinikkut siunnersorteqarfimmik imaluunniit naatsorsuuserisoqarfimmik ingerlatsisinnaavoq. Kisiannili inuussutissarsiummi sullitat piginneqatigiilluni inissiamut akulikitsumik saaffiginnittarnerannik nassataqassappat, tamanna inerteqquteqarnermut ilaatinneqassaaq, tassami inissiaq assersuutigalugu ulluunerani angerlarsimaffimmi paaqqinnittarfittut, nujalerisarfittut, nerisassianik ineriikkanik pisiniartarfittut, nerisassianik ineriikkanik amerlasuukkaanik pisiniartarfittut, isikkanik passussisarfittut assigisaattullu atorneraruni inuussutissarsiorfinngorluni allannngortussaammat.

§ 55-imut

Aalajangersagaq nutaajuvoq.

Aalajangersakkap atuutilerneratigut piginneqatigiilluni inissiaatillit peqatigiiffiat minnerpaamik ikuallattoornissamut anorersuarneranilu ajoqusernissamut sillimmasiisussaavoq. Tamatumunnga pissutaavoq piginneqatigiilluni inissiat soorlunungullutik ikuallassagaluarpata, aammalu illut sillimmaserneqarsimannngippata, Namminersornerullutik Oqartussat kommunillu qularnaveeqqutaat naleqassaannngimmata.

§ 56-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 39, imm. 1, imm. 2, imm. 3 aamma imm. 4, aamma § 6-ip immikkoortuisa sisamaat assigai.

Imm. 1-imut

Aalajangersakkap atuutilerneratigut piginneqatigiilluni inissiaatillit peqatigiiffiata illuutaa aammalu inissiat ataasiakkaat naammaginatumik aserfallatsaalineqartussaapput. Pisussaaffik eqqumaffigineqarnersoq ataasiakkaatigut naliliisarnikkut pissaaq. Ataatsimut isigalugu ingerlaavartumik aserfallatsaaliuinikkut illuutip aserfallannnginnissaa, taamaalillunilu nalimigut piginneqatigiilluni inissiaatillit peqatigiiffiannut taarsigassarsititsisimasunullu, illuummi qularnaveeqquteqartunut annaasaqaataannnginnissaa qulakkeerneqassaaq. Tassalu aserfallatsaaliuisussaataitanermik naammassinninnissami tunngaviatigut suut tamarmik pineqarput, assersuutigalugu piginneqatigiilluni inissiaammi ingerlaavartumik naternik lakkerisarnermiit ruujorinillu ussiitsunik taarsersuisarnermiit qaliat qalliutaannik taarsersuisarnermut illullu silataata qalipanneqartarneranut.

Piginneqatigiilluni inissiaatillit peqatigiiffiata ilanngussaaq 2 tunngavigalugu piginneqatigiilluni inissiaatilinnut aserfallatsaaliuinissamut ilitsersuut,

aserfallatsaaliugassat sanasut suliaattut pitsaassuseqarlutik eqqortumik suliarineqarnissaannik qulakkeerisussa quluarissavaa.

Imm. 2-mut

Inissiap iluani pequtit aalaakkaasut tamarmik aserfallatsaaliorneqarnissaat piginneqataasut ataasiakkaat isumagisassaraat, taakkulu akiligaannik suliarineqartussaallutik. Tassalu piginneqataasut aserfallatsaaliuisussaaitaananerannut ilaatigut qalipaaneq, qaqortorterineq, tapetilersuineq, naternik, illup iluani matunik, igaffimmi nerriviusanik, sikaavinnik aalaakkaasunik uffarfimmilu atortunik taarsersuineq ilaapput. Piginneqatigiilluni inissiami aserfallatsaaliugassat allat piginneqatigiilluni inissiaatillit peqatigiiffiata isumagisassarai, taassumalu akiligaannik suliarineqartussaallutik.

Imm. 3-mut

Aalajangersakkami ataatsimeersuartut aserfallatsaaliuinissamut maleruagassanik, piginneqataasut ataqqissallugit pisussaaffigisaannik akuersisinnaanerat aalajangersarneqarpoq. Aserfallatsaaliuinissamut maleruagassat aserfallatsaaliugassanut, piginneqatigiilluni inissiaatillit peqatigiiffiannit akisussaaffigineqartunut aamma piginneqataasunit akisussaaffigineqartunut tunngasinnaapput. Tamatuma saniatigut aamma illup iluani silataanilu suliaassanut tunngatillugu aserfallatsaaliuinissamut maleruagassanik akuersisoqarsinnaavoq.

Aserfallatsaaliuinissamut maleruagassat imarisassaaruk sukumiinerusut piginneqatigiilluni inissiaatillit peqatigiiffiannit namminermit aalajangersarneqassapput, taamaattumillu piginneqatigiilluni inissiaatillit peqatigiiffiini assigiinngitsuni allanngorarnissaat naatsorsuutigineqarluni.

Aserfallatsaaliuinissamut maleruagassat akuersissutigineqarnerini nalinginnaasumik imm. 4 naapertorlugu aserfallatsaaliuinissamut pilersaarusiortoqartassaaq, tassanilu illup iluani silataanilu aserfallatsaaliuinissamut tunngatillugu suliaassat ataasiakkaat qanoq akuttutigisumik suliarineqartarnissaat nassuiaatigineqartassalluni.

Imm. 4-mut

Piginneqatigiilluni inissiaatillit peqatigiiffiata siulersuisuisa aalajangersakkami piumasaaqatit naammassiniarlugit aserfallatsaaliuinissamut pilersaarusiussapput, tassanilu aserfallatsaaliugassat assigiinngitsut suliarineqarnissaat qanoq akuttutigisumik pisassanersoq allassimassaaq.

Aamma pilersaarummut illup silataata eqqaatalu, illut ataatsimoorussat assigisaasalu aserfallatsaaliorneqarnissaat ilaassapput. Aserfallatsaaliuinissamut pilersaarut aamma piginneqataasut ataasiakkaat aserfallatsaaliugassanik akiliisinneqarnissaannut tunngavigineqarsinnaavoq. Taamatuttaaq aserfallatsaaliuinissamut pilersaarut aserfallatsaaliuinissamut malittarisassat, imm. 3 naapertorlugu aalajangersarneqarsimasut naammassineqarnissaannut atorneqarsinnaavoq.

Aserfallatsaaliuinissaq naatsorsuutigineqareersinnaatillugu aammalu akuttoqatigiinnik pisariaqalertartillugu aammalu ajutoornerup, ajoqusernerup imaluunniit tassangaannartumik illup iluani silamiluunniit sunniutit kingunerissannik pisussaatinagu, pilersaarutaasarpog ataavartuusarlunilu. Pigisap pioreersup atorsinnaassusia isumannaarneqarpat/allanngutsaalineqar-pat tassaassaaq aserfallatsaaliuineq.

Aserfallatsaaliugassat piffissami naatsorsuusiorfiusumi suliarineqassappata, aserfallatsaaliuinerup nalaani aningaasartuutissat toqqaannartumik akilerneqassapput. Kisiannili aserfallatsaaliugassat assersuutigalugu ukiut imaluunniit piffissat naatsorsuusiorfiusut tallimakkaarlugit suliarineqartarpata, ukiut imaluunniit piffissat naatsorsuusiorfiusut sisamat qaangiuttut ingerlanerini ingerlatsineq aqutigalugu aserfallatsaaliugassanut sillimmatissatut illuartitsisoqartassaaq, tamatumalu kingorna aserfallatsaaliugassat naammassineqarnerini aningaasartuutissat akilerneqassallutik.

Oqariaatsip pilersaarutaasumik uani atorineqarnera taamaallaat suliassap piffissalernerneqarneranut tunngatinneqarpoq. Aserfallatsaaliuinissaq ukiut x-ikkaarlugit suliarineqartartussatut pilersaarusiugaappat, taaguut taanna atorineqassaaq. Taamaattumik ukiut tamaasa pilersaarutaasumik aserfallatsaaliuinissamut aningaasanik sillimmatissatut illuartitsisoqartarpoq.

§ 57-imut

Aalajangersagaq piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 41-mut taartaavoq.

Imm. 1-imut

Aalajangersakkami Namminersornerullutik Oqartussat kommunillu piginneqatigiilluni inissiatillit peqatigiiffiata illuutaani aserfallatsaaliuinnginnerup kingunerisaanik qularnaveeqqutaasup ajorserianninnissaa qulakkeerniarneqarpoq. Taamaattumik Namminersornerullutik Oqartussat imaluunniit kommuni piffissap naammaginartup iluani aserfallatsaaliuisarnissamik peqqusisinnaavoq imaluunniit taarsigassarsiat atorunnaarsissinnaallugit. Aalajangersakkami qularnaveeqqusiisinnaatitaanermut pissutsit maleruagassiuunneqarnissaat siunertarineqanngilaq, taamaallaalli taarsigassarsianut allanut aammalu pisinnaatitaaffinnut nalunaarsorsimasunut allanut naleqqiullugu qularnaveeqqusiisinnaatitaanermi inissisimanerup erseqqissarneqarnissaa siunertarineqarluni

Imm. 2-mut

Piginneqatigiilluni inissiatillit peqatigiiffiata Namminersornerullutik Oqartussanit imaluunniit kommunimit pingasoriarluni allakkatigut peqquneqarsimagaluarluni aserfallatsaaliugassat suliarinngippagit, Namminersornerullutik Oqartussat

imaluunniit kommunip piginneqatigiilluni inissiatillit peqatigiiffianni aserfallatsaaliugassat piginneqatigiilluni inissiatillit peqatigiiffiata akiligaanik suliaritissinnaavai.

Peqqussut piginneqatigiilluni inissiatillit peqatigiiffiata siulittaasuata najukkamut allakkanik tigusiffisartagaanut allakkatut nalinginnaasutut aamma tammatsaalisatut nassiunneqassaaq. Tamanna Namminersornerullutik Oqartussat imaluunniit kommunip piginneqatigiilluni inissiatillit peqatigiiffiata akiligaanik aserfallatsaaliugassanik suliaqartitsisinnaanerata atuuttussaatinneqarnissaanut piumasqaataavoq. Tamatumani Namminersornerullutik Oqartussat imaluunniit kommunip piginneqatigiilluni inissiatillit peqatigiiffiannut peqqussummik nassiussinnginnerminni pisortatiguunngitsumik saaffiginnissimanissaat naatsorsuutigineqartariaqarpoq.

§ 82, imm. 1, nr. 4 naapertorlugu aserfallatsaaliuinnginneq aamma Namminersornerullutik Oqartussat kommunillu taarsigassarsiarititaasa erniaqanngitsut akilersugassanngitsullu akiligassanngortinneqarnerinik kinguneqarsinnaavoq. Taamaattumik aserfallatsaaliuinnginnermut qisuariaatitut Namminersornerullutik Oqartussat imaluunniit kommuni qisuariaateqarnissamut marlunnik periarfissaqarput. Qisuariaateqarnissamut periarfissap arlaanik atuinissamut maleruagassiornissaq ajornarpoq. Naalakkersuisut kommunalbestyrelsillu ataasiakkaat pisuni ataasiakkaani namminneerlutik naliliisariaqartassapput. Tamatuma kingorna Naalakkersuisut aamma kommunalbestyrelsit taamaallaat inatsisini ingerlatsinnermut tunngassuteqartuni maleruagassanit killilersimaarneqalissapput.

Kommunalbestyrelsinut tunngatillugu taarsigassarsiarititat akiligassanngortinneqassanersut imaluunniit aserfallatsaaliugassat suliarineqassanersut kommunini ataasiakkaani isummernerit assigiinnginnissaat aamma naatsorsuutigineqartariaqarpoq. Tamatumunnga aalajangernissamut assersuutigalugu kommuni angisuujunersoq mikisuunersorluunniit, aammalu ineqariaatsit qanoq ittuunersut apeqqutaasassaaq.

§ 58-imut

Aalangersakkami piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 39, imm. 5-imi maleruagassaq erseqqissarneqarpoq annertusineqarlunilu.

Imm. 1-imut

Aalangersakkami aserfallatsaaliugassat piffissap naammaginartup sukumiinerusumik aalajangerneqartup iluani suliarineqarnissaat pillugu siulersuisut piginneqataasunut peqqussuteqartarnissaannut pisussaaffilerneqarput. Piffissaliussap sivilissusaanut aserfallatsaaliugassat qanoq isikkoqarnersut apeqqutaasassaaq. Tassalu pissutsinut, piginneqatigiilluni inissiatillit peqatigiiffiata illuutaani tassanngaannartumik ajoqusiisinnaanngitsunut tunngatillugu piffissaliussaq sapaatit

akunnerinik marlunniit sisamanut sivisussuseqartariaqarpoq, kiisalu pissutsit nukinginnartillugit sapaatip akunneranik ataasiinnarmik piffissaliisoqartariaqarluni. Suliassarli siulersuisunit piffissaliunneqartup iluani suliaritissallugu ajornassappat, tamanna soorunami piginneqataasumut ajoqutaasinnaassanngilaq. Tamanna assersuutigalugu sanasussamik pissarsisinnaannginnermik pissuteqarsinnaavoq imaluunniit silamik pissuteqarsinnaalluni.

Piffissaliussap qaangiunnerani siulersuisut aserfallatsaaliugassat suliarineqarsimanersut paasiniallugu inissiamik takuniaanissamut pininnaatitaapput. Siulersuisut misissuinissamut piffissamik isumaqatigiissuteqarniarlutik piginneqataasumut attaveqassapput.

Piginneqataasoq misissuisoqarnissaanut akerliuppat, aserfallatsaaliugassat suliarineqarsimanngitsut ilimanaateqartoq siulersuisut isumaqarnissaminut pissutissaqarsinnaapput. Tamatuma kingorna ataatsimeersuarnikkut § 79, imm. 2 naapertorlugu ilaasortaajunnaarsitsinissamut tunngavissaqalertoqarsinnaavoq.

Tamatumunnga taarsiullugu siulersuisut aserfallatsaaliugassat piginneqataasup akiligaanik piginneqatigiilluni inissiatillit peqatigiiffiannit suliaritissinnaavaat, tak. imm. 2.

Imm. 2-mut

Aalajangersagaq imm. 1-imut tapertatut atuuppoq, tassanilu piginneqataasup pingasoriarluni allaffigineqarsimagaluarluni aserfallatsaaliugassat suliarisimanngippagit, siulersuisut aserfallatsaaliugassanik piginneqataasup akiligaanik piginneqatigiilluni inissiatillit peqatigiiffiannut suliaqartitsisinnaanerit periarfissinneqarpoq. Tamatumunngali pingaarutilittut allatut iliuuserineqarsinnaasoq tassaavoq ataatsimeersuartut piginneqatigiilluni inissiatillit peqatigiiffianni oqartussaasunut qullersaasutut piginneqataasup pineqartup tamatumunnga taarsiullugu ilaasortaajunnaarsinneqarnissaanik aalajangiisinnaanerit. Ataatsimeersuartut ilaasortaajunnaarsitsisinnaanerit aatsaat siulersuisut pingasoriarlutik piginneqataasumut peqqusereernerisigut, piginneqataasullu aserfallatsaaliugassat suliarinissaannut peqqussutit naammassisimanngippagit atorneqarsinnaavoq. Siulersuisut piginneqataasup akiligaanik aserfallatsaaliugassanik piginneqatigiilluni inissiatillit peqatigiiffiannut aserfallatsaaliugassanik suliarinnittussanngortitsisinnaanerit, nalinginnaasumik imaluunniit immikkut ittumik ataatsimeersuarnissamut aggeqqusissutip, § 79, imm. 2 naapertorlugu piginneqataasumik ilaasortaajunnaarsitsinissamik oqaluuserisassanngortitsiviusup tigunerani atorunnaassaaq.

Piginneqataasoq ilaasortaajunnaarsinneqarpat, taamaalillunilu piginneqatigiilluni inissiamit nuuppat, piginneqatigiilluni inissiami aserfallatsaaliugassat, iluarsagassat il.il. piginneqatigiilluni inissiamit anisoqarnerani maleruagassat nalinginnaasut naapertorlugit suliarneqassapput.

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 40 assigaa.

Imm. 1-imut

Aalajangersakkap atuutilerneratigut piginneqataasoq inissiap iluani nalinginnaasunik annikinnerusunik allanngortiterissalluni pisinnaatitaavoq, tamatumani matunik, igaffimmi atortunik, sikaavinnik aalaakkaasunik, uffarfimmi atortunik ikkussuineq piaanerluunniit pineqarput, kisiannili allanngortiterinerit sanasut suliaattut pitsaassuseqarlutik eqqortumik suliarineqarnissaat piginneqataasup akisussaaffigaa. Allanngortiterinerit taaneqartut saniatigut pisariunerusunik allanngortiterisoqarsinnaavoq, tamannali aatsaat siulersuisut akuersinerisigut pisinnaavoq. Tassani assersuutigalugu illup iluata sannaanik allanngortiterinerit, imaluunniit teknikkikkut atortulersuutinik immikkut ittunik, soorlu silaannarissaatinik aalaakkaasunngorlugit ikkussanik ikkussuinissaq eqqarsaatigineqarput.

Silataani allanngortiterinissat tamarmik ataatsimeersuartunit akuerineqarsimanissaat piumasaqaataavoq.

Imm. 2-mut

Aalajangersakkami suliaassat pitsaassusaasa minnerpaaffissaat aalajangersarneqarput, tassanilu sanaartornermut pilersaarusiornermullu inatsisit ataqqineqarnissaat malinneqarnissaallu piumasarineqarpoq.

§ 60-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 10, imm. 4 assigaa.

Imm. 1-imut

Aalajangersakkami Namminersornerullutik Oqartussat imaluunniit kommunip qularnaveeqqutaasa akilerneqartussanik tulleriinnilersuineri piginneqatigiilluni inissiatillit peqatigiiffiata pilersaarutaasumik ataavartumillu aserfallatsaaliuinissamut taarsigassarsiaasa, kiisalu pitsanngorsaatissatut allanngortitigassatullu kissaatigisaminut taarsigassarsiaasa akilerneqareernerini akilerneqartussatut inissinneqarnissaat ajornarunnaarsinneqarpoq. Namminersornerullutik Oqartussat imaluunniit kommunip taarsigassarsiarititaasa piginneqatigiilluni inissiatillit peqatigiiffiata pilersaarutaasumik ataavartumillu aserfallatsaaliuinissamut taarsigassarsiaasa akilerneqareernerini akilerneqartussatut inissinneqarnerannut, aningaasat sillimmatissatut illuartinneqartut, assersuutigalugu sillimmatissatut illuartitassat annertussusilerneqarnerini naatsorsuutigisamit

aserfallatsaaliuinissap pineqartup akisunerunera pissutigalugu
naammangeriataarnissaat tunngaviuvoq.

Kisiannili Namminersornerullutik Oqartussat imaluunniit kommunip
taarsigassarsiarititaat akilerneqartussanik tulleriinnilersuinermi inissisimanerat
nikisinneqassappat, qularnaveeqqusiiffigisat kingornani inissisimasut taamatuttaaq
inissisimanerminnik nikisinneqarnissartik akuerisariaqassavaat.
Namminersornerullutik Oqartussat imaluunniit kommunip qularnaveeqqutaasa
ajorserianninnissaat qulakkeerniarlugu aalajangersagaq manna ilanngunneqarpoq.

Aalajangersakkami qularnaveeqqusiisinnaatitaanermut pissutsit
maleruagassiunneqarnissaat siunertarineqanngilaq, taamaallaalli taarsigassarsianut
allanut aammalu pisinnaatitaaffinnut nalunaarsorsimasunut allanut naleqqiullugu
qularnaveeqqusiisinnaatitaanermi inissisimanerup erseqqissarneqarnissaa
siunertarineqarluni

Imm. 2-mut

Aalajangersakkamili uani aalajangersarneqarpoq, piginneqatigiilluni inissiatillit
peqatigiiffiata illuutiminik aserfallatsaaliuisimannginnini iluarseqqinniarlugu
taarsigassarsiaanit, tassalu piginneqatigiilluni nissiatillit peqatigiiffiata
nalinginnaasumik aserfallatsaaliuisussaatitaanera unioqqutinneqarsimappat,
Namminersornerullutik Oqartussat kommunillu qularnaveeqqutaat
akilerneqartussanik tulleriinnilersuinermi kingusinnerusumut inissinneqassanngitsoq.
Tassalu piginneqatigiilluni inissiatillit peqatigiiffiata ukiuni arlalinni,
assersuutigalugu illuutip igalaavinik aserfallatsaaliisussaatitaanini
sumiginnarsimappagu, Namminersornerullutik Oqartussat imaluunniit kommunip
qularnaveeqqutaata igalaat iluarsateqqinnissaannut taarsigassarsinit
kingusinnerusumut inissinneqassanngilaq.

Aalajangersakkami qularnaveeqqusiisinnaatitaanermut pissutsit
maleruagassiunneqarnissaat siunertarineqanngilaq, taamaallaalli taarsigassarsianut
allanut aammalu pisinnaatitaaffinnut nalunaarsorsimasunut allanut naleqqiullugu
qularnaveeqqusiisinnaatitaanermi inissisimanerup erseqqissarneqarnissaa
siunertarineqarluni

Imm. 3-mut

Aalajangersakkami aalajangersarneqarpoq piginneqatigiilluni inissiatillit
peqatigiiffiat taarsigassarsiaminik allannortitsiniarluni taarsigassarsissappat,
Namminersornerullutik Oqartussat imaluunniit kommunip qularnaveeqqutaat
akilerneqartussanik tulleriinnilersuinermi kingusinnerusumut inissinneqassasut,
tamatumani aatsaat taarsigassarsiat nutaat iluanaarutit tunniunneqarnissaat
siunertaralugu amerlanerulissanngippata. Piumasaqaat taanna naammassineqarpat,
Namminersornerullutik Oqartussat kommunillu qularnaveeqqutaata
akilerneqartussanik tulleriinnilersuinermi inissisimanerat
ajornerulersinneqassanngilaq, taamaattumik allannortitsinissaq
akuerineqarsinnaalluni.

Aalajangersakkami qularnaveeqqusiisinaatitaanermut pissutsit maleruagassiuunneqarnissaat siunertarineqanngilaq, taamaallaalli taarsigassarsianut allanut aammalu pisinnaatitaaffinnut nalunaarsorsimasunut allanut naleqqiullugu qularnaveeqqusiisinaatitaanermi inissisimanerup erseqqissarneqarnissaa siunertarineqarluni

§ 61-imut

Aalajangersagaq nutaajuvoq.

Aalajangersakkami aalajangersarneqarpoq piginneqataasup piginneqatigiilluni inissiami atuisinnaatitaaffigisamini piffissap sivisunersaani najugaqarnissaa. Piginneqataasup inissiami pinngitsoorani nammineerlunilu ineqarnissaa piunasaqaatigineqarpoq. Taamaattumik piginneqataasup najukkami najugaqartutut nalunaarsorsimaannarluni inissiaq najugaqarfiginngikkuniuk najugaqartussaataaneq naammassisimassanngilaa. Najugaqartussaataaneq naammassineqarsimanngippat piginneqataasoq piginneqatigiilluni inissiatillit peqatigiiffiannut ilaasortaajunnaarsitsisinnaavoq. Piginneqataasoq inulluunniit piginneqataasup inoqutigisaanut ilaasoq ukiup ataatsip ingerlanerani sivikinnerpaamik katillugit qaammatini arfinilinni piginneqatigiilluni inissiatillit peqatigiiffianni unnuisimappat, najugaqartussaataaneq naammassineqarsimassaaq.

Piginneqataasup inoqutaanut naatsorsuunneqarput aappaasoq, inooqataasoq, qitornat angerlarsimaffimmi najugaqartut inuillu allat, piginneqataasumut inooqatigiinnertut ittumik attumangikkaluarlutik inoqutaasut.

Taamaattumik inuit suliffitik aqutigalugit aamma piffissap ilaani nunani allaniittartut, soorlu timmisartortartut inissiami najugaqartussaataanerannut piunasaqaammik naammassinninnissaannut, pineqartup ukiup ataatsip ingerlanerani sivikinnerpaamik qaammatini arfinilinni inissiami unnuisimanissaat aalajangiisuussaaq. Piffissami pineqartup aallaqqanerata nalaani aallaaviatigut inissiamik allamut attartortitsinertut taaneqartartumik attartortitsisoqarsinnaanngilaq. Tassalu inissiaq piffissap ilaani allanit atorneqassappat, tamanna taamaallaat inissiamik najukkamik allamut attartortitsisarnermut maleruagassat malillugit pisinnaavoq. Inissiami isumannaallisaanissaq nakkutilliinissarlu eqqarsaatigalugit inissiamik nakkutilliisoq ullormi ataatsimi marlunniluunniit inissiami unnuisariaqassappat, nakkutilliisoq pineqartoq assersuutigalugu illoqarfiup avataaneersuuppat tamanna akuerineqarsinnaavoq. Tamatumanili atuinerpiaap allamut tunniunneqarsimaneratut taamaallaat ilusiligaassanngilaq.

§ 62-imut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 42-mi aalajangersakkamut erseqqissaataalluni.

Imm. 1-imut

Aalajangersagaq siunnersuummi kisiartaalluni piginneqatigiilluni inissiamik attartortitsinermut tunngasuvoq. Taanna malillugu attartortitsinissaq taamaallaat pisinnaavoq, inissiami init ataasiakkaat attartortinneqarpata, aammalu piffissaq attartortitsiviusoq qaammatinit pingasunit sivikinnerunngippat. Tassalu illuatungaatigut aamma piffissami killiligaanngitsumi attartortitsinissamik isumaqatigiissuteqarnissaq periarfissaqarpoq.

Aalajangersakkap siunertaa eqqarsaatigalugu piginneqatigiilluni inissiaq tamarmiisoq ataasiinnarmik initaqarpat, inimik ataatsimik attartortitsinissaq pisinnaanngilaq. Taamaaliornikkummi piginneqatigiilluni inissiaq tamarmiisoq attartortinneqassaaq, tamannalu ilaatigut piginneqataasup najugaqartussaataitaneranut akerliuvoq.

Imm. 2-mut

Aalajangersakkap atuutilerneratigut attartortitsinermut isumaqatigiissutini piunasaqaatit siulersuisunit akuerineqartussaapput. Tassalu attartortitsinermut isumaqatigiissummi atugassarititaasut siunnersuummi aalajangersakkanut naapertuuppata, siulersuisut akuersinissamut akerliusinnaanngillat. Taamaalilluni aalajangersagaq siulersuisunut, piginneqatigiilluni nissiaatillit peqatigiiffiata ulluinnarni aqunneqarneranut akisussaasusunut, aammalu piginneqatigiilluni inissiat ataasiakkaat kikkunnit najorneqarnerannik ilisimannittussaasunut paasisutissiisussaataitanertut iluseqarneruvoq.

Piginneqataasut aningaasaqarnikkut iluanaaruteqarnissaq anguniarlugu ininik ataasiakkaanik attartortitsisarnissaasa pakkersimaarneqarnissaa siunertaralugu aalajangersakkami ineqarnermut akiliut, piginneqataasup akilersissinnaasaa annerpaaffissalernerqarpoq. Attartornermut akiliut annerpaamik ineqarnermut akiliummut naleqqiullugu annertussusilerneqassaaq, tassalu piginneqatigiilluni inissiami kvadratmeterit tamakkiisut amerlassusaat inimi kvadratmeterit amerlassusaannut agguarneqassapput. Aamma annerpaamik qanoq annertutigisumik attartornermut akiliisitsisinnaanerup naatsorsorneqarneranut init ataatsimoorussat, soorlu perusersartarfik, uffarfik, igaffik, torsuusaq il.il. agguaqatigiissitsilluni naatsorsorsuineranut ilaatinneqassapput.

Imm. 3-mut

Aalajangersakkap atuutilerneratigut piginneqataasup (attartortitsisup) attartortullu akornanni aningaasaqarnikkut iluarsisassat piginneqatigiilluni inissiaatillit peqatigiiffiannit susassarineqanngillat, ineqarnermut akiliut piginneqataasumut toqqaannartumik akilerneqartartussaammat.

Imm. 4-mut

Piginneqataasup piginneqatigiilluni inissiaatillit peqatigiiffiata tungaanut attartortitaminut nammineerluni akisussaaffeqarnera erseqqissarniarlugu

aalajangersagaq ilanngunneqarpoq. Tassalu aalajangersakkap atuutsinneqarneratigut piginneqataasup iliuusai ilaasortaajunnaarsinneqarnissamut piumasaqaatinut naapertuuppata, piginneqataasooq piginneqatigiilluni inissiatillit peqatigiiffianni ilaasortaajunnaarsinneqarsinnaavoq.

Ilaasortaajunnaarsitsisoqarnerani attartortitsinermit isumaqatigiisummi attartortorunnaarsitsinissamut aalajangersakkat siunnersuummilu matumani ilaasortaajunnaarsitsinissamut aalajangersakkat imminnut akerleriippata, tamanna piginneqatigiilluni inissiatillit peqatigiiffiannit susassarineqanngilaq. Siunnersuummi matumani ilaasortaajunnaarsitsinissamut piumasaqaatit naammassineqarsimappata, attartortitsisarnermit inatsimmi attartortitsinermit isumaqatigiisummik atorunnaarsitsinissamut piumasaqaatit naammassineqarsimanersut apeqqutaatinnagu ilaasortaajunnaarsitsisoqarsinnaavoq.

§ 63-imut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 42, imm. 1-ip ilaa assigalugu.

Imm. 1-imut

Aalajangersagaq § 61-imi najugaqartussaataitanermit maleruagassamik pingaarnermik saneqqutsineruvoq. Aalajangersagaq naapertorlugu piginneqatigiilluni inissiatillit peqatigiiffianni siulersuisut piginneqataasooq inigisaminik inunnut namminersorsinnaatitaassunut attartortitsinissaa akuerisinnaavaat. Piginneqataasooq napparsimappat, nappaataalu illoqarfimmi najukkamini katsorsarneqarsinnaanngippat, taamaattumillu piginneqataasooq katsorsartiffissaminut nuukkallarsimappat, tamanna assersuutitut taaneqarsinnaavoq. Piginneqataasooq sulisitsisuminit piumaffigineqarluni imaluunniit teknologiip ineriartornerata kingunerisaanik ilinniaqqittussaappat, ilinniagarlu illoqarfimmi piginneqatigiilluni inissiap inissisimaffigisaani ingerlanneqarsinnaanngippat tamanna aamma assersuutigineqarsinnaavoq. Kiisalu peqqissarnerit, allamut ilinniaqqinnerit, peqquneqarluni suliarturnerit, peqquneqarluni allamut nuutinneqarallarnerit eqqaaneqarsinnaapput. Aamma peqannginneq piginneqataasup aappaata, inooqataata qitornaasaluunniit taamatut atugaqarnerinik pissuteqarsinnaavoq. Peqannginnissamut tunngaviusut unioqqutitsiviunngitsut taaneqartut tamakkiisuunngillat.

Inigisamik allamut attartortitsinissaq sivikinnerpaamik qaammatinik pingasunik sivilissuseqassaaq.

Imm. 2-mut

Aalajangersagaq malillugu piginneqatigiilluni inissiamik allamut attartortitsinissaq sivilunerpaamik ukiunut pingasunut akuerineqarsinnaavoq. Aalajangersagaq aqutigalugu piffissami sivilunerusumi inigisamik allamut attartortitsinikkut

najugaqartussaataaneramik pingaarnertut maleruagassap ingalassimaarneqarnissaa pinngitsoortinniarnearpoq.

§ 64-imut

Aalajangersagaq nutaajuvoq.

Imm. 1-imut

Aalajangersagaq manna malillugu inigisap allamut attartortinneqarnerani attartortitsinermut akiusup annertussusissaa atugassarititaasussallu allat siulersuisunit akuerineqartussaapput. Attartornermut akiliut akilersinneqartussaq annerpaamik ineqarnermut akiliutip, piginneqataasup piginneqatigiilluni inissiatillit peqatigiiffiannut akilertagaata annertoqatigissavaa. Taamaattumik, soorlu nungullarnernut il.il. matussutissanik akiliutissaq ilaneqarsinnaanngilaq.

Inissiarli pequtitaqartillugu attartortinneqarpat, piginneqataasup tamatumunnga akiliutissatut ineqarnermut akiliutip annerpaamik 10 %-ii naatsorsuutigissavai. Taamaattumik piginneqataasoq inigisaminik pequteqartillugu allamut attartortitsissaguni, ineqarnermut akiliut 10 %-imik ilallugu attartornermut akiliisitsisinnaavoq. Aalajangersakkami piginneqataasup inigisaminik allamut attartortitsinermigut iluanaaruteqarnissaa pakkersimaarniarneqarpoq.

Piginneqataasoq inigisamillu najukkaminik attartortitaa akunnerminni attartornermut isumaqatigiissuteqarsimasuummata, ineqarnermut akiliutip piginneqataasup inigisamillu attartortup akunnerminni ineqarnermut akiliummik iluarsisarnissaat eqqornerpaatut isigineqarpoq, taamaalilluni piginneqatigiilluni inissiatillit peqatigiiffiat inigisamik attartortinneqartup ineqarnermut akiliisinneqartarnerani suliakkersorneqassanngilaq. Tamaattumik ineqarnermut akiliut piginneqataasumut toqqaannartumik akilerneqartassaaq. Taamaalilluni piginneqataasup aamma piginneqatigiilluni inissiatillit peqatigiiffiata akornanni pissutsit inigisamik allamut attartortitsinermut sunnerneqassanngillat. Taamaattumik piginneqataasup inigisaminik allamut attartortitsinini tamakkerlugu ineqarnermut akiliut piginneqatigiilluni inissiatillit peqatigiiffiannut akilertassavaa. Taamaaliornikkut inigisaq allamut attartortinneqarsimagaluarpat attartortinneqarsimanngikkaluarpalluunniit, ineqarnermut akiliutip akilerneqannginneranut tunngatillugu piginneqatigiilluni inissiatillit peqatigiiffiata piginneqataasumut peqqusisinnaanera allannguuteqassanngilaq. Matumani pingaartumik ilaasortaajunnaarsitsinissamut piginnaatitaaneq pisussaaffeqarnerlu eqqarsaatigineqarput.

Imm. 2-mut

Aalajangersagaq naapertorlugu inigisamik allamut attartortitsinissamut attartortinneqartup piginneqatigiilluni inissiatillit peqatigiiffiannut allanik isumaqatigiissuteqarnissaa piumasaaqatigineqarsinnaanngilaq. Tassalu inigisamik allamut attartortitsinissamik isumaqatigiissuteqarnermi inigisamik

attartortinneqartup, soorlu sanilip biilianik pisinissaa, piginneqataasup qamuteralaanik attartornissaa imaluunniit piginneqataasup pequtaanik pisinissaa piumasaqaatigineqassappat, tamanna inerteqqutaavoq. Taamatut isumaqatigiissuteqartoqarsimappat, isumaqatigiissut taanna, inigisamik allamut attartortitsinissamut piumasaqaataasooq atortussaassanngilaq. Inigisamik allamut attartortitsinissamik isumaqatigiissut atuutiinnassaaq. Kisiannili piumasaqaataasooq ilanngunneqartoq atuutissanngilaq. Isumaqatigiissutit, inigisamik allamut attartortitsinermut atasut, soorlu innaallagissamik, imermik, kiassarnermik, eqqaavilerinermik assigisaannillu atuisunngornerit aalajangersakkami ilaatinneqanngillat. Aalajangersagaq atituumik, aammalu isumaqatigiissutinut qanorluunniit ittunut atuuffeqartutut paasineqassaaq. Tamanna tunngavigalugu isumaqatigiissut alla, inigisamik allamut attartortitsinissamut piumasaqaataasooq, assersuutigalugu immikkut allakkiatut oqaluinnarnikkulluunniit isumaqatigiissutaasimanersoq apeqqutaajunnaassaaq.

Aammattaaq erseqqissarneqassaaq, inigisamik allamut attartortitsinissamut isumaqatigiissutinik allanik *piumasaqaateqarnissamik* inerteqquteqarnermut sanilliullugu, allanik *isumaqatigiissusiornissaq* inerteqqutigineqanngimmat, tamatumani taamaallat pineqarpoq isumaqatigiissutit allat inigisamik allamut attartortitsinissamut piumasaqaatinik nassataqassanngimmata.

"Nerriviup ataatigut aningaasat" ajornartorsiutaasarnerata unitsinneqarnissaa kissaatigineqarpoq. Inigisamik allamut attartortitsineq atortussaajunnaarsinneqassanngippat maleruagassap taassuma unioqqutinniarneqarnerani inigisamik attartortinneqartup tamanna nalunaarutigerusunnerusinnaassavaa.

Kisiannili piginneqatigiilluni inissiatip tigungnerani pitsaassusiatut itsillugu utertinneqarnissaa isumaqatigiissutigineqarsinnaavoq.

Imm. 3-mut

Inigisamik attartortinneqartup siulersuisut akuersisimagaluarpata akuersisimanngikkaluarpataluunniit imm. 3 naapertorlugu attartukkamik atuinini allanut tunniutissanngilaa.

§ 65-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkat allannguuteqartumi § 4, imm. 2 assigaa.

Aalajangersakkap atuutilerneratigut Namminersornerullutik Oqartussat imaluunniit kommuni inigisamik allamut attartortitsisarnermut maleruagassanut ilaatinneqanngillat, attartornerit ingerlareersut siulersuisunit akuerineqarnissaat pisariaqanngitsoq tassunga ilaalluni. Attartornermik ingerlareersumik ingerlatsiinnarnissamut pisinnaatitaaffik atuutiinnassaaq.

§ 66-imut

Aalajangersagaq nutaajuvoq.

Imm. 1-imut

Aalajangersagaq manna naapertorlugu attartortoq imaluunniit inigisamik attartortinneqartoq inissiami piginneqataasut atuisinnaatitaaffigisaani, kisiannili piginneqatigiilluni inissiatillit peqatigiiffiannit pigineqartumi najugaqarnerminut atatillugu pisinnaatitaaffimminik killilersugaavoq. Taamaattumik aalajangersakkap atuutilerneratigut, piginneqataasup attartortoq imaluunniit inigisamik attartortinneqartoq attartornermi piginneqataasunik ilaasortaajunnaarsitsisarneq pillugu killilersuutaasunik allakkatigut ilisimatittussaavaa. Tassalu piginneqataasoq ilaasortaajunnaarsinneqarpat, tamatuma peqatigisaanik inissiamik piginneqataaffiusumik attartortumut imaluunniit inigisamik attartortinneqartumut isumaqatigiissut atorunnaartussaavoq. Tamatumani attartortoq imaluunniit inigisamik attartortinneqartoq isumaqatigiissummik unioqqutitsisimannginnersoq apequtaatinneqanngilaq. Tamanna siunnersuummi § 81, imm. 1-imi sukumiinerusumik sammineqarpoq. Attartortoq imaluunniit inigisamik attartortinneqartoq piginneqataasumut naleqqiulluni piginneqatigiilluni inissiatillit peqatigiiffiata tungaanut pitsaannerusunik atugassaqartinneqalersinnaanngilaq.

Namminersornerullutik Oqartussat imaluunniit kommuniq attartortumut ilisimatitsisussaataitanera illuutit attartortittakkanik inissiarqartut piginneqatigiilluni inissiatillit peqatigiiffiannut tunniunneqarnerisa nalaanni atuutilissaaq.

Imm. 2-mut

Aalajangersagaq piginneqataasumut, imm. 1 naapertorlugu ilisimatitsisussaataitanerminik sumiginnaasumut pineqaatissiissutaasinnaasutut aalajangersagaavoq. Piginneqataasup ilisimatitsisussaataitanini sumiginnarpagu, piginneqataasoq attartortup imaluunniit inigisamik attartortinneqartup attartorunnaarnerup kingunerisaanik annaasasaanut taarsiinissamut akisussaasunngortinneqassaaq. Annaasassat taarsiisussanngortitaasarnermut maleruagassat nalinginnaasut malillugit naatsorsorneqassapput.

§ 67-imut

Aalajangersagaq nutaajuvoq.

Imm. 1-imut

Aalajangersakkami piginneqataasup piginneqataassutimi inummut allamut tunniunneqarnissaanik siulersuisut qinnuigalugit piginneqatigiilluni inissiatillit peqatigiiffianni ilaasortaajunnaarsinnaanera aalajangersarneqarpoq. Tunniussinissap

tungaanut pineqartoq piginneqatigiilluni inissiatillit peqatigiiffianni ilaasortaaginnarluni pisussaaffinnik pisinnaatitaaffinnilu ingerlatsiinnassaaq.

Siulersuisut suliassamisut pingaarnertut aammalu siulersuisuni suliassanik ilumoorussillutik isumaginnittussaannerminnut atatillugu piginneqataassutip tunniunneqarnissaata sulissutiginnissaa pisussaaffigaat. Iliuuseqannginneq aammalu piginneqataasup saaffiginnissutaanik isiginninngitsuusaarneq siulersuisut ataatsimeersuarnermi tunuartinneqarnerannik, aammalu siulersuisutut akisussaaffimminnut pisussaaffilerneqarnerannik kinguneqarsinnaavoq.

Imm. 2-mut

Aalajangersakkami piginneqataassutip tassanilu pisinnaatitaaffiit pisussaaffiillu piginneqataasumut nutaamut tunniunneqarnissaasa tungaanut piginneqataasup piginneqatigiilluni inissiatillit peqatigiiffianni ilaasortaaginnarnissaa aalajangersarneqarpoq. Aalajangersakkakut piginneqatigiilluni inissiatillit peqatigiiffiata inissiat amerlaqataannik ilaasortaqaannarnissaa qulakkeerniarneqarpoq. Piginneqataasut arlaalluunniit nammineerluni piginneqatigiilluni inissiatillit peqatigiiffiannut pisussaaffimminik unitsitsinerminik nalunaaruteqarsinnaanngilaq. Piginneqataassutip piginneqataalersussamut tunniunneqarnissaa pillugu isumaqatigiissuteqartoqarpat, aammalu piginneqataalersoq piginneqatigiilluni inissiatillit peqatigiiffianni piginneqataasimasup pisussaaffiinik tigusippat, aatsaat piginneqataasoq pisussaaffeerutsinneqassaaq.

Imm. 3-mut

Aalajangersagaq manna naapertorlugu siulersuisut piginneqataasup piginneqataassutimi tunineqarnissaanik qinnuteqaataanik tigusinermini, piginneqataasumut aappaasup tamatumunnga akuersisimanissaa qulakkiissavaat, tamanna pisimangippat allamut tunniussinissamut suliaq aallartinneqarsinnaanngimmat.

§ 68-imut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 33 taarserlugu.

Imm. 1-imut

Aalajangersakkami piginneqataassummut tunniunneqartussamut akigititassap annerpaaffissaa aalajangersarneqarpoq. Tassani akigititassap annerpaaffissarpiaata naatsorsorneqarnissaa pineqarpoq, taamaattumillu akigititassap annerpaaffissaa anguneqarsinnaanersoq ilimagineqarsinnaanani. Taamaattumik naggataagut piginneqataassummut akigititassamut pisiassaqarneq piumannittoqarneralu

apeqqutaassapput, taamaattorli akigititassaq aalajangersakkami naatsorsuinnermit qaffasinnerutinneqarsinnaangilaq.

1-mut) Piginneqataasup aallaqqaatissatut akiliutai.

2-mut) Piginneqataasup piginneqatigiilluni inissiaatit pigisarilernerannut atatillugu piginneqatigiilluni inissiaatillit peqatigiiffiata taarsigassarsiaanut akiliutigisimasai.

3-mut) Piginneqatigiilluni inissiaammi pitsanngorsaatit nalingi, tak. § 69.

4-mut) Piginneqatigiilluni inissiaatip illuutillu aserfallatsaaliorneqannginnerata nalinga.

5-mut) Piginneqataasup piginneqatigiilluni inissiaatillit peqatigiiffianni ingerlatsinermit sinneqartoorutitut naatsorsorneqartunit aamma sillimmatissatut illuartitanit atorineqarsimanngitsunit pisassai.

Imm. 2-mut

Aalajangersakkami allaaserineqarput aningaasartuutissat suut qaffanneqassanersut aammalu qanoq annertussusilerneqassanersut. Qaffaanerit tamatigut januaarip ulluisa aallaqqaataanni pisassapput. Piginneqataassummut akigititaasumut ukiup qanoq ilinerani tunniussinerup pisimanera apeqqutaanngilaq.

Tassani erniat erniaannut qaffaasarneq pineqarpoq, taamaattumillu qaffaanermi tamatigut piffissami pineqartumi aningaasartaliussatut qaffanneqarsimasut naapertorneqartassapput. Taamaattumik qaffaanermut aningaasartaliussaq ukiut tamaasa qaffattassaaq. Assersuut:

Aningaasat qaffanneqartussat = 100.000 koruunit.

Qaffaanermi aallaaviusussaq = 6,5 %.

Ukiumi siullermi qaffaaneq: $100.000 \text{ koruunit} / 100 \times 6,5 \% = 6.500 \text{ koruunit}$.

Ukiup aappaani qaffaaneq: $106.500 \text{ koruunit} / 100 \times 6,5 \%$ (tassanili qaffaanermi aallaaviusooq allanngorsimasinnaavoq) = 6.922,50 koruunit.

Taamatullu ingerlaqqissaaq.

Piginneqataassuttip akiata annerpaaffissaanik naatsorsuisarnermut maleruagassanut atuuttuusimasunut naleqqiullugu aalajangersakkami matumani pineqartut makku pingaartumik allannguuteqartinneqarput:

- Erniap kisitsisitaat + 3 % erniap kisitsisitaanut + 1,5 %-imut allanngortinneqarpoq.
- Pitsanngorsaanermut piginneqataassumullu akilersuutit ernialersorneqassanngillat.

- Piginneqataassummut illuutip nalingata qaffaatai ilassutigineqassanngillat.
- Piginneqataassummut ingerlatsinermi sinneqartoorutit sillimmatissatullu illuartitat atugassanngortinneqarsimannngitsut ilassutigineqassapput.

Imm. 3-mut

Piginneqataassummut akiusut, piginneqatigiilluni inissiaatillit peqatigiiffiata inissiaataanik atuilermissamut akuersissutip sananeqarnissaata tungaanut piginneqataasut akiliutaat naapertorlugit naatsorsorneqartussaanerit aalajangersakkami allassimavoq.

§ 69-imut

Aalajangersagaq nutaajuvoq.

Imm. 1-imut

Aalajangersakkami pitsanngorsaanerit naatsorsuinermit ilaatinneqassappata, pitsannguinerup piviusunngorsimanissaa nalunaarneqarpoq. Iliuserineqartoq pitsannguinerit isigineqassanersoq aalajangiinnermi, ilaatigut iliuuserineqartup piginneqatigiilluni inissiap atornerarnerata nalinganut qaffaataasinnaanersoq, imaluunniit tassani taamaallaat aserfallatsaaliuineq nalinginnaasoq allannguinerilluunniit pineqarnersut naliliinnermi pingaartinneqassaaq.

Tassalu assersuutigalugu piginneqatigiilluni inissiap aalamik milluaaserneqarnera, aalamik milluaammik atorluarsinnaasumik pioreersumik taarsiinnermit naleqqiullugu atuinerup nalinganut qaffaataassaaq. Kisiannili aalamik milluaammik aserorsimasumik taarsiineq aserfallatsaaliuineruvoq nalinginnaasoq.

Allanngorsaaneq pitsannguinerit isigisariaqanngilaq. Tamatumani pingaarutilik tassaavoq allanngorsaaneq pineqartoq atuinerup nalinganut qaffaataasimanersoq.

Pitsanngorsaanerup nalinga taamatuttaaq pissarsinnermit akiusoq, pisoqaassuseq nungullarnerillu eqqarsaatigalugit aalajangersarneqassaaq.

Imm. 2-mut

Aalajangersakkami pitsannguinerup tunisinermi ilaatineqarnissaanut, pitsannguinerup siulersuisunit allakkatigut akuerineqarsimanissaa piumasarineqarpoq. Pitsannguinerup suliarineqarneraniit kingusinnerpaamik qaammatit arfinillit qaangiunnerini allakkatigut akuersissut tunniunneqassaaq. Tunisinermi pitsannguinermit allakkatigut akuersissummik takutitsisoqarsinnaatinnagu, aningaasartuutit taakku naatsorsukkanut ilaatinneqarsinnaanngillat. Qaammatinik arfinilinnik piffissaliineq siusinnerpaamik peqqussutissap matuma atuutilerneraniit naatsorsorneqarsinnaavoq. Piffissaq manna sioqqullugu iliuuserisat pitsannguinerit naatsorsuutigineqarsinnaanersut, iliuuserisat suliarineqarnerini maleruagassat atuuttut naapertorlugit aalajangiiffigineqassapput.

§ 70-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 35, imm. 1 aamma imm. 2 assigai.

Imm. 1-imut

Aalajangersagaq naapertorlugu piginneqataasumut aappaasup qimagaasup piginneqataasumik tigusinissaq, aammalu atugassarititaasut allanngortinnagit piginneqataasutut nutaatut ingerlaannarnissaq pisinnaatitaaffigaa. Aappaasooq qimagaasooq tamatumunnga atatillugu piginneqataassummik, nammineq aterminik allassimasumik tunineqassaaq. Aalajangersagaq aqukkuminartuuvoq, aappaasup qimagaasup erninnaartumik pisinnaatitaaffigiligaanut tunngasuugami. Taamaattumik piffissap qanorluunniit ilinerani naliliisoqartussaangilaq.

Piginneqataassummut akiusooq § 68 naapertorlugu akiusumik naatsorsuisarneq malillugu naatsorsorneqartunit qaffasinnerutinneqassangilaq.

Imm. 2-mut

Aalajangersagaq imm. 1-imut tapertatut atuuppoq, tassani inuk piginneqataasup toqunissaa sioqqullugu sivikinnerpaamik ukiuni marlunni piginneqataasumut inoqutaasimasooq, imm. 1 naapertorlugu aappaasumut qimagaasumut atugassarititaasut assiginik atugassaqartinneqarluni piginneqataasutut ingerlaqqinnissamut pisinnaatitaaffilerneqarami. Tassalu inooqataasutut atugaqarsimansooq tassani piumasarineqanngilaq, inoqutaasimaneq kisimi piumasarineqarluni. Pineqartup piginneqatigiilluni inissiami najugaqartutut inuit allattorsimaffianni nalunaarsorsimanissaa piumasarineqarpoq.

§ 71-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 35, imm. 5 assigaa.

Imm. 1-imut

Aalajangersakkami piginneqataasooq, assersuutigalugu utoqqalinini imaluunniit napparsimanini pissutigalugu illumut paaqqinnittarfirmut assigisaanulluunniit nuuppat § 70-ip tamatumunngattaq atorneqarnissaa aalajangersarneqarpoq.

Imm. 2-mut

Aalajangersagaq manna naapertorlugu siulersuisut tamatumunnga tunngavissaqarluarunik akerliusinnaapput. Tamanna immikkut pisoqarsimatillugu,

tassalu piginneqataalersussap piginneqatigiilluni inissiatillit peqatigiiffiata torersaarnissamut maleruagassaanik arlaleriarluni unioqquitsisimanera uppersaatissaqarpat, imaluunniit piginneqatigiilluni inissiatillit peqatigiiffiata katitigaanerata eqqarsaatigineqarnissaa tamatumunnga tunngaviuppat pisinnaavoq.

Tunngavilersuutit taamaattut naleqquttuussapput piviusunillu tunngaveqassallutik.

§ 72-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 35, imm. 3 assigaa.

Imm. 1-imut

Aalajangersagaq piginneqataasup averusersimaneranut, avissimaneranut aappaqarnerataluunniit atorunnaarsinneqarsimaneranut tunngasuvoq. Taamatut pisoqartillugu aappariinni arlaat piginneqataasutut ingerlannarnissaanik aalajangiiniarnermi, pisariaqassappat akuersissut eqqartuussulluunniit atorineqassaaq. Tunniussisoqassappat, piginneqataassummut akiusoq § 68 naapertorlugu akiusumik naatsorsuisarneq malillugu naatsorsorneqartunit qaffasinnerutinneqassanngilaq. Tassani akigititassap annerpaaffissaata naatsorsorneqarnissaa pineqarpoq, taamaattumillu akigititassap annerpaaffissaa anguneqarsinnaanersoq qulakkeerneqarsinnaanngilaq.

Imm. 2-mut

Aalajangersagaq manna naapertorlugu siulersuisut tamatumunnga tunngavissaqarluarunik akerliusinnaapput. Tamanna immikkut pisoqarsimatillugu, tassalu piginneqataalersussap nutaap piginneqatigiilluni inissiatillit peqatigiiffiata torersaarnissamut maleruagassaanik arlaleriarluni unioqquitsisimanera uppersaatissaqarpat, imaluunniit piginneqatigiilluni inissiatillit peqatigiiffiata katitigaanerata eqqarsaatigineqarnissaa tamatumunnga tunngaviuppat pisinnaavoq.

Tunngavilersuutit taamaattut naleqquttuussapput piviusunillu tunngaveqassallutik.

§ 73-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 36 assigaa.

Imm. 1-imut

Aalajangersakkami piginneqataasoq piginneqataassutiminik inooqatiminut tunniussinissamut pisinnaatitaaffilerneqarpoq, tassani inooqataasoq

inooqatigiinnerup taamaatinneqarnissaa sioqqullugu sivikinnerpaamik ukiuni marlunni inoqutaasimappat. Piginneqataassummut akiusoq § 68 naapertorlugu akiusumik naatsorsuisarneq malillugu naatsorsorneqartunit qaffasinnerusinnaangilaq.

Imm. 2-mut

Aalajangersagaq manna naapertorlugu siulersuisut tamatumunnga tunngavissaqarluarunik akerliusinnaapput. Tamanna immikkut pisoqarsimatillugu, tassalu inoqataasup piginneqatigiilluni inissiatillit peqatigiiffiata torersaarnissamut maleruagassaanik arlaleriarluni unioqqutitsisimanera uppersaatissaqarpat, imaluunniit piginneqatigiilluni inissiatillit peqatigiiffiata katitigaanerata eqqarsaatigineqarnissaa tamatumunnga tunngaviuppat pisinnaavoq.

Tunngavilersuutit taamaattut naleqquttuussapput piviusunillu tunngaveqassallutik.

§ 74-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 37 tamakkiisumik assigaa.

Imm. 1-imut

Aalajangersakkami piginneqataassut kingornussinikkut inummut inissiami najugaqanngitsumut tunniunneqassappat, tunniussinissap siulersuisunit akuerineqarnissaa aalajangersarneqarpoq.

Imm. 2-mut

Aalajangersakkami tamatumunnga tunngavissaqarluartillugu aatsaat akuersinissap imm. 1 naapertorlugu akerliuffigineqarsinnaanera aalajangersarneqarpoq. Akuersinissaq akerlilerneqarpat, siulersuisut piginneqataassummik tunisinermi pissarsiarineqartut kingornussisumut tunniutissavaat. Piginneqataassummut akiusoq § 68 naapertorlugu akiusumik naatsorsuisarneq malillugu naatsorsorneqartunit qaffasinnerusinnaangilaq.

§ 75-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 38 assigaa.

Aalajangersakkami §§ 70-74-mi taaneqartunit allaanerusunik pisoqartillugu, tamannalu piginneqatigiilluni inissiatillit peqatigiiffiata malittarisassaanni

aalajangerneqarsimatillugu piginneqataassutit tunniunneqarsinnaanerat aalajangersarneqarpoq.

§§ 70-74-mi tunniussisarnerni pisartut takussaanerpaasartut taagorneqarput.

Aalajangersakkamili piginneqatigiilluni inissiatillit peqatigiiffiat pisuni allani qanoq iliorluni atugassarititaasullu suut tunngavigalugit tunniussisarnissamik maleruagassani aalajangersaanissamut pisinnaatitaaffilerneqarpoq. Tamatumanili pineqanngitsuni pingaarutilik tassaavoq, piginneqatigiilluni inissiatillit peqatigiiffiata tunniussinermut atatillugu atugassarititaasussatut piginneqataassutip tunniunneqarnerani akigititassaq, § 68-imi akiusup naatsorsorneqarneranit qaffasinnerusumik aalajangersarsinnaanngikkaa.

§§ 70-74-imi taaneqartut saniatigut pisuni allani piginneqataassutinik tunniussinermut tunngatillugu maleruagassani nalinginnaasuni, Naalakkersuisunit suliarineqarsimasut ilaanni aalajangersagaasimasinnaasut, aamma aalajangersakkami matumani pineqarput.

§ 76-imut

Aalajangersagaq nutaajuvoq.

Imm. 1-imut

Aalajangersagaq manna naapertorlugu siulersuisut piginneqataajunnaartussallu inissiamit nuunnissamut piffissaq kiisalu inissiap misissorneqarnissaanut, piginneqataasup ilisimasalimmik ilaqlarluni peqataasinnaatitaaffigisaanut piffissaq, akunnerminni isumaqatigiissutigissavaat.

Piginneqatigiilluni inissiatillit peqatigiiffiata nalinginnaasumik immersugassaq assigiissaagaasoq, krydsilersuinikkut piginneqatigiilluni inissiap qimanneqarnerani qanoq issusianut tamakkiisumik takutitsisussaq atussavaa. Illuatungeriit illersorniarlugit immersugaq siulersuisut sinniisaannit taamatullu piginneqataasumit atsiorneqartariaqarpoq.

Imm. 2-mut

Aalajangersagaq naapertorlugu siulersuisut piginneqatigiilluni inissiatip qanoq issusia, kiisalu suliassat, piginneqataajunnaartussap akiligaanik suliarineqartussat pillugit nalunaarusiussapput. Piginneqataasup suliassat suut piginneqataasup akiligaanik suliarineqassanersut pillugit siulersuisut akerlerippagit, tamanna nalunaarummi allanneqassaaq.

Piginneqataajunnaartussap akiligaanik suliassat annertuussusaat akerleriissutigineqarpat, siulersuisut kingusinnerusukkut uppernarsaatissanik takutitsinnaajumallutik pissutsit akerleriiffiusut uppernarsaatissatut assilisaqattaartariaqassavaat, taamaalilluni suliassat aaqqiagiinnginnerup

aaqqinneqarnissaata tungaanut utaqqisinnagit suliarineqarniassammata. Pingaaruteqarporli uppersaatissatut assilisat tunngavigineqarnissaasa isumaqatigiissutigineqarnissaat, taamaattumik nalunaarusiaq tamatumunnga nalunaarummik imaqartinneqassaaq. Misissuinermi illuatungeriit peqataasimappata, misissuinermit nalunaarut tamakkiisoq illuatungeriinnit atsiorneqartariaqarpoq.

Imm. 3-mut

Aalajangersagaq manna naapertorlugu piginneqataasoq misissuinissamut takkutinnigippat, misissuinermi nalunaarusiaq siulersuisut piginneqataasup akiligaanik suliassanngortitsinissamut tunngavissanngortissinnaavaat. Piginneqataasup takkutinniginnera pissutigerpiarlugu misissuinermi nalunaarusiaq illuatungeriinnit atsiorneqarsinnaanngilaq. Taamaakkaluartoq misissuinermi nalunaarusiaq tunngavissanngortinneqarsinnaavoq.

Imm. 4-mut

Aalajangersagaq manna naapertorlugu suliassanut, piginneqataasup akiligaanik suliaritinneqartunut aningaasartuutit tunisinermut iluanaarutinit ilanngaatigineqassapput. Aningaasartuutit matussuserneqanngitsut piginneqataasup inissiamit nuuttup piginneqatigiilluni inissiatillit peqatigiiffiannut akilissavai.

§ 77-imut

Aalajangersakkap najoqqutassatigut allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 34 assigaa.

Imm. 1-imut

Aalajangersakkap atuutilerneratigut piginneqataassutininik tunniussineq piginneqataasunit ataasiakkaanik isumagineqarani siulersuisunit isumagineqartussaavoq.

Imm. 2-mut

Aalajangersakkami najoqqutassat, piginneqataasumut nutaamut, piginneqatigiilluni inissiatillit peqatigiiffiannut ilaasortanngorneranut atatillugu tunniutissallugit siulersuisut pisussaaffigisai taagorneqarput.

Imm. 3-mut

Aalajangersagaq manna naapertorlugu piginneqataassummik pisisup piginneqataasuttip akiata nalinga piginneqatigiilluni inissiatillit peqatigiiffiannut akilissavaa, taassanilu pissarsiassaasinnaasut aningaasartuutaasinnaasullu ilanngaatigereernerini aningaasat sinneri piginneqataajunnaartumut akilerneqassapput. Piginneqatigiilluni inissiatillit peqatigiiffiat avataaniit

pilersuisumit, ukiumoortumik naatsorsuusiortartumit imermik ataatsimoorussamik imaluunniit innaallagissamik ataatsimoorussamik pisisarpat, piginneqatigiilluni inissiatillit peqatigiiffiat aningaasanik annikitsunik naammaattunillu, atuinermut naatsorsuutit saqqummiunneqarnerinut atatillugu tapiutaasinnaasunut matusissutissanik piginneqataajunnaartup pissarsiassaanit ilanngaassisinnaavoq.

Imm. 4-mut

Aalajangersagaq manna naapertorlugu tunniussinermi piginneqataalersup piginneqataajunnaartumut allanik isumaqatigiissuteqarnissaa piunasaqaatigineqarsinnaanngilaq, tassanili taamaallaat pequtinik, immikkut piginneqatigiilluni inissiamut naleqqussarneqarsimasunik ikkunneqarsimasunilluunniit pisineq pineqanngilaq. Aalajangersakkami pineqartut suunerinut killiliinermi pequt pineqartoq aalaakkaasuunersoq aalaakkaasuunnginnersorluunniit tunngavigineqassaaq. Tassani pequtit aamma atortulersuutit teknikkimut tunngassuteqartut tunngassuteqanngitsullu, soorlu silaannarissaateqarfiit imaluunniit sikaaviit ikkussukkat eqqarsaatigineqarput.

Aalajangersagaq atituumik, aammalu isumaqatigiissutinut qanorluunniit ittunut tunngasutut paasineqassaaq. Tamatuma kingorna isumaqatigiissut alla, tunniussinermi piunasaqaateqarfiusoq, assersuutigalugu nammineerluni allakkiatut oqaluinnarnikkulluunniit isumaqatigiissutaasimanersoq apeqqutaajunnaassaaq.

Aammattaaq erseqqissarneqassaaq, tunniussinissamut isumaqatigiissutinik allanik piunasaqaateqarnissamik inerteqquteqarnermut sanilliullugu, allanik isumaqatigiissusiornissaaq inerteqqutigineqanngimmat, tamatumanili isumaqatigiissutit allat taamaallat tunniussinissamut piunasaqaatinik nassataqassanngimmata.

§ 78-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkat allannguuteqartumi § 43, imm. 1-ip ilaa assigaa.

Aalajangersakkami pisut, siulersuisut piginneqatigiilluni inissiatillit peqatigiiffianni ilaasortamik ilaasortaajunnaarsitsinissaannut pisussaaffiliisut taagorneqarput.

Aalajangersakkap atuutilerneratigut siulersuisuni nakkutilliisut piginneqataasup piginneqatigiilluni inissiatillit peqatigiiffiannut aningaasatigut iluarsisassai aammalu piginneqataasup peqqussummik matuminnga malinninnersoq nakkutigissavaa.

Tassalu ilaasortaajunnaarsitsineq inatsisit malillugit atuuttussamik makkuninnga malitseqassaaq:

- Piginneqatigiilluni inissiatillit peqatigiiffianni ilaasortaaneq atorunnaassaaq.

- Piginneqataassummik tunisinissamik innersuussisinnaatitaaneq atorunnaassaaq.
- Piginneqatigiilluni inissiamik atuisinnaatitaaneq atorunnaassaaq.
- Inissiamit nuunnissamik pisussaaffiliisoqassaaq.

Piumasaqarnermi piffissarititaasup naatsorsorneqarneranut arfininngornerit sapaatillu, aammalu nalliuttut ilaatinneqassanngillat. Piumasaqarnermi piffissarititaasoq piumasaqaatip allakkatigut tiguneraniit qaammammi ulluinnaat arfineq aappaata, 14-ata 30-atalu naanerani naassaaq.

§ 79-imut

Aalajangersagaq nutaajuvoq.

Imm. 1-imut

§ 78 siulersuisut pisut ilaanni ilaasortaajunnaarsitsinissamut pisussaaffeqarnerannut tunngasuvoq, aalajangersagarlu manna ataatsimeersuartut qaqugukkut piginneqatigiilluni inissiatillit peqatigiiffianni ilaasortamik ilaasortaajunnaarsitsinissamik pisussaaffeqarneranut tunngasuulluni. Piginneqataasup qaammatini tulleriinni aqqaneq marlunni siulersuisunit malinninnissamik allakkatigut pingasoriarluni peqquneqartarsimagaluarluni, piginneqatigiilluni inissiatillit peqatigiiffiata torersaarnissamut maleruagassaanik malinnittussaanini sumiginnarsimappagu tamanna pissaaq. Aamma pissutsit ilaasortaajunnaarsitsinermut tunngavigineqartut attartortup, inissiami ilaasortap atuisinnaatitaaffigisaani inimik ataatsimik attartorsimasup pisuussutigippagit, ilaasortaajunnaarsitsinissamut pisussaaffik atorneqassaaq.

Tassalu ilaasortaajunnaarsitsineq inatsisit malillugit atuuttussanik makkuninnga malitseqassaaq:

- Piginneqatigiilluni inissiatillit peqatigiiffianni ilaasortaaneq atorunnaassaaq.
- Piginneqataassummik tunisinissamik innersuussisinnaatitaaneq atorunnaassaaq.
- Piginneqatigiilluni inissiamik atuisinnaatitaaneq atorunnaassaaq.
- Inissiamit nuunnissamik pisussaaffiliisoqassaaq.

Piumasaqarnermi piffissarititaasup naatsorsorneqarnissaa pillugu § 78-mut oqaaseqaatit innersuussutigineqarput.

Imm. 2-mut

Aalajangersakkami piginneqataasoq piginneqatigiilluni inissiap iluani aserfallatsaaliugassanik suliaqarnissamut siulersuisunit allakkatigut pingasoriarluni peqquneqartarsimagaluarluni suliaqarnissanik isumaginnissimanngippat, ataatsimeersuartut piginneqataasumik ilaasortaajunnaarsitsinissanerat periarfissinneqarpoq. § 58 naapertorlugu siulersuisut aserfallatsaaliugassat

suliarineqarnissaannut piffissaliillutik allakkatigut peqqussutinik pingasunik piginneqataasumut nassiussisusaapput. Peqqussutip pingajuani piffissaliussap naanerata kingorna ataatsimeersuartut ilaasortamik ilaasortaajunnaarsitsinissamik pisinnaatitaaffeqarput.

Aalajangersakkap atuutilerneratigut siulersuisut pingasoriarlutik allakkatigut peqqussuteqarsimanngippata, ataatsimeersuartut ilaasortap aserfallatsaaliuisimannginnera pissutigalugu ilaasortamik ilaasortaajunnaarsitsinissanngillat.

Aalajangersagaq aappaatigut ataatsimeersuartut qinigassinneqarnerannik imaqarpoq, taamaattumillu pisussaaffeqarneq tassani pineqanngilaq. Aalajangersagaq ilaasortanik peersitsinissamik kissaateqarneq tunngavigalugu malersuinnermut atorneqaqqusaanngimmat, ataatsimeersuartut aatsaat aserfallatsaaliuinnginneq piginneqatigiilluni inissiatillit peqatigiiffiata illuutaani ataavartussamik ajoqusiiisussanngorsimappat ilaasortamik ilaasortaajunnaarsitsinissaassapput. Aserfallatsaaliugassat annikitsut pineqartillugit ataatsimeersuartut siulersuisut, aserfallatsaaliugassat piginneqataasup akiligaanik piginneqatigiilluni inissiatillit peqatigiiffiannut suliaritinnissaannut periarfissamik atueqqullugit peqqussavaat. Taamatut pisoqartillugu piginneqataasoq ilaasortaajunnaarsinneqassanngilaq.

Tamatumani pineqartoq ilungersunartuunersoq imaluunniit ilungersunannginnerunersoq naliliisarnissaq annertuumik pingaaruteqarpoq. Piginneqataasumik ilaasortaajunnaarsitsinissaq akuliunnerummat annertoq, ataatsimeersuartut suliaminni tutsuiginartumik paasisaqarsimasariaqarput. Tassalu aserfallatsaaliuinissaq piginneqataasup suliaritikkusunngisaa, piginneqatigiilluni inissiatillit peqatigiiffiata illuutaani toqqaannartumik toqqaannanngitsumilluunniit ataavartussamik ajoqusiiisussanngortoq toqqaannartumik uppersaatissaqassaaq imaluunniit ilimatsaassisimaneq annertuujussalluni. Tassani pineqartoq assersuutigalugu tassaasinnaavoq imermut ruujori ussiitsoq piginneqatigiilluni inissiap ataaniittup natianik, toqqavianik imaluunniit qilaavanik ajoqusiiisimasoq. Aamma siulersuisut aserfallatsaaliugassatut peqqussutigineqartoq suliarineqarsimanersoq suliarineqarsimannginnerorluunniit paasinialugu piginneqatigiilluni inissiamut iserniarneranni piginneqataasup itigartitsisimanagera piginneqataasumik ilaasortaajunnaarsitsinissamut tunngavigineqarsinnaavoq. Taamatut pisoqarsimappat, piginneqataasup aserfallatsaaliugassanik suliarinnitsissimannginnera ilimagineqarsinnaavoq. Taamaattumillu taamatut pisoqarnera qanorluunniit suliaq inerineqarsimagaluarpat ilungersuuttarialittut taaneqarsinnaavoq.

Pisut amerlanersaanni pissutsit ilungersuuttariaqannginnerit, taamattumillu ataatsimeersuartut piginneqataasumik ilaasortaajunnaarsitsinissaannik pisussaaffiliinngitsut pineqartarput. Tamatumani allaat pissutsit utoqqatsissutissartallit pineqarsinnaapput, soorlu piginneqataasup aallarsimanageranik, taamaattumillu pingasoriarluni allakkatigut peqquneqartarsimagaluarluni nammineerluni aserfallatsaaliuinissamut periarfissaqannginneranik pissuteqartut. Taamaattoqartillugu tamatigut ataatsimeersuartut piginneqataasumik ilaasortaajunnaarsitsinissaassanngillat, siulersuisullu tassunga taarsiullugu

piginneqataasup akiligaanik aserfallatsaaliugassat piginneqatigiilluni inissiatillit peqatigiiffiannut suliaritinnissaannut pisinnaatittaaffitsik atussavaat.

§ 80-imut

Aalajangersagaq nutaajuvoq, tassungalu imm. 3-p piginneqatigiilluni inissiat pillugit Inatsisartat peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 43, imm. 2 taarserpaa.

Imm. 1-imut

Aalajangersakkami ilaasortamik piginneqatigiilluni inissiatillit peqatigiiffiannit ilaasortaajunnaarsitsisarnermi periaatsit malitassat nassuiaatigineqarput. Aalajangersakkami peqqussut inatsisitigut atuutsinneqassaguni qanoq iliorluni piginneqataasumut tunniunneqassanersoq allaaserineqarpoq. Tassalu allakkat nassiunneqartussat marluussapput. Pissutsini § 78, nr. 3-mi aamma 4-mi taaneqartuni, peqqussut aamma piginneqatigiilluni inissiamut piginneqataasup atuisinnaatitaaffigisaanut siulersuisunut ilaasortat marluk nammineerlutik tunniutissavaat. Piginneqataasoq pissarsiarineqarsinnaanngippat, siulersuisunut ilaasortat allakkap piginneqatigiilluni inissiamut, piginneqataasup atuisinnaatitaaffigisaanut tunniunneqarsimanera pillugu nalunaarut atsiussavaat. Nalunaarutip assilineru erngerluni piginneqatigiilluni inissiatillit peqatigiiffiata siulittaasuanut tunniunneqassaaq.

Imm. 2-mut

Aalajangersakkami paasissutissat, siulersuisut ataatsimeersuartulluunniit §§ 78 aamma 79 naapertorlugit nalunaarutaannut minnerpaamik ilaatinneqartussat taagorneqarput. Piginneqataasup ilaasortaajunnaarsinniarneqartup ilaasortaajunnaarsitsinissamut tunngavissanik tamakkiisunik, aammalu ilaasortaajunnaarsitsiniarneq akerlilerneqarsinnaanersoq pillugu misissuisinnaanissaa eqqarsaatigalugu aalajangersagaq ilanngunneqarpoq. Ilaasortaajunnaarsitsiniarnermik nalunaarut allagaassaaq, taamatullu paasissutissat ilaasortaajunnaarsitsiniarnermik nalunaarummut ilanngunneqartut allagaassallutik.

Attartortitsisup ilaasortaajunnaarsitsinissamut akerliliinerani Kalaallit Nunaanni eqqartuussisaaseq pillugu inatsimmut nalunaarummi nr. 99-imi, 21. marts 1984-imeersumi kapitali 7, § 18 malinneqassaaq.

Imm. 3-mut

Aalajangersakkami atuisinnaatitaanerup kingusinnerpaamik qaqugukkut atorunnaarnissaa, tassalu piginneqataasooq qaqugu inissiamit nuussanersoq nalunaarneqarpoq.

Imm. 4-mut

Ilaasortaajunnaarsitsinissamik nalunaarutip nassiunneqarnerani suleriaaseq suna malinneqassanersoq ersarinnerulersinniarlugu, ilaasortaajunnaarsitsinissamik nalunaarutip atorsinnaassaguni tamatigut allakkatut nalinginnaasutut aamma tammatsaalisatut piginneqataasup najugaani allakkanik tiguisarfianut nassiunneqartarnissaa aalajangersakkami aalajangersarneqarpoq.

§ 81-imut

Aalajangersagaq nutaajuvoq.

Imm. 1-imut

Aalajangersakkami piginneqatigiilluni inissiatillit peqatigiiffianni attartortut imaluunniit inigisanik attartortinneqartut peqqussut manna naapertorlugu piginneqataasumik ilaasortaajunnaarsitsisarnermut tunngatillugu piginneqataasumit pitsaanerusunik pisinnaatitaaffeqqannginnissaat aalajangersarneqarpoq. Tamatuma nassatarisaanik ilaasortaajunnaarsitsineq attartortumut imaluunniit inigisanik attartortinneqartumut toqqaannartumik atuuttussanngortinneqassaaq. Namminersornerullutik Oqartussat imaluunniit kommuni piginneqataappat, aammalu inuinnaq piginneqataappat, ilaasortaajunnaarsitsinermullu pissutaasooq suugaluarpalluunniit aalajangersagaq atorineqassaaq. Inissiamik attartortoq imaluunniit inigisanik attartortinneqartoq isumaqatigiisummik sumiginnaasimannikkaluarpalluunniit, attartortitsinermut imaluunniit inigisanik allamut attartortitsinermut isumaqatigiissut atorunnaassaaq. Inissianik attartortitsisarneq pillugu Inatsisartut peqqussutaanni sukkulluunniit atuuttumi maleruagassanut tunngatillugu, aalajangersakkap atuutilerneratigut Namminersornerullutik Oqartussat imaluunniit kommunip aalajangersagaq manna innersuullugu attartortumut attartornermut isumaqatigiissut atorunnaarsissinnaavaat.

Imm. 2-mut

Aalajangersagaq piginneqataasumut ilisimatitsisussaataitanermik imaqarpoq. Tassalu piginneqataasup ilaasortaajunnaarsinneqarneq pillugu attartortuni imaluunniit inigisamini attartortitani allakkatigut ilisimatittussaavaa. Ilisimatitsissummik nassiussinissamut pisussaataitaaffik aatsaat ilaasortaajunnaarsinneqarneq piviusunngorpat atuutilissaaq. Tassalu piginneqataasup peqquneqarnini naammassiniarnagu aalajangerpagu. Tunngaviatigut attartortup imaluunniit inigisanik attartortinneqartup peqqussuteqarnermut, ilaasortaajunnaarsinneqarnermik taamaalillunilu attartortitsinermut inigisamillu allamut attartortitsinermut unitsitsinermik kinguneqartussaannngitsumut tunngasorpiamik ilisimatinneqarnissaaq soqutigisarinngilaat. Allakkatigut ilisimatitsissut piginneqatigiilluni inissiatillit peqatigiiffiata piumasaqaataani piffissaliussap naaneraniit kingusinnerpaamik ulluunnaat tallimat qaangiunnerini attartortup imaluunniit inigisanik attartortinneqartup najugaanut, allanik tiguisarfianut allakkatut nalinginnaasutut aamma tammatsaalisatut nassiunneqassaaq. Ilaasortaajunnaarsitsineq ingerlaannartumik pisimappat, allakkatigut ilisimatitsineq piginneqataasumut tunniunneqassaaq.

§ 82-imut

Aalajangersagaq nutaajuvoq, aammalu piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukut allannguuteqartumi § 44 taarserlugu.

Imm. 1-imut

Aalajangersakkami pisortat taarsigassarsiarititaasa akiligassanngortinneqartarnerannut tunngaviusut taagorneqarput. Tassani tunngaviuvoq, pissutsit aalajangersakkami taaneqartut pitillugit pisortat taarsigassarsiarititaat akiligassanngortinneqassasut, kisiannili pisuni aalajangersimasuni taarsigassarsiat akiligassanngortinneqanngiinnarnissaat aalajangissallugu Namminersornerullutik Oqartussat imaluunniit kommuni periarfissaqartut. Pisut ataatsimut isigalugit pisuni ataasiakkaani taarsigassarsiarititassat akiligassanngortinneqarnissaat iluaqutaanani artukkiinerusinnaavoq. Tamatumani pisup aalajangersimasup naliliiffigineqarnera tamatigut tunngavigineqartassaaq, aammalu pinngitsoorani immikkorluinnaq ittumik pisoqarsimassalluni. Aalajangersakkami qularnaveeqqusiisinnaatitaanermut pissutsit maleruagassiuunneqarnissaat siunertarineqanngilaq, taamaallaalli taarsigassarsianut allanut aammalu pisinnaatitaaffinnut nalunaarsorsimasunut allanut naleqqiullugu qularnaveeqqusiisinnaatitaanermi inissisimanerup erseqqissarneqarnissaa siunertarineqarluni

Nr. 1-4

Akiligassanngortitsisarnermut tunngaviusartut amerlanersaat paatsoorneqarsinnaanngitsumik ersaripput, taamaattumillu taakkununga atatillugu immikkut ittumik oqaaseqaateqartoqassanngilaq. Taamaattorli nr. 4-mut tunngatillugu oqaatigineqassaaq, tassani akiligassanngortitsisarnermut tunngaviusoq pisortat aningaasatigut isumannaatsumik aqutsinissaannik periarfissinniarlugit ilanngunneqarsimammat. Inuinnaat piginneqatigiilluni inissiatillit peqatigiiffiinut pisortat ingerlatsinermut tunngatillugu tunngaviatigut sunniuteqarfigisinnaanngisaminnik aningaasarpassuarnik uninngasussanik aningaasaliisimapput aningaasaliisartussaallutillu. Tamatuma nassatarisaanik pisortat, piginneqatigiilluni inissiatillit peqatigiiffianni akisussaassuseqanngitsumik ingerlatsisoqarneratigut aningaasaqarnikkut annaasaqaratarsinnaapput.

Nr. 5-8

Tassanissaaq akiligassanngortitsisarnermut tunngaviusartut amerlanersaat paatsoorneqarsinnaanngitsumik ersaripput, taamaattumillu tamatumunnga atatillugu immikkut ittumik oqaaseqaateqartoqassanngilaq. Taamaattorli nr. 8-mut tunngatillugu erseqqissaatigineqassaaq, aalajangersagaq marlunnut immikkoortitaammat. Tassalu piginneqatigiilluni inissiatillit peqatigiiffiata ukiumoortumik naatsorsuutit kingumoortumik misissortinngippagit, kiisalu piginneqatigiilluni inissiatillit peqatigiiffiata ukiumoortumik naatsorsuutini

pisortanut taarsigassarsititsisunut nassiutinnippagit, tamanna akiligassanngartitsinissamut tunngavigineqassaaq.

Nr. 9-12

Tassanissaaq akiligassanngartitsisarnermut tunngaviusartut amerlanersaat paatsoorneqarsinnaanngitsumik ersaripput, taamaattumillu tamatumunnga atatillugu immikkut ittumik oqaaseqaateqartoqassanngilaq. Taamaattorli nr. 9-mut tunngatillugu immikkut erseqqissaatigineqassaaq, suliat ingerlasarnerini aalajangersakkap pisariaqarnera paasinarsisimammat. Pisortat pisuni arlalinni paasisarsimavaat, piginneqatigiilluni inissiatillit peqatigiiffianni ilaatigut aningaaserisup suliassaminik isumagisaqarnissamut piginnaanerisa amigarnerat, ilaatigullu aningaaserisup aamma piginneqatigiilluni inissiatillit peqatigiiffiata kukkunersiuusuaata akornanni attaveqatigiinnerup amigarnera pissutigalugit aningaasaqarnermik aqutsinerat naammattanngitsoq. Naatsorsuuserisarnermut maleruagassanut nalinginnaasunut naleqqiullugu naatsorsuusiorneq naammannngitsoq ataatsimut isigalugu uppersarsarneqarsinnaasumillu paasineqarpat, akiligassanngartitsisarnermut aalajangersagaq atorineqassaaq. Taamatut uppersarsaasariaqalerneq naatsorsuutitut najoqqutarisat, piginneqatigiilluni inissiatillit peqatigiiffiata kukkunersiuusuanut saqqummiunneqartut amigaateqartorujussuunerini ikipallaarnerinilu pisinnaavoq, aammalu piginneqatigiilluni inissiatillit peqatigiiffiata kukkunersiuusuaata naatsorsuutitut najoqqutassat taaneqartut tunngavigalugit pissarsiariuminaannerat nalunaarutigippagu pisinnaalluni. Kukkunersiuusutut sulinermi kinaassusersiortuunnginnissaaq naapertorlugu kinaassusersiunnginnissamut piunnaasaq, kukkunersiuusup nalunaaruteqarneratigut naammassineqassaaq.

Imm. 2-mut

Aalajangersagaq naapertorlugu taarsigassarsiat erniaqanngitsut akilersugassaanngitsullu taamaatinneqarnissaat sioqqullugu, Namminersornerullutik Oqartussat imaluunniit kommuni pineqartoq iluarseqqullugu qaammammik ataatsimik piffissaliillutik piginneqatigiilluni inissiatillit peqatigiiffiannut peqqusissapput.

§ 83-imut

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 45, imm. 1 taarserpaa.

Imm. 1-imut

Aalajangersakkami piginneqatigiilluni inissiatillit peqatigiiffianni piffissap naatsorsuusiorfiusup sivisussissaa, kiisalu ukiumi naatsorsuusiorfiusumi siullermi, imaluunniit piffissaaq naatsorsuusiorfiusoq allanngortinneqarpat qaammatit 18-it tikillugit sivitsuinissamut periarfissiineq nassuiarneqarput.

Imm. 2-mut

Piginneqatigiilluni inissiat pillugit peqqussummut atuuttuusimasumut, piginneqatigiilluni inissiatillit peqatigiiffiata naatsorsuutaasa kukkunersiorneqarnissaannik piumasaaqateqarfiusumut sanilliullugu aalajangersakkami naatsorsuutit kingumut misissorneqartarnissaat aalajangersarneqarpoq, tamatumalu nassatarisaanik kukkunersiuisup pisussaaffii annikillineqarput, kisiannili piginneqatigiilluni inissiatillit peqatigiiffiata aningaasaqarnikkut inissisimanagera pillugu paasissutissiisarnissaq pisariaqartinneqartoq qulakkeerneqarluni.

Piginneqatigiilluni inissiatillit peqatigiiffiat kukkunersiuisutut nalunaarsorsimasumik imaluunniit kukkunersiuisumik naalagaaffimmit akuerisamik atorfinitsitsissanerluni toqqaasinnaavoq. Taamaattumik inuk taamaallaat naatsorsuuserinermik ilisimasaqartoq, imaluunniit kukkunersiuisutut nalunaarsorneqartussatut kukkunersiuisutulluunniit naalagaaffimmit akuerisatut ilinniagaqarnerminik naammassinnissimanngitsoq piginneqatigiilluni inissiatillit peqatigiiffianni kukkunersiuisuutissallugu naammangilaq. Inuit kukkunersiuisoqarfimmik ingerlatsinissamut akuersissummik arsaarneqarsimasut piginneqatigiilluni inissiatillit peqatigiiffianni atorfinitsinneqassanngillat, pineqartoq suli kukkunersiuisutut imaluunniit kukkunersiuisutut naalagaaffimmit akuerisatut taaguuteqaraluarpuunniit.

Kukkunersiuisoq kukkunersiuinermi allattaavinnut allattuisassaaq.

Imm. 3-mut

Aalajangersakkami piginneqatigiilluni inissiatillit peqatigiiffiata siusinnerpaamik kukkunersiuisumik atuinnissamut pisussaaffeqarnera taaneqarpoq, tassanilu piffissat marluk uku pineqarput: Piffissami pisinnaatitaaffiup nalunaarsorneqarnerani, imaluunniit piffissami piginneqatigiilluni inissiatillit peqatigiiffiata piginneqatigiilluni inissiaataanik atuilerrfusumi.

Taamaattumik piginneqatigiilluni inissiatillit peqatigiiffiini ataasiakkaani pisussaaffiup qaqugu atulernissanut piffissarititaasut assigiinngissuteqarnissaat naatsorsuutigineqarsinnaavoq.

Imm. 4-mut

Aalajangersakkami Naalakkersuisut piginneqatigiilluni inissiatillit peqatigiiffiata missingersuusiornissamut, ukiumoortumik naatsorsuusiornissamut, oqaasertaliinissamut kisitsillu pingarnerit allattornissaannut, taakkulu inissiternissaannut maleruagassanik aalajangersaasinnaanerat tunngavissiuunneqarpoq.

Aalajangersakkap piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 45, imm. 2 tamakkiisumik assigaa.

Aalajangersagaq naapertorlugu piginneqatigiilluni inissiatillit peqatigiiffiat, Namminersornerullutik Oqartussanit imaluunniit kommunimit taarsigassarsinermigut piginneqatigiilluni inissianik pisisimasoq, pisussaavoq ukiumoortumik naatsorsuutita ataatsimeersuartunit akuerineqarneranni erngerluni ukiumoortumik naatsorsuutit assilinerinik Namminersornerullutik Oqartussanut aamma kommunimut nassiussissalluni.

Namminersornerullutik Oqartusat kommunillu pisuni arlalinni piginneqatigiilluni inissiatillit peqatigiiffianni ukiumoortumik naatsorsuutinik pissarsiniarneq ajornakusoortittarmassuk, aalajangersagaq ilanngunneqarpoq. Aalajangersakkap atuutilerneratigut piginneqatigiilluni inissiatillit peqatigiiffiat ukiumoortumik naatsorsuutiminik tunniussinissamat pisussaaffilerneqarpoq, taamaalilluni pisortanit taarsigassarsititsisimasut sukkulluunniit piginneqatigiilluni inissiatillit peqatigiiffiata aningaasaqarnera ilisimasinnaassammassuk.

Taamatut paasissutissiinissamik kissaateqarneq Namminersornerullutik Oqartussat aamma kommunip sulianut aningaasaliiffigisimasaminnut pissusissamisoortumik soqutiginninnerannik tungaveqarpoq. Tassalu piginneqatigiilluni inissiatillit peqatigiiffiisa, Namminersornerullutik Oqartussat imaluunniit kommunip aningaasaqarnikkut soqutigisaqarfigisaasa ingerlaavartumik tamakkiisumik malinnaaffigineqarnissaannik kissaateqarneq § 82, imm. 1, nr. 8-mit, pisunik pinartoqarfiunerusunik sammisaqarfiusumit allaaneruvoq.

Kapitali 13

Kapitali 13 ilaatigut piginneqatigiilluni inissiatillit peqatigiiffiannik atorunnaarsitsisarnermut aalajangersakkanik nalinginnaasunik imaqarpoq, ilaatigullu piginneqatigiilluni inissiatillit peqatigiiffiinik atorunnaarsinneqartunik, aammalu taamaattunut taarsigassarsititseriaaseq immikkut ittoq atorlugu inissiatut nammineq pigisatut tunineqartunut maleruagassanik immikkut ittunik imaqarluni.

§ 85-imut

Aalajangersagaq nutaajuvoq.

Imm. 1-imut

Aalajangersakkami aalajangersarneqarpoq piginneqatigiilluni inissiatillit peqatigiiffianni ataatsimeersuartut piginneqatigiilluni inissiatillit peqatigiiffiata atorunnaarsinneqarnissaanik, aammalu piginneqatigiilluni inissiatillit peqatigiiffiata inissiaataasa inissiatut nammineq pigisatut tunineqarnissaannut aalajangiisinaanerat.

Ataatsimeersuartut sukkulluunniit atorunnaarsitsinissamik aalajangiisinnaapput, tamatumunngalu maleruagassat nalinginnaasumik piginneqatigiilluni inissiaatillit peqatigiiffiata malittarisassaani allassimasarput. Aamma ataatsimeersuartut sukkulluunniit piginneqatigiilluni inissiaatillit peqatigiiffiata atorunnaarsinneqarnissaa, inissiaataasalu inissiatut nammineq pigisatut tunineqarnissaat pillugu aalajangiisinnaapput.

Piginneqatigiilluni inissiaatillit peqatigiiffiata atorunnaarsinneqarnerani inissianik ataasiakkaanik piginnittuuneq piginneqataasunut ataasiakkaanut tunniunneqassaaq. Piginneqataasut piginnittuulissapput aammalu illuutillit peqatigiiffianni ilaasortaalissallutik. Taamaalilluni piginnaatitaasumit pisussaatitaasumillu (piginneqatigiilluni inissiaatillit peqatigiiffianniit) inunntut aalajangersimasunik amerlassusilinnut tunniussineq pissaaq.

Imm. 2-mut

Aalajangersakkami erseqqissarneqarpoq piginneqatigiilluni inissiaatillit peqatigiiffiata inissiaatiminik inissiatut nammineq pigisatut tunisinissani aalajangerpagu, tamatuma piginneqataasunit tamanit taperserneqarnissaa piumasarineqartoq. Piginneqataasut ataatsimeersuarnermi peqataasut tamarmik siunnersuummut akuersinissaat naammanngilaq. Assersuutigalugu piginneqataasut quliusimappata, qulit tamarmik akuersillutik taasisariaqarput.

Piginneqataasut aallaqqaammulli piginneqatigiilluni inissiamik pisiniarlutik aalajangersimasut, taakkulu tunngavigisaasa aserorneqannginnissaat illersorniarlugit aalajangersagaq ilanngunneqarpoq. Taakku piginneriaatsimut allamut nuunnissaannut, immaqalu aningaasanik amerlanerusunik inissiamut atuisussanngortinneqarnissaannik pisussaaffilerneqarsinnaassanngillat.

Imm. 3-mut

Aalajangersakkami atorunnaarsitsinerup inunnit marlunnik isumagineqarnissaa, taassumalu aappaata eqqartuussissuserisuunissaa akuersissummik pigisaqartoq, aappaatalu ataatsimeersuartunit toqqarneqarsimanissaa aalajangersarneqarpoq. Atorunnaarsitsinermi naatsorsuutit inaarutaasut piginneqatigiilluni inissiaatillit kukkunersiuisuanit kukkunersiorneqassapput, aammalu Namminersornerullutik Oqartussat kommunilu piginneqatigiilluni inissiaatillit peqatigiiffiannut taarsigassarsititsisuusimappata, taakkununga nassiutissallugit.

Imm. 4-mut

Piginneqatigiilluni inissiaatillit peqatigiiffiata atorunnaarsinneqarnerminut atatillugu, piginneqatigiilluni inissiaatillit peqatigiiffiata atorunnaarsinneqarnissaminik aalajangerneqarnerata nalaani pisuussutai ilanngaaseriikkat piginneqataasut akornanni angeqqatigiikkaarlugit agguarneqassapput. Aningaasanik agguaassinermi piginneqataasut ataasiakkaat peqatigiiffimmi piginneqataassutaannut naligititaasut tunngavigineqassapput.

Atorunnaarsitsinermut tunngaviusut piginneqatigiilluni inissiatillit peqatigiiffiata malittarisassaanni, atorunnaarsitsinerup sunniutissaanik sukumiinerusumik nassuiaaffiusuni takuneqarsinnaapput.

§ 86-imut

Aalajangersagaq nutaajuvoq.

Imm. 1-imut

Aalajangersakkami pisortat aningaasaleeqataassutissaat, inissianik nammineq pigisanik nutaanik pisisut pisinnaatitaaffigisaat nassuiaatigineqarput. Aalajangersakkap atuutilerneratigut pisisoq, piginneqatigiilluni inissiatillit peqatigiiffiata tiguseqqaarnermini sanaartornerminiluunniit aningaasartuutigisaanit inissiamut piginneqataassutip akiata 40 %-anik taarsigassarsianik paarlaassinermut taarsigassarsisinnaavoq, taakkuli annerpaamik inigisap annertussusaani kvadratmeterimut 5.400 koruuniussapput aammalu inigisaq annerpaamik annertussusaani 110 kvadratmeteriussalluni. Namminersornerullutik Oqartussat aamma kommuni taarsigassarsititsuussapput, taarsigassarsiallu tunniunneqarnerminni taarsigassarsiatut taarserneqartut agguataarneqarsimanerat malillugu agguagaassapput.

Tamannalu imatut isumaqarpoq:

Inissianut nammineq pigisanut nutaanut aningaasalersuutissatut piginnittut tamarmik immikkut annerpaamik 5.400 koruunit x inigisap annertussusaa 110 kvadratmeterit = 594.000 koruuninik Namminersornerullutik Oqartussanit kommunimillu taarsigassarsisinnaassapput, taarsigassarsiat taarserneqartut agguarneqarnerisa assiginik agguarneqartunik.

Aallaqqaammut piginneqatigiilluni inissiatillit peqatigiiffiat Namminersornerullutik Oqartussanit 40 %-imik aammalu kommunimit 26,66 %-imik taarsigassarsisimappat, paarlaassinermi taarsigassarsiarititat imatut agguarneqassapput:

Namminersornerullutik Oqartussanit: $5.400 \text{ koruunit} \times 110 \times 40/66,66 = 356.436$ koruunit.

Kommunimit: $5.400 \text{ koruunit} \times 110 \times 26,66/66,66 = 237.564$ koruunit.

Imm. 2-mut

Aalajangersakkami piginneqatigiilluni inissiatillit peqatigiiffiat annerpaamik ukiunik 15-inik pisoqaassuseqarpat, taarsigassarsianik taarsiinissamut taarsigassarsititsisarnermi atugassarititaasut nassuiarneqarput. Tassalu paarlaassinermi taarsigassarsiat pisinermut isumaqatigiissutip atsiorneqarnerani ulluliussamiit ukiuni 15-ine erniaqartinneqassanngillat akilersugassaassanatillu, taarsigassarsiallu ukiumoortumik januaarip ulluisa aallaqqaataanni erniap kisitsisita 3 %-pointimik ilallugu ernialerneqartassapput, tamatumalu kingorna ukiuni qulini

amerlaqatigiinnik aningaasartalerlugu akilersorneqassallutik. Ernialiisarneq ukiumut ataasiarluni januaarip ulluisa aallaqqaataanni pisassaaq, piffissami ernialiiffiusumi erniap kisitsisita 3 %-pointimik ilallugu annertussusilerneqartumik.

Imm. 3-mut

Aalajangersakkami piginneqatigiilluni inissiatillit peqatigiiffii, piffissami atorunnaarsitsiviusumi ukiut 15-it sinnerlugit pisoqaassuseqartumi taarsigassarsianik taarsiinissamut taarsigassarsinermi taarsigassarsinermit atugassarititaasut pingaarnert maleruagassiorneqarput. Piginneqatigiilluni inissiatillit peqatigiiffiisa taamaattut taarsigassarsianik taarsiinissamut taarsigassarsiaat pisinermit isumaqatigiissutip atsiorneqarnerani ulluliussamiit ukiuni qulini erniaqartinneqassanngillat akilersugassaassanatillu, taarsigassarsiallu ukiumoortumik januaarip ulluisa aallaqqaataanni erniap kisitsisita 3 %-pointimik ilallugu ernialerneqartassapput, tamatumalu kingorna ukiuni qulini amerlaqatigiinnik aningaasartalerlugu akilersorneqassallutik. Ernialiisarneq ukiumut ataasiarluni januaarip ulluisa aallaqqaataanni pisassaaq, piffissami ernialiiffiusumi erniap kisitsisita 3 %-pointimik ilallugu annertussusilerneqartumik.

Imm. 4-mut

Aalajangersagaq naapertorlugu aallaqqaammut piginneqatigiilluni inissiatillit peqatigiiffiannut taarsigassarsiarititaasimasut aammalu taarsigassarsianik taarsiinissamut taarsigassarsiarititaasut aningaasartaasa assigiinngissutaat, inissiamik nammineq pigisamik pisisumit akilerneqassapput, taamatullu inissiamik nammineq pigisamik pisisup nammineerluni aningaasalersuutissat sinneri, soorlu aningaaserivimmit realkredittimilluunniit taarsigassarsinermigut isumagissallugit.

Siuliani imm. 1-imut nassuiaatini assersuusiarineqartumi, inissiamik nammineq pigisamik pisisup 456.000 koruunit (1.050.000 koruunit – 594.000 koruunit) aningaasannorlugit akilertussaassavai. Aningaasalli taakku nalinginnaasumik realkredittimit aningaasalersorneqarsinnaapput, tamatumaniluunniit realkredit inissiap nammineq pigisap nalingata 60 %-iinnaannut taarsigassarsititsiniarluni aalajangeraluarpat.

Imm. 5-imut

Aalajangersakkami Namminersornerullutik Oqartussat kommunillu taarsigassarsiarititaasa piginneqatigiilluni inissiatillit illuutaat qularnaveeqqusiullugu akilerneqartussanik tulleriinnilersuinermi naligiimmik inissillugit qulakkeerneqarnissaat aalajangersarneqarpoq. Taarsigassarsianut qularnaveeqqusiissut pisinermit akiusumut sinneruttumut aningaasalersuutissat, matuma kinguliani killissarititassat taaneqartut iluanni, inissiaq qularnaveeqqusiullugu taarsigassarsiat, akilereernerini akilerneqartussat inissisimassapput. Taarsigassarsianut qularnaveeqqutitut qularnaveeqqusiussaqarluni taarsigassarsinermi allagartap naqqaaqarnera, aalajangersagaq manna naapertorlugu nalunaarsorneqarsimasooq uparuaaffigineqarsimanngitsorlu Kalaallit Nunaanni Eqqartuussivimmit tiguneqarpat aatsaat taarsigassarsiasat tunniunneqassapput.

Qularnaveeqqusiisarneq pillugu Kalaallit Nunaannut inatsit aamma qularnaveeqqusiisinaatitaanermut maleruagassat nalinginnaasut atorneqassapput.

Aalajangersagaq naapertorlugu Namminersornerullutik Oqartussat kommunillu taarsigassarsiarititaat akilerneqartussanik tulleriinnilersuinermi taarsigassarsiat, aammattaaq inissiaq qularnaveeqqusiullugu taarsigassarsiaritineqarsimappata aatsaat inissisimaffimminnit kingusinnerusumut inissinneqarnissaminnik akuersisinnaapput. Namminersornerullutik Oqartussat taarsigassarsiarititaat taarsigassarsiat allat akilerneqareernerini akilerneqartussatut inissittussatut akuersisinnaapput, aatsaat inissiap qularnaveeqqusiunneqarnerani niuernermit akiusup annerpaamik 90 %-ia, paarlaassinermut taarsigassarsiarititit annertussusaannik ilanngarneqarsimasut annertussusiliunneqarsimappat.

Namminersornerullutik Oqartussanit aamma kommunimit taarsigassarsiat qularnaveeqquserneqarnissaat qulakkeerniarlugu, pisisup taarsigassarsiaanut Namminersornerullutik Oqartussat aamma kommunip taarsigassarsiarititaannit akilerneqartussanik tulleriinnilersuinermi sallinngortinneqartunik annerpaaffissatut killiliussa qikkunneqarpoq.

Imm. 6-imut

Aalajangersakkami piginnittut nikinnerini taarsigassarsiat, Namminersornerullutik Oqartussat kommunillu taarsigassarsiarititaannit salliutinneqartut annerpaaffissaat aalajangersarneqarput. Namminersornerullutik Oqartussat kommunillu taarsigassarsiarititaat taamaallaat taarsigassarsiat, aammattaaq inissiaq qularnaveeqqusiullugu taarsigassarsiarineqarsimasut akilerneqareernerini akilerneqartussatut inissisimassapput.

Namminersornerullutik Oqartussanit aamma kommunimit taarsigassarsiat qularnaveeqquserneqarnissaat qulakkeerniarlugu, pisisup taarsigassarsiaanut Namminersornerullutik Oqartussat aamma kommunip taarsigassarsiarititaannit akilerneqartussanik tulleriinnilersuinermi sallinngortinneqartunik annerpaaffissatut killiliussa qikkunneqarpoq

Pigineqatigiilluni inissiamiit inissiamut namineq pigisamut allanngortitsinermit atatillugu niuernermit akiusoq pineqartoq apeqqutaatillugu, paarlaassinermut taarsigassarsianermit inissiami akiitsut saniatigut inissiap nalinga qularnaveeqqusiullugu taarsigassarsisoqarsinnaalissaaq. Paarlaassinermut taarsigassarsianut naleqqiullugu niuernermit nalogititaasoq annertusiartortillugu, inissiami akiitsut saniatigut inissiap nalinga qularnaveeqqusiullugu taarsigassarsiarineqarsinnaasut amerliartussapput.

Assersuut:

Pigineqatigiilluni inissiaq 105 m²-nik annertussuseqartoq tapiiffigineqarsinnaatitaasut atorlugit 15.000 koruunit nalinginut sananeqarsimavoq, taamaattumillu inissiap sananeqarnerata akia tamakkiisoq 1.575.000 koruuniuvoq. Taakkunanga 1.050.000 koruunit pisortanit taarsigassarsiarineqarput.

Piginneqataasup 7 %-it, tassalu 110.000 koruunit nammineerluni aallaqqaatissatut akilersimavai, aammalu peqatigiiffiup realkredittimut taarsigassarsinerani inissiamut 414.750 koruunit taarsigassarsiarineqarsimapput.

Niuernermi akigititaasoq 2.200.000 koruuninut nalilerneqarpat, taarsigassarsiat allat niuernermit naligititaasup tamakkiisup 90 %-iisa iluanniippata taakku akilerneqareernerini Namminersornerullutik Oqartussat kommunillu taarsigassarsiarititannut qularnaveeqqusiissutaat akilerneqartussatut inissisimapput. Tassalu pisumi matumani inissiamut taarsigassarsiarititassat amerlanerpaaffissaat 1.980.000 koruuninut (2.200.000 koruunit 90 %-iinut) amerlassusilerneqarput.

Paarlaassinermut taarsigassarsiarititit siornatigut taarsigassarsiaasimasut (1.050.000 koruunit) aamma taarsigassarsiat nutaat ($105 \cdot 5400 = 567.000$ kr.) assigiinnngissutaannik annertussuseqassapput, katillugit 483.000 koruuniussallutik. Inissiamut piginneqataassummut aallaqqaammut realkredittimit taarsigassarsiaasimasut 414.750 koruuninut 350.000 koruuninut apparsimappata, aammalu paarlaassinermut aningaasartuutit 150.000 koruuniuppata, taarsigassarsiasatut pisariaqartinneqartut katillugit (483.000 koruunit + 350.000 koruunit + 150.000 koruunit) 983.000 koruuniussapput. Taamaattumik inissiamut taarsigassarsinissamut annerpaaffissaq 1.980.000 koruuniummat, akiitsut nalingisa saniatigut (1.980.000 koruunit – 983.000 koruunit) 997.000 koruuninik taarsigassarsinissaq periarfissaqarpoq.

Imm. 7-imut

Inissiami akiitsut saniatigut inissiap nalinga qularnaveeqqusiullugu taarsigassarsiat § 86, imm. 1 naapertorlugu taarsigassarsiarititit akilerneqareernerini akilerneqartussatut inissinneqartussaannnginnerat immikkoortumi erseqqissarneqarpoq. Illuliortiternernut aningaasalersuinermit aqqissuussami inuit amerlanerusut namminneerlutik inissianik imminnut pilersorsinnaalernissaasa qulakkeerneqarnissaa siunertarineqarpoq. Taamaattumik aqqissuussinermi pisortat taarsigassarsiarititaat taarsigassarsiatut uninngatikkallarneqartussatut, ukiuni 20-ni siullerni erniaqanngitsutut akilersugassaannngitsutullu tunniunneqartarput, siunertarineqarmat taarsigassarsisup taarsigassarsiai allat, tassalu aningaaserivimmit imaluunniit realkredittimit taarsigassarsiai ukiuni taakkunani 20-ini akilersorneqassasut. Tamatuma kingorna pisortat taarsigassarsiarititaat akiligassannngortinneqassapput, ukiunut 15-inut aningaasartaat amerlaqatigiinnut agguarlugit akilersorneqassallutik. Taarsigassarsianik akilersuinissap marluinngorlugit immikkoortinneqarneranni, akilersuinermi nammagassat annikinnerunissaat ingerlaavarnissaallu qulakkeerniarneqarpoq.

Taarsigassarsialik inissiamik illumilluunniit sanasimaguni, tamatumunngalu atatillugu pisortat aningaasaleeqataassutissaannik tamakkiisunik pissarsisimaguni, taamatullu 810.000 koruuninik realkredittimit ukiuni 20-ni akilersugassanik taarsigassarsisimaguni, realkredittimut taarsigassarsianut ukiumut akiligassat ilanngaaserneqanngitsut 60.750 koruuniussapput, tassalu qaammammut 5.062,50 koruuniussallutik. Assersuutigalugu ukiut tallimat qaangiunnerini inissiami akiitsut

saniatigut inissiaq 375.00 koruuninik naleqartoq paasinarsissappat, aammalu pisortat taarsigassarsititsisuusimasut inissiami akiitsut saniatigut inissiap nalinga qularnaveeqqusiullugu taarsigassarsisinnaaneq akuerisimappassuk, taarsigassarsiallip qaammammut akiliutai ilanngaasigaanngitsut 2.343,75 koruuninik ilasussaapput, tassalu qaammammut akiliutit ilanngaasigaanngitsut 46,3 procentinik qaffattussaallutik.

Aaqqissuussinermi mianersuunniarneqartoq pingaarneq eqqarsaatigalugu, pisortanit taarsigassarsititsisuusimasut akiitsut annertusineqarnissaannut peqataassappata akuersissappatalu, tamatumalu nassatarisaanik taarsigassarsiallip ukiut 21-ssaanniit pisortanit taarsigassarsiami saniatigut taarsigassarsianut allanut akilersuilissappat, tamanna mianersuunniarneqartumut uniuuttussaavoq.

Inissiami iluarsaassinernut, pitsanngorsaannernut alliliinernullu taarsigassarsiat akilerneqareernerini § 86, imm. 1 naapertorlugu taarsigassarsiat akilerneqartussatut inissinneqarnissaat aalajangersakkami aalajangersarneqarpoq. Tamanna tunngavigalugu inissiap nalinganut qaffaataasumik inuulluataarniutinik, soorlu uffarfinnik supoortulinnik, aalartitsivinnik (sauna), igaffimmi uffarfimmilu atortunik akisuunik nutaanik iluarsaassinernut pitsanngorsaannernullu taarsigassarsiarititat siulliullutik akilerneqartussanngussapput, kisiannili aatsaat inissiap nalingata qaffasinnerulerneranik kinguneqartumik annertussusilerneqarsimagunik. Taarsigassarsiallip assersuutigalugu uffarfimmik aalartitsivimmik 39.000 koruuninik akeqartumik ikkussinerani, inissiap niuernerimi nalingata 5.000 koruunit, tassalu uffarfiup nalinginnaasup nalinga sinnerlugu qaffannissaa qulakkeerneqarsinnaanngilaq.

Tamatuma peqatigisaanik § 86, imm. 1 naapertorlugu taarsigassarsiat aamma inissiami alliliinernut taarsigassarsiat akilerneqareernerini akilerneqartussatut inissinneqarnissaat aalajangersakkami aalajangersarneqarpoq. Inissiap allilerneqarnera inissiami alliliissutissat kvadratmeterinngorlugit imaluunniit inissiap pisoqaassusaanut killiligaanngilaq.

Aalajangersagaq naapertorlugu § 86, imm. 1 naapertorlugu taarsigassarsiat inissiami aningaasartuutiviusut uppernarsarneqarsimasut tunngavigalugit iluarsaassinissamut, pitsanngorsaannissamut alliliinissamullu taarsigassarsiarititat akilerneqareernerini akilerneqartussatut inissisimapput, tassanilu inissiap nalimigut qaffaatissaatut missiliorneqartut pineqanngillat.

Imm. 8-imut

Aalajangersakkap atuutilerneratigut illuut minnerpaamik ikuallattoornissamut anorersuarneranilu ajoqusernissamut sillimmasersimassaaq. Tamatumunnga soorunami piginneqatigiilluni inissiat soorlu nungullutik ikuallakkaluarpata, aammalu illut sillimmaserneqanngippata Namminersornerullutik Oqartussat kommunillu sillimmasiissutaasa naleqartussaannginnerat pissutaavoq. Inissiat tamarmik immikkut imaluunniit illuutillit peqatigiiffiat aqutigalugu sillimmaserneqarsinnaapput.

§ 87-imut

Aalajangersagaq nutaajuvoq.

Aalajangersakkami inissiamik nammineq pigisamik pisisup piginneqatigiilluni inissiap inissiatut nammineq pigisatut tiguneqarneranut atatillugu aningaasartuutitut akiliisussaana aalajangersarneqarpoq, taakkununga teknikkikkut aningaasaqarnikkullu siunnersorteqarnermut, inatsilerituumik siunnersorteqarnermut, allaffissornermut, aningaasalersuinermit siunnersorteqarnermut, aningaasalersuinermit, piginnittuunermit uppersaatiip aamma suliarineqarnerinut kiisalu naqissusiinermit uppersaatinut aningaasartuutit ilaallutik.

Aalajangersakkami pisisup illuummik niuruteqarnermut atatillugu aningaasartuutissanik nammineerluni akiliisussaananut tunngavissat nalinginnaasut malinneqarput, tassanili pisisup kisimiilluni piginnittuunermit uppersaatiip suliarineqarneranut, kiisalu teknikkikkut aningaasaqarnikkullu naliliinermit akiliinissaa pineqanngillat. Taamatut aaqiinissaq aamma Namminersorerullutik Oqartussat kommunillu iluaqutaasinnaasunik atugaqartitsillutik taarsigassarsititsisussaammata naammaginatutut isigineqarpoq.

§ 88-imut

Aalajangersagaq nutaajuvoq.

Imm. 1-imut

Aalajangersakkami paarlaassinermut taarsigassarsiarititat piginnittut nikinneranni akiligassanngortinneqartannginnissaat aalajangersarneqarpoq, tamatumunngalu pisortanit taarsigassarsititsisut pigisanik aalaakkaasunik qilersorsimanngitsumik tunisisarnermut nalinginnaasumut soorunami akornutaasariaqannginnerannik pissuteqarpoq.

Imm. 2-mut

Aalajangersakkami imm. 1-imi ilaatinneqartussaanngitsoq aalajangersarneqarpoq, taannalu malillugu pisortanit taarsigassarsianik taarsiinissamut taarsigassarsiarititaassat tamatigut akiligassanngortinneqartarnissaat pineqarpoq:

1) Taarsigassarsianut erniat akilersuutillu akilerneqanngippata, aammalu tamanna pillugu allakkatigut akileeqqusissutip taarsigassarsialimmit tiguneqarneraniit kingusinnerpaamik ullut arfineq marluk qaangiutsinnagit taarsigassarsisup akiitsut akilinngitsuukkat akilersimanngippagit.

2) Taarsigassarsiallip inissiaq nammineq pigisaq naammaginartumik aserfallatsaalinnngippagu, aammalu taarsigassarsititsisimasumut qularnaveeqqusiissut ajorseriarsinnaappat.

3) Inissiaq nammineq pigisaq inissianik attartortitsisarneq pillugu Inatsisartut peqqussutaanni sukkulluunniit atuuttumi piumasaqaatit uniorlugit attartortinneqarpat imaluunniit ineqartumit inummut allamut attartortinneqarpat.

4) Inissiaq minnerpaamik ikuallattoornissamut anorersuarneranilu ajoqusernissamut sillimmaserneqarsimannngippat.

Imm. 3-mut

Aalajangersagaq naapertorlugu taarsigassarsiallip piffissap qanorluunniit ilinerani paarlaassinermut taarsigassarsiat ernialersorneqartut, erniaalli akilerneqanngitsut akilersinnaavai.

§ 89-imut

Aalajangersakkap najoqqutassatigut allannguuteqartinneqarluni piginneqatigiilluni inissiat pillugit Inatsisartut peqqussutaanni nr. 1-imi, 31. oktober 1991-imeersumi, kingusinnerusukkut allannguuteqartumi § 46, imm. 2 assigaa.

Imm. 1-imut

Aalajangersakkami piginneqatigiilluni inissiaatillit peqatigiiffiata piginneqatigiilluni inissiaatillit peqatigiiffiat atorunnaarsinniarlugu aalajangerpat, tamatumunngalu peqatigitillugu inissiat inissiatut nammineq pigisatut tunioqqarnissaat aalajangerneqanngippat qanoq pisoqarnissaa isummerfigineqarpoq. Piginneqatigiilluni inissiaatillit peqatigiiffiata inissiaataat tunniussinissaq sioqqullugu pisortat attartortittakkatut inissiaatigisimappatigit aalajangersagaq aatsaat atorneqassaaq. Taamaattumik piginneqatigiilluni inissiat, piginneqatigiilluni inissiaatillit peqatigiiffiata nutaatut sanatissimasaat pineqanngillat.

Aalajangersakkap ulluinnarni atorneqangaatsiarnissaa naatsorsuutigineqanngilaq. Aalajangersakkami piginneqatigiilluni inissiaataasimasut piginnittuusimasunut, tassalu Namminersornerullutik Oqartussanut imaluunniit kommunimut tunniunneqarlutik inissiatut attartortittakkatut nalinginnaasutut atorneqalernissaat aalajangersarneqarpoq. Piginneqataasut attartortutut inissiani najugaqaannarnissartik pisinnaatitaaffigaa. Attartortitsisup attartortitsinissamik isumaqatigiissusiornermut atatillugu qaammatini sisamani inissiamik attartornermut akiliutissap nalinganik (qaammammi ataatsimi attartornissamut siumoortumik akiliut, kiisalu qaammatini pingasuni attartornerup nalinganut qularnaveeqqusiissut) akiliisoqarnissaa piumasarinnaavaa. Ikaarsaarnermut atatillugu apeqqutissaasinnaasut imm. 2-mi piginnaatitsissut naapertorlugu Naalakkersuisunit aalajangersarneqassapput.

Imm. 2-mut.

Aalajangersagaq piginneqatigiilluni inissiatillit peqatigiiffiata atorunnaarsinneqarnerani peqatigiiffiup inissiaataasa inissiatut attartortittakkatut nalinginnaasutut atorneqalernerinut atatillugu Naalakkersuisut maleruagassanik sukumiinerusunik aalajangersaanissaannut piginnaatitsissutaavoq. Aalajangersagaq piginnaatitsissutitut isumaqartinneqarpoq, tassanilu ilaatigut piginneqatigiilluni inissiatillit peqatigiiffiannut taarsigassarsiarititaasimasut aammalu piginneqatigiilluni inissiatillit peqatigiiffiata piginnittunngortullu akornanni aningaasaqarnikkut iluarsisassat assigiinngitsut qanoq pineqarnissaat pillugu aalajangersaasinnaanissaq periarfissiissutigineqarpoq.

Piginneqatigiilluni inissiatillit peqatigiiffiisa atorunnaarsinneqartut tamatumunnga peqatigitillugu inissianik inissiatut nammineq pigisatut tunineqarnissaannik aalajagiingiitsut amerlanissaat naatsorsuutigineqanngimat, suliariaasissanut maleruagassat sukumiinerusut Inatsisartut peqqussutaannut naleqqiullugu allaffissornermi malitassaanerusutut isigineqarsinnaapput. Tamanna tunngavigalugu taamatut ilusilerneqarput.

§ 90-imut

Inatsisartut peqqussutissaata 1. juli 2008-mi atuutlernissaa siunnersuutigineqarpoq, atuutsitsilernerimullu peqatigitillugu piginneqatigiilluni inissiat pillugit Inatsisartut peqqussutaat atuuttoq, piginneqatigiilluni inissialiortiternermi akuersisarnerup ingerlasarnera pillugu Namminersornerullutik Oqartussat nalunaarutaat nr. 35, 27. august 1990-imeersoq kiisalu piginneqatigiilluni inissiatillit peqatigiiffianni malittarisassat nalinginnaasut pillugit Namminersornerullutik Oqartussat nalunaarutaat nr. 13, 25. juni 1992-imeersoq atorunnaarsinneqarnissaat siunnersuutigineqarluni.

Namminersornerullutik Oqartussat kommunillu inissiaataasa attartortittakkat teknikkkut aningaasatigullu nalilivigineqartarnerat pillugu Namminersornerullutik Oqartussat nalunaarutaat nr. 9, 12. maj 2003-meersoq, Inatsisartut peqqussutissaat manna naapertorlugu aalajangersaanikkut allanngortinneqarnissami atorunnaarsinneqarnissamilu tungaanut atuutiinnassaaq.

§ 91-imut

Aalajangersagaq ikaarsaarnermut aalajangersagaavoq, tassanilu piginneqataassutit pioreersut akiisa annerpaaffissaasa naatsorsorneqartarnerat nassuiaatigineqarpoq.

Maleruagassat maannamut atuussimasut naapertorlugit akip annerpaaffissaatut naatsorsorneqartoq, siunnersuummi aalajangersakkat malillugit akit annerpaaffissaata nutaap kingusinnerusukkut naatsorsorneqarnerani siunnersuummi § 68, imm. 1, nr. 1 naapertorlugu nammineq aallaqqaatissatut akiliutissamut naleqqiunneqassaaq. Maleruagassat maannamut atuuttuusimasut malillugit akip annerpaaffissaatut naatsorsorneqartoq, matuma kinguliani siunnersuummi matumani aalajangersakkat malillugit piginneqataanermut uppernarsaatip akiata

annerpaaffissaanik naatsorsuinissamut assersuusiami, ukioq 1-imi aallaqqaammut aningaasartaliussatut ikkunneqassaaq:

Matuma kinguliani assersuusiaq taassumalu nassuiarneqarnera tamatuminnga takutitsissutaavoq:

Maleruagassat atuuttut naapertorlugit akip annerpaaffissaa imatut naatsorsorneqarpoq:

Piginneqatigiilluni inissiatillit peqatigiiffianni piginneqataassummik tunniussinermi akiusooq, piginneqataasup nammineerluni akiliutaanit, ukiumut erniap kisitsisitaanik 3 %-imik ilaqartinneqartumik ernialersorneqartunit annertunerussanngilaq, taakkunungalu ilassutigineqassaapput:

- 1) inissiami pitsanngorsaanerup, ukiumut erniap kisitsisitaanik 3 %-imik ilaqartinneqartumik ernialerneqartup nalinga.
- 2) aserfallannernut aserfallatsaaliuisimanninnermullu ilanngaait,
- 3) piginneqataasup piginneqataassutaani inissiap sananeqarneranut pisiarineqarneranulluunniit taarsigassarsianut akilersuutit ukiumut erniap kisitsisitaanik 3 %-imik ilaqartinneqartumik ernialerneqartut, aamma
- 4) illuummi piginneqataassutip nalimigut qaffaatai, Kalaallit Nunaanni sanaartornermut aningaasartuutitut tunngavilersuutit naapertorlugit piginneqataasup nammineerluni aallaqqaatissatut akiliutai, akilersuutitut akiligai kiisalu 1) aamma 2) naapertorlugit naatsorsuinerup inernerit tunngavigalugit naatsorsorneqartut.

Aalajangersagaq pingaarnersiukkat uku malillugit agguarneqarsinnaavoq:

- 1) Piginneqataassut, ukiumut erniap kisitsisitaanik 3 %-imik ilaqartinneqartumik ernialerneqartoq, aamma Kalaallit Nunaanni sanaartornermut aningaasartuutitut tunngavilersuutit naapertorlugit iluarsineqartoq.
- 2) Inissiami pitsanngorsaanerup, ukiumut erniap kisitsisitaanik 3 %-imik ilaqartinneqartumik ernialerneqartup nalinga, Kalaallit Nunaanni sanaartornermut aningaasartuutitut tunngavilersuutit naapertorlugit iluarsineqartoq.
- 3) Piginneqataasup piginneqataassutaani inissiap sananeqarneranut pisiarineqarneranulluunniit taarsigassarsianut akilersuutit ukiumut erniap kisitsisitaanik 3 %-imik ilaqartinneqartumik ernialerneqartut aammalu Kalaallit Nunaanni sanaartornermut aningaasartuutitut tunngavilersuutit naapertorlugit iluarsineqartut.
- 4) Aserfallannernut aserfallatsaaliuisimanninnermullu ilanngaait, Kalaallit Nunaanni sanaartornermut aningaasartuutitut tunngavilersuutit naapertorlugit iluarsineqartut.

Aalajangersakkat atuuttut naapertorlugit piginneqataassummut uppersaatip akiata annerpaaffissaata naatsorsorneqarnissaanut assersuut paasiuminarsagaq:

Ukioq	Aallartinn.	Akilers.	Pitsanng.	Ern.kis.+3%	Killiffik	Naanerani
1	120.070	16.000	10.000	9.129	4.656	159.855
2	159.855	17.000	-	11.053	5.637	193.546
3	193.546	18.000	5.000	13.534	6.902	236.983
4	236.983	19.000	(4.000)	15.749	8.032	275.763
5	275.763	20.000	15.000	19.423	9.906	340.092
6	340.092	21.000	-	22.568	11.510	395.170
7	395.170	22.000	10.000	26.698	13.616	467.484
8	467.484	23.000	(8.000)	30.155	15.379	528.018
9	528.018	24.000	5.000	34.814	17.755	609.587
10	609.587	25.000	-	39.662	20.227	694.476
Katill.	120.070	205.000	33.000	222.786	113.621	694.476

Nassuiaat: Erniat kisitsisitaat 3,25 %-inut aalajangerneqarpoq, aammalu sanaartornermut aningaasartuutininut tunngavilersuutit ukiumut 3 pointinik qaffattarput.

Piginneqataassutip akiata annerpaaffissaanik naatsorsuisarnermut maleruagassanut atuuttuusimasunut naleqqiullugu aalajangersakkami matumani pineqartut makku pingaartumik allannguuteqartinneqarput:

- Erniap kisitsisitaat + 3 % erniap kisitsisitaanut + 1,5 %-imut allanngortinneqarpoq.
- Pitsanngorsaanerit ernialersorneqassanngillat.
- Piginneqataassummut illuutitp nalngata qaffaatai ilassutigineqassanngillat.
- Piginneqataassummut ingerlatsinermi sinneqartoortit sillimmatissatullu illuartitat atugassanngortinneqarsimannngitsut ilassutigineqassapput.

Siunnersuummi matumani aalajangersakkat naapertorlugit piginneqataassummut uppersaatip akiata annerpaaffissaata naatsorsorneqarnissaanut assersuut paasiuminarsagaq:

Ukioq	Aallartinn.	Akilers.	Pitsanng.	Ern.kisits.	Illuartitanit	Naanerani
1	120.070	16.000	10.000	4.422	1.500	151.992
2	151.992	17.000	-	5.492	-	174.485
3	174.485	18.000	5.000	6.256	2.500	206.240
4	206.240	19.000	(4.000)	7.320	-	228.561
5	228.561	20.000	15.000	8.078	-	271.639
6	271.639	21.000	-	9.511	5.000	307.150
7	307.150	22.000	10.000	10.697	-	349.847
8	349.847	23.000	(8.000)	12.118	-	376.964
9	376.964	24.000	5.000	13.031	1.000	419.996
10	419.996	25.000	-	14.462	-	459.458
Katill.	120.070	205.000	33.000	91.388	10.000	459.458

Nassuiaat: Erniat kisitsisitaat 3,25 %-inut aalajangerneqarpoq

Maleruagassanit nutaanngitsuniit nutaanut ikaarsaarnermi assersuut tamakkiisoq paasiuminarsagaq.

Ukioq	Aallartin.	Akilers.	Pitsanng.	Ern.kis.+3%	Killiffik	Ern.kisits.	Iluartit.	Naanerani
2002	120.070	16.000	10.000	9.129	4.656			159.855
2003	159.855	17.000	-	11.053	5.637			193.546
2004	193.546	18.000	5.000	13.534	6.902			236.983
2005	236.983	19.000	(4.000)	15.749	8.032			275.763
2006	275.763	20.000	15.000	19.423	9.906			340.092
2007	340.092	21.000	-			11.735	1.500	374.327
2008	374.327	22.000	10.000			13.206		419.533
2009	419.533	23.000	(8.000)			14.122	3.000	451.655
2010	451.655	24.000	5.000			15.621	500	496.777
2011	496.777	25.000	-			16.958	2.000	540.734
Total	120.070	205.000	33.000	68.889	35.133	71.642	7.000	540.734

Nassuiaat: Erniat kisitsisitaat 3,25 %-inut aalajangerneqarpoq

Siuliani assersuummi takuneqarsinnaasutut 2007-ip naanerani (2008-p aallartinnerani) naligitaasoq iluarsinissamut tunngavigineqassaaq.

§ 92-imut

Aalajangersagaq ikaarsaarnermut aalajangersagaavoq, piginneqatigiilluni inissiatillit peqatigiiffiisa Namminersornerullutik Oqartussanit kommunimillu taarsigassarsititsinissamik neriorsuummik tigusaqareersimasut, kisiannili taarsigassarsiassaasut suli akilerneqarsimanngitsut, Naalakkersuisunut qinnuteqarnermikkut aningaasaliissutissanit annerusut realkredittimit taarsigassarsinikkut aningaasalersorneqarsinaaneritut akuerineqarnissaannik qulakkeerisussaq.

Tassalu aalajangersakkap ulluinnarni atuutsinneqarnerani nammineerluni aallaqqaatissatut akiliutissat appartinneqassapput, tassani aningaasalersuutissanit annerusut realkredit aqqutigalugu aningaasalersorneqartussaammata. Taamaattumik akiitsutigut nammagassat piginneqataasunit ataasiakkaaniit avataaniit taarsigassarsititsisumut, piginneqatigiilluni inissiatillit peqatigiiffiata taarsigassarsivigisaanut nuunneqassapput.

§ 93-imut

Aalajangersagaq ikaarsaarnermut aalajangersagaavoq, taannalu malillugu piginneqatigiilluni inissiatillit peqatigiiffiisa Namminersornerullutik Oqartussanit kommunimillu taarsigassarsititsinissamik neriorsuummik tigusaqareersimasut, kisiannili taarsigassarsiassaasut suli akilerneqarsimanngitsut, Naalakkersuisunut kommunalbestyrelsimullu qinnuteqarnermikkut taarsigassarsitinneqarnissamik

neriorsuut pissarsiartik Inatsisartut peqqussutaanni matumani maleruagassat malillugit taarsigassarsinissamik neriorsuummik taarsersinnaavaat.

Piginneqatigiilluni inissiatillit peqatigiiffiit arlalinnut tamanna aningaasaqarnikkut annertuumik sunniuteqarsinnaavoq, siunnersuutip matuma atuutilerneratigut aningaasalersuisarnermut aningaasartassarititaasut nutaat atorpeqartussanngussammata.

Tamatuma nassatarisaanik piginneqataasoq sanaartornermut aningaasartuutit tapiiffigineqarsinnaasut 5%-iinnaannut nammineerluni aallaqqaatissatut akiligassaqalersussaavoq, piginneqatigiilluni inissiatillit peqatigiiffiat siunnersuummi annertussusissatut aningaasartassatullu aalajangerneqartut iluanni sanaartornermut aningaasartuutit tapiiffigineqarsinnaatitaasut tamakkiisut 20 %-iinik Namminersornerullutik Oqartussanit kommunimillu taarsigassarsinnaalissaaq, kiisalu piginneqatigiilluni inissiatillit peqatigiiffiata sanaartornermut aningaasartuutit tapiiffigineqarsinnaatitaasut sinnerinut aningaasatigut killiligaanngitsumik realkredittimit aningaasalersorneqarnissani angusinnaalissavaa.

Taamaattumik tassani taarsigassarsiarititassat amerlassusissaat taarsigassarsiarititassallu procentissaat kisimik atuutiinnassapput, peqqussutip atuutilerneratigut piginneqatigiilluni inissiatillit peqatigiiffiat aalajangersakkani allani tamani pineqartunut ilaalertussaammat.